

WANILUK

NIUSPEPA BILONG YUMI OL PAPUA NIUGINI STRETI 30 YIA NAU

32 pes


Namba 1,338

Wik i stat long Fonde Februeri 17, 2000

70t

Wakon tok em no inap risain

pes 2



PNGBC opim pasbuk bilong U Vistract

pes 3

Ol asples kilim ol raskol

pes 7

Mani paul long Telikom. ripot

pes 12

Napa Napa projek kisim laisens bilong wokim bensin na kerosin

FRANCIS ULIAU i raitim

WOK bilong kirapim fektori bilong wokim kerosin na bensin long Napa Napa long Mosbi bai stat sampela taim long mun Epril.

Dispela i kamap bihain long mama kampani bilong Napa Napa wel rifaineri, InterOil Limited, i kisim laisens bilong wokim bensin na kerosin long han bilong PNG gavman long dispela wik. Laisens ya i oraitim nau kampani long go het na sanapim refaineri.

Long taim bilong sainim tok orait wantaim InterOil, Minista bilong Petrolium na Eneji Tommy Tomscoll i tokaut olsem olgeta kampani husat i laik wokim ol samting wantaim wel i mas kisim dispela laisens. Dispela i kam aninit long nupela Wel na Ges Ekt bilong 1999.

Olpela ekt i no gat kain askim olsem.

Gavman i oraitim pinis envairomen plen, trening na lokolaisesen plen na ol arapela samting em InterOil i mas bihainim. Na laisens ol i kisim long dispela wik i givim tok orait long InterOil bilong go het na wokim rifaineri.

"Aninit long nupela ekt, olgeta wel rifaineri kampani i mas kisim dispela petrolium prosesing fesiliti laisens pastaim long ol i ken go het wantaim ol projek bilong ol," Minista Tomscoll i tok.

Long sait bilong InterOil na Napa Napa em i narakain liklik. "Kampani i bin sainim tok orait bilong projek wantaim kantri pastaim long nupela ekt i bin kamap." Nupela ekt i bin kamap ples kila long mun Me 1997, na tok orait bilong InterOil i kam aninit long seksen 189 bilong nupela Wel na Ges Ekt.

Minista i tok long taim InterOil i bekim olgeta dispela askim, kampani i bihainim stret tru olgeta laik bilong lo na "salim wanpela askim pas i go long opis bilong minista insait long 6-pela mun" bilong kisim laisens bihain long nupela ekt i



• Minista bilong Petrolium na Eneji Tommy Tomscoll (lephan) wantaim president na sief eksekutiv opisa bilong InterOil Limited, Phil Mulacek long taim bilong sainim laisens.

kamap. Opis bilong minista i bin kisim dispela askim pas long Ogas 2, 1999.

"I tru olsem ol papa bilong Napa Napa wel rifaineri i bin bihainim stret olgeta askim tok tok aninit long lo, InterOil i no bin kisim laisens hariap bikos planti lain tru i bin glasim na skelim ol ripot bilong dispela projek," Mista Tomscoll i tok.

Long ol toktok bilong em, president na sief eksekutiv opisa bilong InterOil Limited, Phil Mulacek i tok ol i amamas tru long kisim laisens bilong

kirapim tru wok long rifaineri.

"Dispela em i wanpela bikpela de tu bilong ol InterOil, ol papa bilong kampani na projek na ol seaholda bilong kampani long Papua Niugini," Mista Mulacek i tok.

"Mipela i amamas long dispela luksave olsem mipela i helpim long kirapim wok divelopmen long Papua Niugini.

"Long olgeta hap han bilong gavman mipela i go, ol opisa na minista i bungim mipela wantaim gutpela toktok na bekim. Na mipela i amamas

long dispela."

Mista Mulacek i tok InterOil tu bai wok hat nau long pinisim olgeta toktok bilong mani long narapela mun, na long Epril, ol wok bai stat long rifaineri.

Long bekim ol dispela toktok, Minista Tomscoll i tok dispela rifaineri long Napa Napa bai wokim wel na bensin na kerosin bilong yusim hia long Papua Niugini.

"Na wanem samting i stap yet, InterOil bai salim i go long ol maket long ovasis."

Skate tok Bogenvil bai bagarap gen

NEVILLE CHOI i raitim

LIDA bilong oposisen, Bill Skate i autim wari bilong em taim em i tokim ol niusman olsem em ino amamas long pasin Praim Minista Sir Mekere Morauta i mekim long delegesen bilong Bogenvil husat i bin kam long Pot Mosbi long las wik long bung wantaim em na gavman bilong em.

Mista Skate, husat i bin sambai long wok politiks taim em i go malolo bihain long las sindaun bilong palamen long las yia, i tok olsem olgeta gutpela wok gavman bilong em i bin mekim long kamapim gutpela sindaun namel long ol lain Bogenvil bai bagarap nau long pasin bilong Sir Mekere.

Em i tok gavman bilong em i bin mekim planti samting long helpim gutpela sindaun long Bogenvil na nau i luk olsem dispela gavman i wok long traim na bagarapim olgeta wok bilong olpela gavman.

"Oposisen i bin pasim maus bilong em long 8-pela mun i go pinis bilong wanem mipela i laik givim sans long gavman bai mipela i ken lukim sapos gavman bilong Sir Mekere Morauta inap long mekim wok long lukautim gut kantri. Nau mipela oposisen i mas tokaut olsem gavman ino mekim wok bilong em," Mista Skate i tok.

Mista Skate i tok olsem em i luksave olsem Praim Minista i wok long traim long stretim ol bikpela birua long ekonomi bilong kantri, tasol em i tok olsem wanpela asua bilong Sir Mekere em long sait bilong harim ol toktok bilong ol lain long Bogenvil.

"Mi no amamas olsem ol bikman bilong Bogenvil i kam long bung wantaim Praim Minista na i no givim taim long bungim ol. Long taim bilong gavman bilong mi, mipela i bin givim Bogenvil olsem fes prairiti. Sapos dispela gavman i laik stretim ekonomi bilong kantri, em i mas lukluk long stretim pastaim hevi bilong Bogenvil. Bikos Bogenvil em i stap long namel bilong ol arapela hevi ekonomi bilong kantri i bungim tude," Skate i tok.

Oposisen lida i tromoi singaut i go long Sir Mekere Morauta na gavman bilong em long harim gut toktok bilong ol lain long Bogenvil.

"Gavman nau i mas kamaut stret na tokim ol pipel long wanem samting stret em bai i mekim nau. Em i mas painim mani na givim long ol lida bilong Bogenvil bai ol pikinini bilong Bogenvil bai inap go bek long skul," em i tok.

Mista Skate i tok lukaut long wanem samting bai kamap bihain long dispela deligesen bilong Bogenvil i no amamas long raun bilong ol i kam long Pot Mosbi na nau ol i go bek long ples.

"Praim Minister Sir Mekere Morauta i les long bung wantaim ol lida bilong Bogenvil. Nau ol ino amamas. Sapos wanpela samting i kamap bihain long dispela, Sir Mekere yet i mas stretim," Mista Skate i tok.

Em i tok tu olsem planti arapela samting i wok long kamap bilong soim olsem gavman ino mekim wok bilong em.

Mista Skate i tok ol kainkain hevi i wok long kamap namel long publik sevis na ol disiplin foses olsem PNG Difens Fos (PNGDF) na plis fos.

Em i tok dispela kain hevi na birua namel long ol lain bilong PNGDF na ol plis i wok long kamap bikos gavman ino tingim ol wokman meri bilong kantri.

Mista Skate i tokim ol niusman olsem dispela deligesen i kam long Bogenvil ino bin amamas taim ol i lusim Mosbi na em ino save wanem samting ol bai mekim nau.

PLIS RIPOT

Aitape:

Sikspela man i haitim pes na karim ol gan, na naip samting i bin go insait long disebel senta long Aitape na hensapim ol man long hap long givim pei bilong ol wokman long ol, ol ripot i tok.

Dispela samting i bin kamap long las Fonde.

Ol ripot i tok ol raskol ya i bin fosim wanpela lapun pater i go long daun long graun na tok olsem ol bai kilim dai em taim long wankain taim tu, ol i askim strong long givim ol long peirol bilong ol woklain long Pater Antoinet disebel senta. Long dispela taim, ol no karim peirol i go yet long opis.

Taim ol raskol ya i wok long wokim nabaut, wanpela wokman bilong senta i go kamap long opis na pait wantaim ol. Pait i kamap na wanpela wokman bilong senta i bin kisim bagarap taim ol raskol i katim em wantaim naip.

Ol stilman ya i bin ronawe lusim opis na i laik go long wanpela damp ka we ol bin stilim pastaim tasol ol woklain i bin pasim rot bilong ol. Tasol ol i paiarim gan na kiarim rot bilong ol na ronawe.

Ripot i tok dispela samting i bin kamap taim ol skul pikinini we i pinis skul na ol i wok long go long haus. Na ol bin pret tru taim ol sutaut i kamap.

Ol komyuniti long hap i bin kukim tripela haus na ol tok ol bai kukim moa sapos ol stilman i no givim ol yet long plis long Mande. Mekim na ol PMV long Aitape i bin stapim ron bilong ol.

Long nait, ol plis i bin go insait long tupela haus na holim pasim tupela man husat i bin stap insait long dispela holap. Narapela foapela i bin givim ol yet long han bilong plis las Sarere na nau ol i stap long lukaut bilong plis long Aitape plis stesen.

Bogenvil:

Ol bikhet man i bin holim ap wanpela ka long Manetai, Sentrel Bogenvil na kamapim bagarap long tripela pipel. Wanpela long ol em plismeri. Ol bin kisim tupela ka tu na wanpela bilong ol i bilong Presiden bilong Bogenvil Pipel's Kongres Joseph Kabui, ol ripot i tok.

Ripot i tok tu olsem ol bikhet man i wokim nabaut tu long ol plisman husat i wok namel long Tunuru na Arawa.

Ol bin pretim tu sampela soldia wantaim gan taim ol i laik go long Arawa Haus sik long kisim marasin.

Tupela wik i go pinis tu, ol bikhet lain i bin wokim holap long wanpela ka bilong ol soldia we i wok long karim ol kaikai, piul na ol gan na katres samting. Ol bikhet lain ya i kisim ka na olgeta samting wantaim i go. Tasol ol bin kisim bek ol samting taim ol Plis Monitas i toktok wantaim ol siefs na komyuniti lida. Ol gan na katres samting em ol no bringim bek yet.

Goroka, Isten Hailans:

Plis long Goroka i wok long was gut bihain long wanpela raskol i dai. Dispela em bihain long ol i laik wokim holap.

Bos bilong ol plis long Hailan John Wagambie i tok ol plisman long Goroka i was gut stret i stap bihain long ol raskol i bin laik wokim holap na stil long Mendikwae Trading Idostu long Goroka maket.

Mista Wagambie i tok raskol ya i bin sutim em yet bihain long em i pait wantaim wanpela wokman.

Ol nes long Goroka Haus sik i tok raskol man ya i bin dai bihain long em i lusim planki blut na bodi bilong em i stap nau long haus sik.

Mista Wagambie i tok saspek ya i bin stap wantaim faipela arapela na ol bin wokim holap long stoa ya namel long 9 na 10 kilok moning.

Wakon tok em i no inap risain

YAKAM KELO i raitim

PLIS Komisina John Wakon i tokaut olsem em i no inap lusim wok bilong em olsem Plis Komisina bikos long ol hait tok-tok we i bin kamap long ol sampela plisman husat i gat hait tingting bilong ol yet.

Mista Wakon i tok em i bin kamap Plis Komisina long Julai las yia na dispela em sotpela taim tasol we em i wok strong nau long mekim kamap sampela gutpela senis long wok bilong plis fos insait long kantri. Ol senis i kamap gut na em i no laikim hevi bilong bagarapim bel na tingting na gutpela wok bung wantaim bilong ol plismanmeri long kamap.

Misat Wakon i mekim dispela toktok bihain long sampela olpela plisman i bin askim em long lusim sia bilong Plis Komisina bikos long sampela paul pasin we ol i tok i bin kamap.

Tasol Mista Wakon i tok ol dispela toktok em ya em toktok tasol na sapos ol dispela plisman i gat evidens stret orait ol i mas soim o nogat bai loya bilong em i kisim samons long ol bikos long sas bilong bagarapim nem bilong em.

Mista Wakon i tok i no gutpela tru long ol dispela plisman i bin go aut pablik long niuspepa na sutim tok olsem i gat bikpela hevi insait long menesmen bilong plis fos insait long kantri. Dispela i no gutpela pasin tru bikos wanem hevi bilong ol plis-

man o long menesmen i mas go stret long ol bosman bilong fos bai ol i ken lukim na stretim wantaim husat plisman i gat hevi o wari. Long dispela pasin tasol, ol dispela plisman i brukim lo bilong plis fos long mekim toktok long pablik egensim menesmen we i nogat evidens o tru long en. Na ol bai kisim sas bilong dispela eksen bilong ol, Mista Wakon i tokaut.

Plis Komisina Wakon i tok em i luksave olsem sampela plisman i pren bilong olpela menesmen na i wok long mekim wok arere long bagarapim nem na salenim wok bilong ol dispela plis menesmen nau. Bikos ol i no amamas long sampela wok ol plis fos long nau i wok long karimaut na tu ol i wok long kwestenim sampela wok bilong plis fos yet.

Mista Wakon i tok em i save olsem bai i gat ol salens olsem i kamap long ol sampela plisman husat i gat hait tingting na i save wok klostu wantaim ol ausait lain long traim daunim em. Tasol em bai wok stret na kila long pasin na wok bilong em na i no inap mekim wanpela hait wok.

Em i tok strong olsem sapos em i painimaut olsem ol dispela plisman husat i wok long toktok beksait i pulim na paulim tingting na wok bilong ol junia plisman insait long kantri, bai ol dispela plisman i kisim bikpela mekimsave tru bihainim lo bilong plis fos. Em i no laikim olpela plisman i giaman yusim ol yangpela plisman long hait tingting bilong ol yet na bagarapim

wok bilong ol dispela plisman.

Tupela Deputi Plis Komisina Sam Inguba na Paul Kupo tu i mekim wankain toktok long sapatim toktok bilong Komisina. Tupela i tok olgeta plisman long olgeta hap provins na ol bos bilong ol i sanap strong wantaim yet na wok bilong ol i ron strong yet na i nogat wanpela kain salens olsem i brukim wok bung bilong ol.

Tupela i tok tupela i sekim olgeta seksen bilong tupela long Mande moning na painimaut olsem olgeta plis fos i sanap wantaim yet long karimaut wok bilong strongim na lukautim gut lo na oda insait long kantri.

Komisina Wakon i tok Nesenel Eksekutiv Kaunsil (NEC) long haus palamen i makim em long kamap Plis Komisina na em bai wok olsem Komisina long karimaut wok Gavman i makim em long mekim. Olsem na em i no inap pundau long wanpela ausait toktok na salens nabaut.

Mista Wakon i tok taim olpela Plis Komisina (Peter Aigilo) i bin rausim em olsem Komanda bilong NCD na Sentrel provins, em i no sakim tok. Em i harim tok tasol na muv i go wok long plis het kota. Olsem na ol plisman husat het kota i makim long ol i mas muv i go long nupela wok bilong ol, ol i mas harim tok na bihainim oda. Plis fos em ples bilong bihainim lo na karimaut oda, Mista Wakon i tok.

Ol balus lain no laikim praivetaisesen

BARBARA MASIKE i raitim

NESENEL Elains Emplois Asosiesen (National Airlines Employees Association) i strong yet olsem gavman bai mekim bikpela rong sapos em i go het wantaim muv bilong em long salim ol gavman bisnis.

Dispela asosiesen we i makim ol wokman husat i wok olsem ol graun staf, long kuskus, mekaniks, klining, ketering na sampela long ol menesmen posisen i tokaut strong long wanpela bung long dispela wik olsem ol toktok bilong Praim Minista Sir Mekere Morauta olsem ol pipel bai win aninit long praivetaisesen i no tru na em ol giaman toktok tasol.

Sir Mekere i bin mekim ol dispela toktok taim em i autim ripot Intanesenel Advaiseri grup bilong Praivetaisesen we Pravatiseesen Komiti i endosim pinis.

Dispela ripot i sapatim plen bilong gavman long praivetaisim olgeta bikpela bodi bilong wanpela.

Insait long sampela ripot long dispela wik yet Sir Mekere i bin tok olsem praivetaisesen bai helpim gavman long i gat inap mani long givim gutpela sevis long ol pipel, moa yet ol turangu lain insait long Papua Niugini.

Tasol dispela grup NAEA i bilip strong tru olsem dispela kain praivetaisesen we gavman i wok long subim kam antap long ol pipel em i bilong ol narapela bikpela kantri long wol na i no nap long wok gut insait long Papua Niugini.

NAEA i singaut strong long gavman i mas harim krai bilong em na noken bihainim pasin ol bikpela kantri insait long wol i bin mekim.

Insait long wanpela bung long dispela wik yet, ol mausman bilong NAEA husat i makim samting olsem 800 wokman meri bilong Air Niugini i tok long lukluk bilong ol dispela muv bilong praivetaisesen i kamap gut long iol bikpela kantri tasol na ol liklik kantri i hat tru na ol liklik grasruts pipel i kisim taim wantaim dispela muv.

Ol i tok nau yet Papua Niugini i gat bikpela hevi tru wantaim ol humen risos menesmen na i gat ol sampela politikel bikhet man i stap tu insait long ol dispela bikpela gavman bodi husat i stap long stilim mani bilong ol pipel tasol.

Sampela toktok em dispela grup i mekim i tok olsem ol pipel i tait pinis long dispela kain pasin na politiks bilong Papua Niugini we ol man i wok na kaikai mani ol yet na ino tingim turangu lain.

Ol i tok olsem nau yet long Air Niugini i gat planti hevi i stap na menesmen i no stretim ol dispela wari yet.

Gavman i mas save olsem ol pipel nau i save moa long ol liklik politikel gem bilong ol politiks lain na ol no inap long bikhet nabaut.

NAEA bai sanap strong long makim maus bilong ol planti liklik pipel husat i no nap long toktok. NAEA bai sapatim gavman long kopretaisesen tasol praivetaisesen em i nogat tru.

PNG kisim gutpela save long skelim ol giaman ovasis lain

YAKAM KELO i raitim

PAPUA Niugini i bin bungim ol hevi we ol ovasis manmeri i bin kam insait long kantri wantaim ol giaman pepa bilong ol we ol i stilim o paulim. Mipela i save olsem dispela pasin bai i go bikpela moa taim ol kain kain save bilong masin na ol samting bilong wok i kamap, Seketeri bilong Foren Afeas Dipatmen Evoa Lalatute i tokaut long dispela samting.

Mista Lalatute i ol giaman lain olsem i save mekim ol dispela stili papa i kamap gut tru olsem bilong ol stret na i hat long ol opisa bilong em i luksave.

Ol risos bilong wok wantaim long sekim ol dispela kain samting taim ol ovasis lain i kam long PNG i gat planti wok tru bilong mekim na i no save sambai gut long mekim ol dispela kain wok. Strong bilong mipela long sekim ol dispela kain hevi tu i hat bikos i nogat inap eksperiens wokmanmeri na tu i nogat inap ol teknikel na wokmanmeri husat i save gut long mekim ol dispela kain wok, Mista Lalatute i tok.

Em i tok insait long dipatmen bilong em, ol i wok long traim painim sans bilong opim save bilong ol na kila gut long dispela kain wok.

Tasol em i tok dipatmen bilong em bin wok hat tu long traim holim ol dispela kain man husat i save kam aninit long giaman pepa olsem bilong ol. Olsem na mi laik tok amamas i go long plis dipatmen, Atoni Jenerel, Kastoms na ol balus kampani long kam insait na sapatim ol wokman bilong mi long dispela kain hevi taim i kamap.

Mista Lalatute i mekim dispela toktok long wanpela woksop we Amerika Embesi long PNG i helpim long kamapim long luksave na stretim ol hevi bilong ol ovasis lain i save yusim ol giaman pepa long kam long PNG. Na tu woksop i bilong skulim ol long traim luksave long kain giaman pepa olsem na tu sekim gut ol ovasis pasindia i kam long kantri.

Amerikan Embesi wantaim Jastis Dipatmen, Imigresen na Naturalisation Sevis i bung wantaim long kamapim dispela woksop. Mista Lalatute i tokaut tu olsem dispela woksop i kamap long taim we Minista bilong Foren Afeas i laik glasim gut na sekim na kamapim sampela nupela senis gan long lo bilong ol ovasis lain i save kam insait long PNG.

Kot kisim bek Abajjah olsem Milen Be Gavana

NESENEL Kot long Waigani i givim oda long Dem Josephine Abajjah i mas go bek kisim sia bilong em olsem Gavana bilong Milen Be provins.

Nesenel Kot i mekim dispela disisen bihain long Dem Josephine Abajjah i kisim tingting bilong kot long pasin i bin kamap long em long rausim em long vot i nogat bilip long Milen Be provinsal gavman.

Kot i skelim olsem Titus Philemon, memba bilong Samarai Mururua i bin holim wok bilong siaman long Turisim Promosen Atoriti (TPA) na Gavana bilong Milen Be provinsal gavman wantaim.

Kot i glasim tu olsem i nogat ripot o pepa

we i soim olsem Dem Josephine Abajjah i brukim sampela lo we provinsal gavman i ken rausim em na makim nupela Gavana bilong provins.

Kot i skelim tu olsem lo bilong Provinsal Gavman na Lokol Level Gavman i no stretim gut dispela kain senis we rot bilong senisim Gavana i stap long en.


Olsem na Kot i mekim disisen olsem Dem Josephine Abajjah i mas go bek na kisim wok bilong em we ol pipel bilong Milen Be provins i bin makim em long holim. Dem Josephine Abajjah i bin winim rijinol sia bilong Milen Be provins long kamap Gavana bilong provins long 1997 nesenel ileksen.

Bihain long dispela disisen bilong kot, Dem Josephine Abajjah i tokaut olsem em i amamas long disisen bilong kot na em i askim olgeta Milen Be lida long provinsal na nesenel gavman long wok poroman wantaim na maski long luk pes o stap longwe long narapela. Bikos olgeta lida i gat wok bilong sevim pipel olsem na olgeta lida i mas sanap wantaim long mekim dispela wok.

Milen Be provinsal gavman i bin holim vot i nogat bilip long Dem Josephine Abajjah long las mun na rausim em long sia bilong Milen Be Gavana. Titus Philemon i winim dispela vot na kamap Gavana inap dispela wik we Nesenel Kot i mekim dispela disisen.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea



**Publishing Weekly, Thursday, for
Word Publishing Company Ltd.**

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Ltd.

General Manager and Group Editor in Chief: Anna Solomon. Acting Advertising Manager: Jocko Oberleuter Editor of Wantok: Yakam Kelo.	Papers distributed by air throughout PNG. Available by air mail subscription within Papua New Guinea and overseas. Email address: word@global.net.pg
--	---

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms and conditions are available at Word Publishing Company Ltd. and are set out in full on the reverse side of its official display Advertising Bookings form.

Putim akis long tambu, ol papa graun i tok

FRANCIS ULIAU i raitim

WANPELA grup bilong ol papa graun i skruim gen singaut na askim gavman long rausim tambu long ol timba projek long kantri.

Dispela singaut i bin kam long ol papa graun bilong Baimuru long Galp Provins. Na ol i askim Praim Minista Sir Mekere Morauta, Fores Minista Michael Oglo, Nesenel Eksekutyiv Kaunsil na ol arapela gavman bodi long glasim gen dispela tambu na rausim.

"Dispela tambu i wankain olsem gavman i kisim tamiok na katim ol timba bisnis," mausman bilong Baimuru Asosiesen Sam Kai i tokim ol niuslain.

I gat sampela projek tasol bai go het yet, na tambu ya i no karamapim ol. Namel long ol em tupela projek bilong Galp Provins, em long Hekiko na Vailala TRP blok 1 ekstensen. Ol arapela husat i no stap long tambu i stap long Madang, Isten na Westen provins, Is na Wes Sepik, Wes na Is Nu Briten, Milen Be, Noten, Sauten Hailans, Morobe na Sentrel provins.

Long Novemba 9, 1999. Nesenel Eksekutyiv Kaunsil i bin pasim olgeta nupela timba projek long go het. Dispela i kam aninit long wanpela program bilong Wol Benk.

Dispela program i tok olsem sapos PNG i pasim olgeta nupela laisens na wok bilong ol timba projek insait long kantri insait long narapela 5-pela yia, Wol Benk bai givim kantri \$US40 milien (K126 milien) long wanpela fores na konsevesen projek insait long narapela 6-pela yia.

Wanpela tok save pepa i kam long opis bilong PNG Fores Atorit long Februari 7 i go long olgeta wokman na wokmeri bilong en i tokaut olsem "olgeta wok bilong stretim na helpim na oraitim ol timba projek long go het bai stop inap long taim narapela tok save i kam gen".

Mista Kai i tok dispela tambu em gavman wantaim Wol Benk i kamapim i no gutpela.

"Oli i bagarapim mipela olgeta, na tambu ya i kamap tasol bilong pinisim laik bilong sampela lain politisen na ol wanwok bilong ol."


Long wankain taim tu, mausman bilong ol papagraun long sia bilong Nesenel Fores Bod Michael Paisparea i kros tru long dispela tambu nau i karamapim ol timba projek.

Mista Paisparea i tok i tru olsem i gat as bilong Wok Benk na PNG gavman i mekim dispela, tasol sampela samting i stap insait long dispela tambu i abrusim tru olgeta mak bilong gutpela tingting na stretpela gav-

Ol projek em Gavman i oraitim

PROJEK ERIA	PROVINS	WOK
Josephstaal	Madang	Projek Agrimen i pinis. Wetim PFMC toktok.
Is Awin	Westen	Projek Agrimen i pinis. Wetim kot.
Amanab Blok 1-4	Wes Sepik	Wetim tenda.
Saut Wes Wapei	Wes Sepik	Wetim tenda.
Aitape Is Kos	Wes Sepik	Wetim tenda.
Epril Salumei	Is Sepik	Wetim aweanes/tenda.
Rotlock Be FMA	Wes Nu Briten	Wetim ol toktok.
Asengeng FMA	Wes Nu Briten	Wetim ol toktok.
Is Collingwood	Milen Be	Wetim DOS.
Mikus Tolo FMA	Is Nu Briten	Wetim ol wok plen.
Wipim Tapila FMA	Westen	Wetim ol rot bilong projek.
Ioma Blok 5	Noten	Wetim DOS.
Hekiko	Galp	Wetim ol wok plen.
Kamula Doso	Westen	Wetim FMA toktok.

• Mausman bilong ol papa graun bilong Baimuru Asosiesen long Galp Provins, Sam Kai i toktok long ol niuslain. Foto: ISSAC IKUAVI.



man. "Wol Benk tu i no tingting long kisim pastaim tingting bilong ol biklain bilong fores indastri insait long kantri," em i tok. Dispela em ol kain lain olsem nesenel fores sevis, nesenel fores bod na ol papa graun wantaim fores indastri asosiesen.

Mista Kai i autim tu wankain tingting na tok lukaut long gavman olsem em i no ken bihainim tasol laik na tingting bilong olkain lain olsem Wol Benk. "Bikos, ol dispela lain i no klia long kain laip na sindaun bilong yumi long Papua Niugini.

"Ating gavman tu i no luksave olsem mipela long fores indastri i save baim moa long 60 pesen takis i go long hanpaus bilong ol.

"Na nau taim strong bilong kina i wok long pundaun na prais bilong ol samting i antap tru, gavman i kirap na katim olgeta nek bilong mipela wantaim dispela lo tambu," Mista Kai i tok.

Ol papa graun bilong Baimuru i bin askim tu long wanem as na dispela tambu i no bin karamapim sampela projek eria, na husat tu bai kisim helpim aninit long dispela tambu.

"Mipela laik save tu sapos Wol Benk na gavman bai bekim mani na ol helpim em ol papa graun bai lusim taim ol timba projek long ol hap bilong ol i pas.

"Sapos nogat, ating i mobeta ol i mas baim kompensesen."

Ol projek em NFS i statim aninit long Nesenel Fores Developmen Program

PROJEK ERIA	PROVINS	WOK
Musa Pongani	Northern	Proposed Model FMA. ILG process to conclude.
Middle Ramu Blok 1	Madang	Proposed Model FMA. Pending FMA process.
Nungwaia Bongos	East Sepik	ILG process to conclude. Funded by Parliament Member.
Amanab Blok 5-6	West Sepik	Pending FMA process. To be amalgamated with Blok 1-4.
Vailala TRP Blok 1 extension	Gulf	Pending ILG process.
East Pangia	Southern Highlands	FMA process underway.
Morobe South Coast Extension	Morobe	Pending FMA process.
Kerevat Plantation Forest FMA	East New Britain	Pending FMA process.
North Vanapa	Central	100% Domestic Processing by a Canadian firm.
Cloudy Bay	Central	Pending Project Guidelines.

PNGBC makim Februari 29 long U Vistract

HAUS mani PNGBC beng i wanbel long opim pasbuk bilong U Vistract, Kwik Mani Bisnis kampani. Dispela em bihain long Praim Minista Sir Mekere Morauta i holim miting wantaim ol menesmen bilong U Vistract long las wik Fraide.

Long dispela miting, PNGBC beng i wanbel long opim akaun (pasbuk) bilong U Vistract bai U Vistract i mas putim mani bilong em insait long baim bek ol manmeri husat i putim mani wantaim ol.

Menesing Dairekta bilong PNGBC beng Mista Baliki i tok sapos U Vistract i gat mani tru istap long ova-

sis, beng i givim inap long Februari 29 long U Vistract i mas salim ol dispela mani i kam long pasbuk bilong ol long PNGBC beng. Sapos i nogat luksave o evidens olsem wanpela mani i kam long pasbuk long Februari 29, bai beng i pasim dispela pasbuk, Mista Baliki i tok.

Mista Baliki i tok PNGBC beng wantaim Sentrel Beng i no traim long stopim U Vistract long baim ol manmeri husat i putim mani wantaim ol. Olsem na em i wok bilong U Vistract yet nau long stretim ol kastoma bilong em na wanem samting ol i promisis ol manmeri.

Wewak haus sik bos i nogat asua, bod memba i tok

Wewak haus sik i nogat wanpela hevi long bos bilong em Dokta Linda Tamsen, Ekting siameri bilong Wewak haus sik bod Laura Martin i tokaut.

Misis Martin i mekim dispela toktok long bekim ripot we i tok Sief Eksekutyiv Opisa bilong Wewak haus sik Linda Tamsen i gat dinau long haus sik long mani mak olsem K64,000.

Misis Martin i tok dispela toktok i no tru na em i save olsem kain ripot i bilong giaman bilong bagarapim gutpela wok bilong haus sik na tu bagarapim gutpela wok bilong ol haus sik woka.

Misis Martin i tok dispela mak bilong mani i kamap long ripot em bod i bin stretim pinis ol samting ya wantaim Odita bilong Helt Dipatmen husat i bin mekim wok painimaut insait long fainens bilong haus sik long 1988.

Em i tok posisen bilong Dokta Tamsen olsem Sief Eksekutyiv Opisa (CEO) i wankain olsem Seketeri bilong divisen. Na pe wantaim ol alawens na ol samting em i mas kisim i stap wantaim dispela level bilong wok. Na i nogat wanpela samting i asua long mani em i yusim bikos dispela i bihainim kontrak bilong em long dispela posisen.

Em i tok long Oktoba las yia, 1999, posisien bilong Dokta Tamsen i bin pinis olsem na ol i ksium nupela aplikesen gen. Na Dokta Tamsen i aplai na winim gen dispela posisen bilong em bek. Dispela em ol selesen komiti we Pesenel Menesmen Dipatmen wantaim Helt Dipatmen i mekim. Em yet i bin go sindaun wantaim na luksave long taim ol komiti ya i makim Dokta Tamsen long kisim bek wok bilong CEO long Wewak haus sik.

Em i tok mak bilong mani Dokta Tamsen i yusim olsem K47,000 we i bihainim stret kontrak bilong em. Na wanem ekstra mani em i yusim bihain em Bod i luksave long dispela. Olsem na i nogat wanpela samting i ausa long posisen na wok na mani we Misis Tamsen i yusim.

Ekting siameri Misis Martin i tok em i no laikim tru ol lain i mekim dispela kain ripot long bagarapim gutpela wok bilong haus sik.

Na em i ting dispela ripot i kamap bikos long ol kros bilong papagraun long graun we Wewak haus sik i sanap long en.

Tasol em i ting sevis bilong sevim pipel i mas stap gut na stret na ol arapela tingting olsem i no ken bagarapim long mekim ol pipel bilong Is Sepik provins i kisim taim.



Sinivit LLG pipel kwestenim Provinsel Gavman

WALTER DARIUS i raitim

OL PIPEL na ol komyuniti lida bilong Pomio Distrik i wok long kwestenim pasin we Provinsel Gavman i wokim long tromoim K120,000 long baim ol samting bilong wokim haus long sampela hap bilong distrik.

Ol pipel na komyuniti lida i wari na ol i putim ol askim em ol bilong Sinivit Lokol Level gavman eria.

Sinivit LLG i lukautim ol pipel long saat kos rot stat long Warangoi i go olsem long Putput long Weran na i go daun Marunga long Wide Be eria. Eria ya i gat sampela edukesenel institusen, ol rurel helt senta na ol kokonas na kakau plantesen long en.

Maski eria i gat gutpela rot we ol i save lukautim gut na stretim long olgeta taim, ol pipel i save bungim hevi long raun na kism ol samting bilong ol long salim long taun na

wof taim bikipela ren i kamap. Na hevi i save go nogut taim tupela bikipela wara long eria i tait.

Olpele presiden bilong Sinivit LLG Eremam Tomete long dispela wik i tok Is Nu Briten Provinsel Gavman i wokim bikipela asua long wokim bris long Totongpal insait long Pomio Distrik bikos ol pipel i no gat nit tumas long en.

Na mani gavman i tromoim long wokim dispela bris em K4 milien. Em i tok ol pipel husat i stap long Palmamal stesen eria na ol ples insait long bikipels Pomio i no nitim dispela kain samting yet.

Mista Tomete i tok i moabeta long gavman i givim bikipela tingting long ol eria olsem

Sinivit we ol pipel i save kamapim kopra, kakau na ol arapela kes krop.

Na maski long tromoim na westim bikipela takis mani bilong pablik long ol eria we provins i no inap long kism wanpela gutpela samting kwiktait.

Presiden bilong Sinivit LLG Levi Orong i tok taim em i wanbel wantaim Mista Tomete i tok ol pipel long konstituensi bilong em i no klia watpo na Gavana Francis

Koimanrea i no laik givim ol helpim tumas na em i lukluk moa long ol pipel bilong em husat i stap long eria we i nogat ol samting tumas long kamapim mani long go hetim provins.

Mista Orong i tok Sinivit LLG i gat 8,000 pipel long en na i moabeta long gavman

long helpim ol long skruim ol progrem bikos planti bilong ol em ol agrikalsa fama.

Tupela Mista Orong na Tomete i tok saat kos i laikim moa wok long stretim ol rot na bris.

Ol i luksave long gavman i tromoim pinis mani long ol wok long eria tasol i gat nit long wokim moa bris long ol bikipela wara we i save kamapim hevi long taim bilong bikipela ren.

Ol i tok Wara Merai na Unung i save tait na kamapim hevi na gavman i mas wokim bris long ol bikos ol pipel i save yusim disperla rot we tupela wara i stap long en long karim kakau na kopra bilong ol i go ples bilong salim.

Tupela lida i singaut strong long gavman long glasim gut ol praioroti bilong em na tromoim man long kamapim ol developmen long ol eria we i gat ikonmik benefit long en pastaim. Na bihain em ken lukluk long ol arapela eria.



Telipon long Buka i aut

WOK LONG salim toktok i go na i kam long Buka i aut bikos ol papa graun i gat hevi long graun we ol telepon masin na ol lain bilong Telikom i stap long en.

Ol ripot i tok ol bisnis lain, gavman na pablik long Buka i no inap long salim o kism tokok long ol narapela hap bilong kantri na wol bikos ol telipon, feks masin na ol arapela rot bilong salim na kism tok i no wok.

Ol bisnis haus long Buka i wari tru bikos bisnis bilong ol i kism taim tru long dispela hevi.

Rijnel Manesa bilong Telikom bilong Ailans rijen Raphael Kupe i tok Telikom i no inap long wokim tumas wanpela samting bikos ol papagraun long Maun Notuko we ol masin i stap long en em ol i putim strongpela toktok lukaut long ol wokman bilong Telikom long noken go klostu long eria.

Lidameri Bogenvil kism namba

VERONICA HATUTASI i raitim

WANPELA meri Bogenvil bai i kism namba wantaim 35 narapela manmeri long kantri bihainim luksave em i kism long wok bilong kamapim gutpela sindaun long Bogenvil.

Nem bilong meri em Theresa Jaintong na em i bilong ples Arawa long Sentrel Bogenvil. Em i wok olsem Presiden bilong Bogenvil Provinsel Kaunsil bilong ol Meri.

Nem bilong Mis Jaintong i stap long lista bilong Kwin we em i givim luksave long ol manmeri husat i givim bikipela sevis long wok na laip bilong ol insait long ol komyuniti, pipel na kantri.

Mis Jaintong i kism namba na medal bilong Oda bilong Bilong Britis Empaia (OBE) long luksave long sevis we em i givim long wok bilong painim gutpela sindaun, na edukesen long Bogenvil.

Mis Jaintong taim em i harim nius long luksave namba i tok dispela i no bilong em tasol, nogat.

Em i tok luksave i go long olgeta meri Bogenvil husat i bin mekim bikipela wok long kamapim gutpela sindaun na olsem em bai serim dispela namba wantaim ol.

Em i tok planti meri Bogenvil i bin hat-wok long kamapim gutpela sindaun long ailan tasol bikos i nogat inap medal long olgeta wan wan i kism, ol bai serim dispela wanpela we em i kism.

Em i tok planti meri i mekim bikipela wok tasol ol i no pairap nabaut tasol ol i mekim wok isi we nau i karim kaikai long en.



Leit Bogenvil Primia Theodore Mirung na meri lida bilong Bogenvil i kism namba, Theresa Jaintong.

Em i tok i no isipela wok long ol meri long kism dispela kain namba olsem tasol dispela namba i soim olsem ol meri i kism luksave long wok ol i mekim long kamapim gutpela sindaun long Bogenvil.

Mis Jaintong i bin wok wantaim Bogenvil Kopa kampani bipo long hevi i kamap long ailan 12-pela krismas i go pinis. Wok tru bilong en we em bin tren long karimaut em sosel wok.

Wantaim BCL, em bin wokim dispela kain woklong ol yia long 1970s.

Olsem developmen opisa em bin lukautim olgeta skolaspis sumatin we BCL i save sponsorim insait long kantri na ausait. Em bin save lukautim ol pilai spot long ol wok manmeri bilong kampani.

Mis Jaintong em i wanpela meri lida long Sentrel Bogenvil na ailan na taim

hevi i wok long slek na ol i kamaut long ples hait, em bin skruim gen tingting long helpim ol meri na wok bilong kamapim gutpela sindaun long Bogenvil.

Aninit long Provinsel Kaunsil bilong ol meri, ol bin kirapim ol distrik kaunsil bilong ol meri long skruim ol wok bilong painim gutpela sindaun.

Na ol i karimaut ol progrem bilong helpim ol mama na pikinini husat i stap long hevi, ol dispela we man na papa bilong ol i bagarap long taim bilong hevi, edukesen, hevi bilong hombru, lo na oda na karimaut ol arapela progrem bilong helpim famili, meri, pikinini na komyuniti. Dispela ol wok kaunsil i karimaut wantaim helpim bilong ol arapela meri na sios grup.

WANTOK

NIUSPEPA BILONG YUMI OL PAPUA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579
email: word@global.net.pg

PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00



Rais projek long Keravat haus kalabus

KERAVAT haus kalabus insait long Is Nu Briten i bin kism namba wan kaikai long rais we em bin planim long las wik.

Planim rais em wanpela long ol agrikalsa projek we ol atoriti long haus kalabus long Keravat i strongim ol kalabus lain long go insait long en. Em i hp long spesel rihabilitesen progrem we komanda bilong haus kalabus Kelly Karella i bin kirapim long 300 kalabus lain husat i stap long Keravat haus kalabus long dispela taim.

Ol atoriti long Keravat haus kalabus i laikim kalabus long groim inap kaikai na kumu na ol arapela fres kaikai. Long wankain taim tu ol kalabus manmeri wantaim i mas lainim sampela skul long sait bilong wok gaden na faming na bai dispela i helpim ol long painim wok taim ol i lusim haus kalabus.

Mista Karella i tok dispela rihabilitesen progrem em i namba wan taim long dispela kain projek i kamap long wanpela haus kalabus insait long kantri.

Em i tok bikos long dispela, em i laikim bai progrem ya i go gut long Keravat.

Wantaim dispela liklik faming pro-

jek, haus kalabus i gat trening skul long lukautim ol kakaruk na pik na ol meri i gat skul long bekim bret.

"Dispela em nupela samting na mipela i bilip strong olsem gavman na pravit sekta i mas givim sapot bilong ol long en. Bikipela as tingting em long lusim pasin bilong katim gras we ol kalabus lain i save wokim long olgeta de na ol arapela wok we ol kalabus-lain i save mekimna putim moa ming-long long laip bilong ol kalabus lain.

"Dispela i gutpela rot na mi ting olsem gutpela samting bai i kamap long tingting bilong ol kalabuslain na komyuniti tu.

"Ol kalabus manmeri i olsem yumi ol fri man tasol na sapos yumi givim luksave long ol.

"Sapos yumi mekim ol olsem ol animel, ol bai givim yumi wankain trit-men taim ol i lusim haus kalabus long bihain taim," Mista Karella i tok.

Ol bin kism 200 bek long 25 kilogram bek rais long fam o gaden rais bilong Keravat haus kalabus lain. Provinsel DPI i bin redim, rausim skin na ol arapela pipia bilong en na salim i go bek long Keravat long kukim bilong ol prisina. Haus kalabus bai i sevim mani taim em i kism na yusim rais long gaden bilong em yet

Nupela skul i op long sunami eria

ADAM ELLIOT i raitim

HAI Komisina bilong Australia Nick Warner i bin opim nupela Areeki komyuniti skul insait long Aitape long las wik Fonde. Dispela em namba tu nupela skul i op long eria we sunami o hevi bilong bikpela solwara i bin bagarapim long tupela krismas i go pinis. Moa long 1,000 manmeri na pikinini we i karamapim ol intenesenel ges na ol bikman long nesanel na provin-sel level.

Aitape Daiosis Rihabilitesen Komiti i bin sanapim tripela dabel klasrum na siksipela haus tisa insait long 10-pela mun.

Aseki komyuniti skul i gat 250 sumatin long en.

Hetmasta Jack Bruno long taim bilong opening i bin tok nupela skul ya em i olsem namba wan rot we ol pipel bilong Malol i sanap long en taim ol i stretim gut sindaun bilong ol bihain long bagarap we sunami i bin kamapim klostu tupela krismas i go pinis.

"Skul i makim nupela stat long ol

pikinini bilong mipela. Dispela em namba wan hap long nupela laip bilong mipela. Em i gutpela na strongpela na bai mipela i bildim

fuja bilong mipela long dispela skul," Mista Bruno i tok.

Ol ges we i binstap long sere-moni i bin makim gavman bilong

Australia, Roteri Klub, Provinsel na Lokol Level Gavman na Siaman bilong Aitape Daiosis Rihabilitesen Komiti.

Ol lain we i bin putim mani long sanapim nupela skul ya em long AusAID, Caritas na Roteri Intenesenel. Ol lain Roteri bilong Australia i bin wok long Areeki long sanapim dispela skul.

Gavman bilong Australia i bin tromoim K70,000 long sanapim skul ya.

Mista warner long ol toktok bilong em i bin tok em i amamas long lukim olsem ol pipel i wok long kisim helpim mani we Australia i givim.

"Ol projek olsem i gutpela bikos em i helpim ol pipel tru na tu i gat as bikos ol bin bungim bikpela hevi na bagarap. PNG em i stap klostu long Australia na gavman bilong Australia i save givim mani inap long A\$300 milien long AusAID bilong yusim long helpim PNG. Na samting we yumi kam long em tude em i wanpela long ol gutpela helpim projek na mi amamas long stap long dispela sere-moni," Mista warner i tok.

I bin gat bikpela kaikai na singsing long amamasim opening.



• Ol skul sumatin i sanap long asembli long opening bilong Aseki Komyuniti Skul, Aitape - Sandaun provins.

Sapot long senisim pes bilong Vanimo haus sik

KLOSTU olgeta seksen insait long Vanimo Jenerel Haus Sik i nogat inap spes bilong wok, putim ol masin, opis spes bilong ol wokmanmeri na ol arapela man.

Chris Albert i mekim dispela tok long sapotim toktok bilong mausman bilong Vanimo haus sik George Kango. Em i bin tokaut olsem planti samting long haus sik i no stap stret long ples bilong ol. Long mekim ol wokmanmeri i sindaun na slip gut.

Albert i tok wanpela bikpela eria VGH Bod i mas lukluk klostu moa em haus slip na gutpela sindaun bilong ol lain bilong wok. Bihain long dispela, ol i mas go aut long kisim moa skul na trening long wok bilong ol. Na ol bosman i noken autim tok long ol wokman i no save wok gut sapos ol dispela bikpela samting i no stap long ples bilong ol.

"Bai i no asua bilong ol wokmanmeri sapos ol i no

sekim gut wok bilong ol. Ol bos bai i kamap ol krangi lain sapos ol dispela samting i no stap long ples bilong ol.

"Nogat gutpela haus na sekyuriti, ol wokman i no inap wok gut. Nogat trening na save bilong mekim wok bihainim ol nupela senis i wok long kamap long dispela taim. Ol opisa bai bungim hevi taim ol i mekim wok bilong ol. Ol wokmanmeri mas go kisim trening long save bihainim ol nupela senis bilong tede", Chris Albert i tokaut long Wantok.

Mista Albert i givim bikpela sapot long George Mangc taim em i tok olsem memba bilong Vanimo Green Micah Wes i mas givim mani long sanapim sampela nupela wod. Bikos sampela olpela "1942 wod" i sanap i stap yet we i mekim lukluk bilong Vanimo haus sik i no stret. Em i go het na i tok Sandaun i wok long kam baksait tru long olgeta arapela provins long sait bilong developmen.

Bikos ol lida, bikpela tru ol memba bilong Nesanel Palamen i nogat gutpela tingting long wokbung wantaim long gutpela bilong provins.

Em i go het na i tok komyuniti long Vanimo i mas amamas bikos long taim Micah Wes i bin stap olsem Helt Minista bihain long ileksen bilong 1987, em yet i as bilong sampela senis i kamap long Vanimo Jenerel haus sik. Na ol lain memba husat i kam bihain long em i no go het long kamapim senis taim ol i winim ken ilkesen long dispela tem.

Mista Albert i tokim Wantok olsem VGH i mas gat ol speselis dokta na ol nes bihainim ol senis i wok long kamap tude.

Em i tok tu olsem Sandaun Provinsal Gavman i mas tingting long mekim sampela samting long mekim Misin Haus Sik long Aitape, Raihu i kamap olsem namba tu haus sik insait long provins.

Vanimo plis rabisim ripot bilong tupela ovasis man

PLIS long Vanimo i "rabisim" ol ripot we i tok tupela ovasis man insait long Vanimo long las yia i bin hensapim ol Papua Niugini man wantaim ol strongpela gan. Provinsal Plis Komanda Sief Inspekta Eugene Manguva i mekim dispela tok long taim em i tokaut olsem opis bilong em i no kisim wanpela kain ripot olsem las yia. Na ol lain husat i mekim ol giaman tok olsem inap kamapim sampela kain hevi na trabel insait long komyuniti.

Inspekta Manguva i tokim Wantok olsem, kain ripot we i sutim tok long ol ovasis lain i stap insait long ol kain trabel na pasin nogut, ol plis i no save westim taim

long mekim wok painimaut bihainim ol ripot taim i kamap long plis stesin. Em i go het na i tok rekot bilong plis i no soim wanpela ripot i toktok long dispela tupela trabel ovasis man bikos i nogat man i ripot long dispela.

"Long tok olsem ol forena i hensapim ol lain bilong mipela, dispela em i bikpela samting tru, plis i no inap westim taim. Plis bai hariap tru sekim ol bikpela toktok olsem taim ripot i kamap long plis stesin.

"Nogat. Dispela tupela trabel ol i toktok long en plis i nogat rekot long ol olsem na plis i tok dispela samting i no bin kamap na ol ripot ya i no tru," Provinsal Plis Komanda i tokim Wantok.

Wantok i save olsem dispela ripot i stap pinis long han bilong narapela otoriti insait long gavman yet. Na ol opisa bai karimaut wok painim sapos wanem samting plis i tok long en i tru o nogat.


Ol ripot i tok tupela trabel ya, wanpela i bin kamap long Vanimo Is Kos Rot. Taim narapela i bin kamap insait long wanpela opis insait long taun yet. Tupela wantaim i bin kamap bihain long wanpela toktok pait i stap namel long tupela ovasis man ya na 3-pela papagraun bilong Vanimo TRP.

Ripot i tok bihain tasol long dispela ol trabel, ol i bin ripotim dispela i go long plis long Vanimo.



Morobeek
BEEF CRACKERS

IGAT kick!



HEPI BIRTHDAY

25% MORE

5 BISKETS INSIDE-1 FREE

Katolik Sios opim nupela praivet haus sik long Mosbi

Helen Rei i raitim

NUPELA Praivet haus sik bilong Katolik Sios long Mosbi i op nau long pablik long go long en.

Oi i kolim dispela haus sik long Sen Mary's Medikol Senta na i stap long 4 Mail long Boroko.

Sios i bin lusim K2 milien long sanapim dispela haus sik.

Oi bin sanapim klinik bihainim apil we Apostolik Nunsio Hans Schwemmer i bin mekim long Katolik Sios long PNG i mas gat praivet haus sik bilong em yet.

Tingting long sios i sanapim wanpela praivet haus sik i bin kamap taim bikpela san i bin bagarapim na kamapim hevi long PNG long 1997. Long dispela taim, sios i bin sot long mani na planti helt sevis we sios i lukautim i bin pas tasol wantaim praivet haus sik,

ol dispela sevis bai i go het long olgeta taim.

Long skruim apil, ol wan wan lida bilong Katolik Sios olsem Asbisop Karl Hesse husat i siaman bilong medikol senta, Bisop Michael Mire bilong Hagen, Bisop Henk Kronenberg bilong Bogenvil na Steven Lawrence husat i Jenerel Seketeri bilong Katolik Bisops Konprens i bin sindaun na wokim ol tingting na plen bilong klinik ya.

Oi bin wokim plen long dispela haus sik long stat bilong las ya na wok bilong sanapim bilding i bin stat long mun Ogas.

Cannosa Hau sik long HongKong i bin givim bikpela hap mani long mekim dispela wok long sanapim praivet haus sik ya.

Tupela bisnis man em Soekandar Tjandra na Henry Tse

husat i dairekta bilong medikol senta i bin go pas long lukautim ol wok long sanapim haus sik ya.

Haus sik i no pinis gut tru yet tasol em bin op long pablik long kisim sevis long en long las wik.

Pe em i go olsem, bilong lukim dokta, ol PNG sikman bai i peim K20 konsaltesen fi taim ol ausait kantri lain bai i peim K30 long lukim dokta.

Faipela praivet dokta husat bai i wok long haus sik ya em long Dokta Sylvester Lahe, Dokta Pulotu Lautofa husat i dokta bilong ol sik i kamap long yau nus na nek, Dokta Sharp Eliza (Jenerel praktisi-na), Dokta Manuel Momongan na Dokta Luhua Li husat i dokta bilong Obstretriks na ginekoloji o dokta bilong ol meri.

Oi dispela dokta bai wok sif long de na nait. Tupela dokta bai i wok

long wanpela de. Planti bilong ol dokta ya i gat praivet klinik bilong ol yet tasol ol i laik givim sevis bilong ol long sariti na ol bai givim sampela taim bilong ol long wok tu long klinik ya.

Cannosa Haus sik long HongKong bai givim ol masin long nupela klinik olsem sariti donesen bilong em. Dispela em ol samting olsem ol fenitja, ol bet long haus sik, ol sia bilong ol dentis na siklain na ol arapela masin na ol samting bilong yusim long glasim ol sikman long en.

Klinik bai kisim ol outpesen siklain we i min olsem bai nogat siklain i slip long haus sik ya. Em bai op tasol long san tasol ol dispela i laikim sevis long nait bai i mas wokim apoinmen.

Long ol wikde, haus sik bai i op long 8 kilok moning inap long 5

kilok apinun. Long Sarerem haus sik bai i op long 8 kilok moning na pas long 12 kilok belotaim. Long sande, em bai i save op long 10 kilok inap long 12 kilok belo taim.

Haus sik ya i gat bekap laboretorial sevis na dispenser we i gat ol marasin long en. Ol atoriti i tingting long kisim X ray na CT-sken masin long senta tu.

Haus sik ya bai i ken kisim ol mama husat i laik karim pikinini na ol operesen tasol em bai kisim paisens pastaim long dispela.

Medikol senta ya i no wanpela ogenaesen we bai i wokim profit o winmani, nogat. Mani we em i wokim em ol bai yusim long helpim ol dispela siklain husat i laikim moa tritmen long ovasis.

Seremoni bilong blesim haus sik na opisel opening bai i kamap long mun Septemba.

Brisben bai lukautim bung bilong ol bisop

OL SAUT Pasifik Angliken Bisop long neks wik bai sindaun long wanpela bung bilong ol long Brisben, Australia.

Dispela em wanpela spesel miting long redim narapela bung bilong ol we bai i kamap long neks ya. Em long Patnas long Misin (PIM) we bai i kamap long neks ya. PIM i bung namel long ol ovasis sios patna husat i save bung long toktok long ol samting i karamapim ol pastorel wok insait long sios long rijen.

PIM bai lukluk tu long ol hevi olsem marit na ol famili. Sios bai i wok long kamapim wankain polisi long lukluk na edresim ol dispela samting.

SPAC konprens bai i stat long Februari 21 na pinis long de namba

25. Bung ya bai kamapim taim na ples we PIM bung bai kamap long neks ya. Ol bisop i makim Angliken Sios long olgeta kantri insait long Pasifik, ol Melanisen provins bilong Solomon Ailan na PNG, Polinesia, Fiji na Tonga.

Foapela Angliken Bisop long PNG husat bai i makim kantri long SPAC bung ya em long Asbisop James Ayong bilong Aiporongo Daiosis, Bisop Reuben Tareambari bilong Popondetta, Bisop Tevita Talanoa bilong Dogura Daiosis na Bisop Michael Hough bilong Mosbi.

Niugini Ailan rijen i nogat bisop tasol Asbisop Ayong husat i lukautim bisop bai makim ol.

Bung bai bai helpim tu ol lain long painim gutpela etvais na tu painim

ol arapela rot long sapatim Angliken Sios insait long Pasifik.

Bai i gat tu narapela woksop long taim bilong bung na dispela bai karamapim ol ministri na pastorel wok insait long ol provins. Wanpela pater bilong Inglan bai go pas long dispela woksop.

Asbisop Ayong i tok PIM konprens bai i bikpela moawinim SPAC bung bikos bai i gat ol pater, bisop na ol arapela sios woka i stap insait long en.

Angliken Sios i gat tripela haus long en. Dispela em long haus bilong ol bisop, ol leiti i min olsem ol sios woka na ol kleji we i karamapim ol pater na bruder.

Famili Laip Program long Aitape Daiosis go gut

Adam Elliott i raitim

FAMILI Plening na Katolik Sios long planti taim i no save wok bung gut wantaim tasol long Aitape, em i narapela stori. Tupela grup i wok bung gut wantaim. Tupela marit bilong Fatima i wok long skruim toktok olsem sapos yu gat liklik famili, ol bai stap gut na amamas.

Sister Francoise bilong Oda bilong Misinari bilong ol Fransiskan long Imakulet Konsepsen i bin kirapim Famili Laip Program long 20 krismas i go pinis. Na program ya i wok long skulim ol pipel long Aitape Daiosis long rot bilong plenim na lukautim gut ol famili bilong ol. As tingting bilong ol em long bildim gutpela, strongpela na heliti komyuniti.

Long las ya, Sister Fran i bin lukim olsem bihain long em i lukautim program ya insait long 20 krismas, em i taim long nupepal lain long tekova. Olsem na em bin painim tupela marit, Bernard na Anna Taingal bilong ples Fatima long tekova na skruim wok ya.

Bernard i wanpela skul tisa tasol em i tok em save gat bikpela laik long mekim dispela kain wok. Em i tok program ya i bilong skulim ol pipel long karim Kristen mesej insait long famili.

Bernard na meri bilong em Anna i bin sindaun long namba wan Famili Laip kos long 1991. Sister Fran i bin holim kos long Fatima yet. Dispela kos i karamapim ol eria olsem strongim marit na tu skulim tu pasin bilong spesim pikinini, bihainim ovulesen metod o taim insait long wan wan mun we i seif o orait na nogat long slip wantaim patna.

Bihain long ol i pinisim kos,

Bernard i bin wok yet olsem tisa na fil edukesen opisa tasol em bin helpim tu long karimaut Famili Laip program long taim em i pinisim ol arapela wok bilong em. Stat long las ya, em na Anna i wok ful taim insait long dispela program.

Mesej long tupela i isi tasol program ya i kamapim planti gutpela samting. Anna i tok tupela i givim sapat long ol papamama husat i laik lukautim na menesim gut famili long bihainim Kristen modol.

"Famili laip i bikpela samting bikos bipo yu go insait long komyuniti, yu mas stap gut long famili bilong yu yet pastaim. Wanem kain manmeri yu kamap long bihain taim em as i stap long famili na ol stiatok we famili i givim long ol pikinini," Anna i

tok.

Em i tok long tude, i mas gat gutpela lidasip insait long famili.

"Sapos famili i gat gutpela lida i go pas na ogenaism gut famili, em bai kamapim ol gutpela pikinini husat bai tingting gut na karimaut ol gutpela samting.

"Long dispela taim, PNG i wok long gat bikpela hevi long ol raskol pasin tasol sapos yumi gat gutpela famili laip, em bai helpim long daunim o stapim dispela," Anna i tok.

Bernard i tok long PNG, planti pipel i wanbel long dispela kain tingting olsem ol papamama i amamas long ol pikinini i kamap olsem ol gutpela memba long famili, komyuniti na sosaiti. Na dispela tu i wokim pasin long kamap olsem papamama i moa gutpela na skruim gut tu sindaun insait long famili.

"Mipela i givim sans long ol marit i glasim gut gen marit laip bilong ol. Mipela i givim ol nupela aida o tingting we ol no bin gat pastaim," Bernard i tok. Mipela i askim pipel long tingim olsem pasin bilong pogivim wanpela arapela i bikpela samting. Na ol noken mas pulim belkros bilong ol i go long narapela de.

"Mipela i skulim ovulesen rot long spesim pikinini. Tasol dispela em bihain ol i klia gut na luksave long wanpela arapela long marit laip bilong ol. Kos i save kisim wanpela wik na i karamapim ol samting we kos i laik karimaut insait long dispela wanpela wik.

Katolik Sios i tok orait long ol memba bilong em long yusim ovulesen metod long famili plening bilong ol. Em i naturel rot long spesim pikinini. Tasol yu mas save long rot we bodi i wok long en na ol kain senis we i save kamap na tu aweanes long taim meri i ken karim bel.

Anna i tok planti lain i luim olsem bikpela famili em i blesing bilong Bikpela.

"Ol papamama i laikim ol pikinini long kisim ples bilong papa na kisim graun. Na bihain taim papamama i lapun, em i wok bilong ol pikinini long lukautim ol.

"Long dispela taim long PNG, em i hat long gat planti pikinini na lukautim na inapim ol gut long ol samting. Ol trangu, mama i save wok hat tru. Ol no save slip na kaikai gut. Ol papa tu i mas hatwok long painim mani bilong lukautim famili. Mipela i no skulim tasol ol famili long spesim gut pikinini tasol long tupela marit i luksave long wanpela arapela long pasin bilong bihainim ovulesen rot bilong famili plening," Bernard i tok.

Oi Sios lida sindaun long autris trening

TETI pipel long Nesanel Kapitel Distrik na Sentrel provins i bin stap insait long faipela de trening woksop long Baibel Trening Asosiesen hal long Mosbi las wik.

Kos ol i wokim i sut long evanjelaisesen.

Oi lain husat i bin stap long kos i kam long Yunaited, Angliken, na Katolik Sios, Salvases Ami na Strit

dispela ministri. Modereta bilong Yuniatet Sios Reveren Samson Lowa i holim wok olsem siaman.

Reveren Lowa i tok tingting bilong EE em long helpim ol sios long mekim ol Kristen i go aut na autim Gutnius long ol ples, haus, long rot na ol strit, opis na olgeta hap.

Em i tok ministri i wok long karamapim planti ples na inap nau,

long Kraus.

Em i tok olsem wanpela pater bilong Lotu Angliken na em i save givim semon long ol Sande, em no bin save kisim gut tingting bilong ol pipel inap long em i stat long go long ol kain woksop olsem.

I gat tupela woksop level, wanpela bilong ol bikpela manmeri na narapela em i bilong ol yangpela.



• Oi lain husat i bin sindaun long EE woksop long Mosbi las wik. Foto: Helen Rei.

Ministri, wanpela grup we ol lain bilong ol kain lotu i stap insait long en.

As tingting long dispela woksop em long trenim ol ministri, ol pasto na ol lida husat bai i trenim ol arapela lida long ol lidasip ministri.

Reveren Rod Story husat i dairekta bilong Evanjelism Eksposen (EE) long Oseania rijen i bin go pas long dispela kos.

Dairekta bilong EE long PNG Walo Alu i tok dispela ministri em ol kain lotu i ken go insait long en na em i gat bot we i save lukautim dispela wok. Ol bod memba i makim wan wan sios we i stap insait long

em i stap pinis long Popondetta, Misima, Ramu, Madang, Lae na Rabaul. Hetkota i stap long Mosbi.

Mista Alu i tok ol sios husat i laikim moa nius long dispela i ken toktok long Reveren Lowa long en.

Patewr Denny Gula bilong Sen Mary's Angliken Sios i tok planti pipel i laik serim ol tingting bilong ol long Jisas tasol ol no save wanem rot ol bai bihainim long wokim dispela. Na kos ya i strongim ol long lainim ol step bilong karimaut evanjelaisesen. Tingting em long pasim spes namel long ol wan wan manmeri bilong mekim ol i stap insait long ol samting we bai i pulim ol i go

Woksop bilong ol yangpela bai kamap long mun Novemba na narapela gen bilong ol bikpela man bai kamap long mun Jun long dispela ya.

Mista Alu i tok ol sios i ken wok bung wantaim na daunim banis we i save stap namel long ol.

Olsem hap bilong trening, ol lain long kos i bin kiism ol matriel olsem ol buk na pamplet long ritim na kisim moa save long EE ministri. Ol bin go aut long ol strit na long ol wan wan haus bilong skruim save long ol samting we ol i lainim long en.

Hailans Nius

MELPA sios em 13 seken bilong ELC-Hagen Distrik, Rev Rapa i tok

YAKAM KELO i raitim

As bilong kros insait long ELC-PNG Hagen distrik we nem MELPA i kamap i no stap long tupela man i resis long lidasip bilong ELC-Hagen Distrik na ol kristen i vot long dispela. Nogat. As bilong hevi i kamap long opis bilong lida bilong sios long Hagen long pasin bilong stil na paulim mani bilong Hagen Distrik sios, Hagen Distrik Presiden Reveren Zau Rapa i tok.

Reveren Rapa i tok ol save-man long mani i painimaut na tokaut long ai bilong sios bung bilong Hagen Distrik Kaunsil na kaunsil i luksave pinis long hevi i kamap insait long wok bilong lida bilong sios long Hagen. Na bung i wanbel na saspem lida i stap long painim rot bilong stretim hevi bilong lida.

Reveren Rapa i tok i gat tripela wik i stap yet bilong ELC-Hagen Distrik konfrens bai i kamap. Insait long dispela tripela wik, nau pasin politiks na toktok bilong man i raun long soim man yet olsem i nogat rong na sutim tok i go long arapela. Na dispela i as bilong rong we pasin biktain na biknem i kamap strong abrusim

olgeta gutpela na stretpela rot na pasin bilong stretim man i mekim rong.

As bilong bruk long 1985 long Distrik Konfrens long Koim viles em dispela, em i tok. Sampela lain deliget i tok long olupela lida i mas stap bek na sampela lain i no laikim olupela lida i stap bikos hevi bilong mani i kamap long opis bilong lida na i nogat tok yet long stretim, Hagen Distrik Presiden i tok.

Nau tok pait i kamap na hari-apim siaman bilong konfrens na mi yet i stap siaman na konfrens i no ron gut. Mi tokaut bipo long vot olsem dispela vot bai abrusim polisi bilong sios na bai i nogat strong. Bikos hevi i no stret. Na tru olsem man i tok ol i vot long lida i stap bek 84 na ol man i no laikim em 66. Tasol hevi i kamap, pasin bruk i kamap long wanem hevi i no stret yet na bai olsem wanem long stretim dispela ol pasin bilong stil na paulim mani bilong sios long ai bilong kristen manmeri?. Mi yet tu i no wanbel long pasin bilong man i laik karamapim stretpela rot bilong sios.

Reveren Rapa i tok hevi bilong bruk i stap 11-pela yia olgeta. Sios i no lusim Hagen Distrik long stretim hevi. Em i hait tok long

skelim na save long as bilong hevi na as bilong pasin bruk bilong sios long Hagen i kam na long 1995 sios i tok yesa long ELC-Hagen Distrik i ken wanbel na bung wantaim long kirapim sios.

Mi laik tok klia long olgeta kristen manmeri long ELC-Hagen Distrik na PNG, MELPA em i wanpela bilong ol 13 seket i stap insait long Hagen Distrik. Sampela man i toktok nabaut long nius na long maus long MELPA i laik bruk lusim bikpela sios ELC-PNG, dispela tok i no tru na yumi noken mekim. Mi gat bikpela wok long bungim sipsip bilong Hagen aninit long wanpela Distrik na i no inap wanpela lain i tok long ol yet i bruk lusim bikpela sios. Mi askim olgeta pasto bilong ELC-Hagen Distrik i mas wok bung wantaim long bungim ol sipsip bilong God long wanpela banis tasol na i noken ting long biknem na brukim ol manmeri bilong God. Olgeta pasto bilong ELC-Hagen Distrik i mas aninit long tok bilong sios na wok wantaim Distrik Presiden long rausim krangki bilip na pasin i wok long paulim ol kristen long Hagen Distrik na mekim wok long autim tok tru bilong God, Reveren Zau Rapa i tok.

Ples lain kilim ol raskol long Sauten hailans provins

SAMPELA ples lain i bin banisim wanpela haus ol raskol lain i slip long en na laitim paia na kukim ol. Sampela i laik ronawe tasol ol ples lain ya i sutim ol long sotgan na kilim ol. Tripela biknem raskol lain i dai na wanpela i kisim bikpela bagarap na ronawe. Nogat plisman, plis i no holim wanpela man, nogat kot na nogat man i kalabus. Dispela samting i bin kamap long wanpela ples long boda bilong Tari, Komo na Korobe distrik long Sauten Hailans provins long las mun, Katolik Daiosis opis long Mendi i tokaut long dispela wik.

Ol manmeri i les pinis long ol raskol i save hensapim ol na birua long ol. Olsem na ol i kisim lo i go long han bilong ol yet, ripot i tok.

Planti ripot i kamap pinis long planti raskol pasin i bin kamap long Sauten hailans. Long sampela eria lo na oda i nogat tru na trabel i moa yet. Dispela i bikpela samting insait long provins, ripot i tok.

Ripot i askim, bilong wanem na i gat planti yangpela man long ples tasol ol yet i tanim bek na bagarapim pipel bilong ol yet na kamapim raskol pasin. Na bilong wanem as na dispela hevi i kamap bikpela tru insait long Sauten hailans long sotpela taim tasol.

Ripot bilong Katolik opis long Mendi i tok ol i save harim ol manmeri i tok, ol politisen lida em ol lain husat i gat sans long lukautim mani

bilong pipel. Wantaim ol pren na poroman bilong ol, ol i stap insait long banis we mani i isi long ol i kisim, gat naispela ka, slip long hotel na raun long ovasis. Ol politisen i kisim gutpela laip na lusim tingting long ol grasrut manmeri. Ol i tok liklik mani tru i save kamap long ples. Olsem na ol bikman wantaim planti mani i save kisim moa. Ol yut i save belhat na kros na mekim ol trabel, yusim sotgan na birua long ol manmeri long kisim ol samting ol i laik kisim we ol i tok, em skel bilong ol. I nogat narapela rot, Katolik opis long Mendi i tok.

Tasol Katolik opis i tok dispela toktok bilong ol manmeri i tru o i no tru, ol i no klia tumas. Tasol sapos ol politiks lida i no wok klostu wantaim ol pipel long ilektoret na bringim divelopen na sevis long ol pipel, bai dispela kain tingting nogut i kamap yet.

Katolik opis i tok ol turangu liklik manmeri, ol liklik bisnis lain long ples, ol lain bilong salim kopi bilong ol long kisim liklik mani, ol lain i save ronim ol liklik PMV sevis long pes na ol manmeri bai kisim taim nogut yet. Bikos lo na oda hevi i bikpela na ol lida wantaim gavman i no ronim gut ol samting long provins na lektoret. Ol dispela gutpela manmeri bai lus na sot long ol gavman sevis olsem haus sik, skul na ol arapela sevis moa bikos ol wokman bilong gavman bai ronawe long hevi bilong lo na oda insait long dispela provins.



Minista bilong Polis



Tok sori i go long ol famili bilong Leit James Yanepa

Ol opisa na memba bilong Royel Papua Niugini Konstabulari na Ministri bilong Polis wantaim mi tude i salim bikpela tok sori i go long meri na ol pikinini long dai bilong man na papa bilong ol
leit JAMES YANEPa.

Mipela tu i stap wari wantaim yupela long dispela taim bilong sori.

Sol bilong em i ken kisim gutpela malolo

Hon. MATHIAS KARANI, MP

Minista bilong Polis na Memba bilong Lufa Open

Madang Nius



Ripot long man kaikaim man i no tru

Martin Hawek i raitim

MADANG Gavana Jim Kas na Presiden bilong Usino Lokol Level Gavman Michael Yarap i tok ol ripot i no tru long wanpela man long Madang i bin kilim narapela na kaikai sampela hap bodi bilong em.

Long las wik, ol nius ripot i bin kamap olsem tupela man long Ono Woks kem i bin kros pait na bihain wanpela long ol i kilim dai wanpela na kaikaim ai, lewa na

samting bilong em. Bihain long em i wokim dispela, ol hauslain bilong daiman i kilim gen narapela man ya.

Bihainim dispela stori, ol ovasis na nesanel midia i gat bikpela intres stret na ol i wok long ringim ol plis na Nesanel Brotkasting Komisin long kisim moa ripot long dispela samting.

Orait, Gavana Kas na Mista Yarap i tok tru tupela man i bin dai bihain long pait, ripot long man i kaikaim ol hap bodi bilong nara-

pela man i no tru.

Gavana Kas i tok plis Kriminal Investigesen Divisen (CID) i karim ol wok painimaut long ol ples pipel husat i stap insait long dispela birua na ol i tok tru tupela man i bin dai tasol ripot long wanpela i kaikaim ol hap bodi bilong narapela i no tru.

Wantok Niuspepa i bin askim ol plis sapos em i tru ol i lukim ol hap bodi we wanpela i bin kaikaim na ol i tok ol no bin lukim dispela long ai bilong ol yet bikos ol hauslain i

bin rausim ol dai bodi kwiktaim i go long ples. Na em i hat long ol ka i go long en. Olsem na ol dokta na plis i no wokim sekap na ripot long dai bilong tupela man.

Provinsel edministreta bilong Madang i laik mekim klia olsem ol pipel bilong Usino i no lain bilong kaikaim man.

"Bihainim ol wok painimaut, mi laik mekim klia olsem ol pipel bilong Usino long Madang i no ol lain bilong kaikaim man (kanibal).

Madang i laik apim yet gutpela nem na mipela i no amamas long nius ripot bilong las wik we i ken stapim ol turis na ol arapela pipel i kam long provins.

"Gavana i laikim pablik insait long PNG na ovasis i save olsem Madang i nogat pasin bilong kaikaim narapela man i stap.

"Gavana i laik strongim wok turis long Madang na i laikim pablik long kantri na provins long helpim long skruim dispela.

Ol skul mas bihainim laip kurikulum

Paulus Tali i raitim

NESENEL Edukesen Seketeri bilong ol Luteran skul long Lae Taman Kimm i bin tok ol tisa i mas bihainim laip kurikulum na ol papama, ol pikinini na ol tisa i mas bihainim dispela. Long dispela rot tasol na skul bai ron gut.

Mista Kimm i bin wokim dispela toktok taim Ambarina topap skul i bin opim dua long kisim nambna wan grup

bilong Gret 7 topap long dispela yia.

Ambarina Luteran Praimeri Skul we i stap long Amron misin stesen ausait long Madang taun i go insait long topap na kisim ol Gret 7 sumatin long dispela yia.


Topap i kisim tupela Gret 7 klas na 64 sumatin husat i bin pinisim Gret 6 em ol iputim ol long tupela klas ya.

Hetmasta Alen Semba i tokim Wantok Niuspepa olsem skul i stap long

Baitabag Luteran Misin stesen na nem Ambarina i karamapim foapela ples olsem Amron, Baitabag, Riwo na Nagada.

Em i tok skul i save gat planti pikinini i go long ol arapela topap na hai skul na nau ol i amamas long gat topap skul bilong ol yet.

Em i tok maski ol kain hevi i save kamap, skul i ron gut wantaim gutpela wok bung i stap namel long skul na komyuniti.



• Ol binatang manki bilong Madang. Ol i save lukautim ol kain insek na karimaut ol wok stadi long ol.



• Dispela piksa i soim sampela pipel bilong Ulatapun Komyuniti Skul insait long Ulingan, Bogia.

Madang kisim moa tisa na sumatin trensfe

MADANG i kisim planti ausait tisa na sumatin long skul na wok insait long provins, ol ripot i tok.

Provinsel Edukesen etvaisa John Bossi i tok stat long mun Janueri long dispela yia, opis bilong em i kism planti pas long ol sumatin na tisa bilong ol arapela provins na ovasis husat i laik go wok na skul long Madang provins.

Mista Bossi i tok edukesen divisin long provins i kisim taim bikos ol no kisim ol matiriel ol i laik yusim long ol skul na wok bilong ol tisa na ol sumatin.

Em i tok bikos ol skul i no kisim ol metiriel long stat bilong yia, ol i wok long painim hat tasol ol i stap tasol na skruim wok wantaim ol samting we ol i gat.

Mista Bossi i tok mak long ol tisa i trensfe i go long Madang long wok i go antap long haf o 50 pesen mak, winim ol arapela yia.

Mista Bossi i tok as long dispela olsem em i lukim em ol no laikim rot

we pl atoriti i ranim skul sistem na ol i trensfe i go long Madang.

Mista Bossi i lukim dispela salens na i tokim Wantok olsem em laikim moa aweanes i kamap long ol viles long ol nupela senis i kamap long edukesen sistem.

Em i tok famili em i bikpela samting long skruim dispela na olgeta papamama i gat wok long skulim gut ol pikinini long haus na strongim ol long bihainim gutpela pasin.

Em i tok famili yunit i mas stap olsem modol na taim ol sumatin i go long skul, ol bai skruim tasol ol stia skul we ol i kisim long haus.

Em i tok em bai tok strong long opis bilong em long skruim moa ol pratikel progrem long skulim ol sumatin bilong wokim ol samting long helpim ol yet.

Em i tok bihainim pasin we planti tisa na sumatin i wok long kam long taun, em bai wok hat moa long bringim gutpela edukesen sevis insait long provins.

Madang bai strongim pipia lo

MADANG i gat nem long naispela na klinpela provins na long neks mun lo bai kamap long lukim olsem gutpela piksa i stap pas long provins.

Long neks mun, Madang taun bai skruim lita lo we i karamapim pasin bilong troim nating pipia long pablik ples na long olgeta hap bilong taun. Lo i karamapim tu ol man we i nogat wok na ol i raun nating long taun. Long las yia Novemba, Provinsel Afeas na Lokol Level Gavman Minista Andrew Kumbakor i bin tok oraitim dispela lo long kamap long Madang.

Taun Manesa Anton Yagama i tok Madang Eben

Taun Kaunsil (MUTC) bai skruim i go dispela lo long neks mun na Madang taun i ken stap olsem wanpela gutpela na naispela ples we nem bilong em i kamap long dispela insait long kantri na Pasifik rjen.

Gavana bilong Madang yet Jim Kas bai i go pas long dispela kempein we bai kmap long Mas 24.

Mista Yagama i mekim klia olsem 20 samting i kam aninit long dispela lo. Sampela long ol em i karamapim ol papa bilong haus i klinim guteria bilong ol na mekim i luknais, ol biding, stapim ol maket we

i nogat laisens long ol, spet buai na smok na ol arapela samting moa olsem.

Mista Yagama i tok ol lain i brukim ol lo bai i peim namel long K80 na K90 fain.

Em i tok nau dispela lo i kamap, olgeta lain husat i gat ol dog i mas go long MUTC opis na rejisteim ol dog bilong ol. Fi long rejista em K10 long ol dokman na K15 long ol dokmeri.

Mista Yagama i tok sapos lo i kam insait, ol woklain bai i raun long ol strit long lukim olsem pablik i bihainim gut ol lo.

Lae Nius

Wau hai skul hetmasta laikim Siaco kampani long statim wok

YAKAM KELO i raitim

KAMPANI husat i winim kontrak long wokim biling long Wau hai skul i tokaut olsem ol i bihainim stret rot na sistem bilong tenda long winim dispela kontrak.

Misis DaCosta i tokaut olsem kampani Siaco Limited i bin winim dispela kontrak bilong wokim tupela dabol biling long Wau hai skul bihain long Morobe Provinsal Tendas Bod i putim aut tenda na Siaco kampani wanpela tasol i resis na winim.

Misis DaCosta i tok ol lain i kros na stapim ol wokman long go het wantaim wok i gat krangki tingting bilong ol yet. Em i kolim olsem ol lain bilong Wau na Bulolo taun kaunsil, skul bod na hetmasta bilong Wau hai skul.

Em i askim ol long larim ol wokman bilong em i go het na mekim wok bikos ol i gat ol eksperiens kapenta na ol man bilong mekim wok.

Em i tok givim ol sans na ol i mekim samting na bihain, sapos wok i kamap gut o nogat, orait ol i ken toktok long dispela.

Misis DaCosta i sapos skul na ol kaunsil i go het na blokim ol wokman bilong em long go het na wokim dispela biling, em bai amamas tasol long kisim fri mani bikos em i kisim dispela kontrak mani pinis. Em i kolim mani ya K63,000. K70,000 tasol 10% (K7,000) i go long takis.

Wantok i ripot long las wik olsem dispela kontrak i bilong Wau hai skul laibreri. Tasol pikinini Misis DaCosta i tok ol i winim kontrak long wokim dabol domitori bihain bai skul i tingting long yusim ol klasrum.

Misis DaCosta i tok ol i kisim pinis wanpela oda i kam long Edminista bilong Morobe provins long askim ol lain i no ken stapim wok bilong kampani ya long go het na wokim

biling ya. Sapos ol i mekim olsem, bai ol i kisim kot. Hetmasta bilong Wa Hai Skul Emmanuel Ebore i tokaut olsem skul i nogat wanpela kros long kampani ya-long mekim wok bilong em. Skul i gat laik long wanpela bikpela dabol biling we ol bai yusim long laibreri long aninit na kompyuta wantaim konfrens rum long antap.

Mista Ebore i tok skul i laikim tru dispela laibri long kamap olsem na nau Siaco kampani i winim dispela kontrak, em i mas go het na mekim dispela biling nau.

Em i tok i tru i gat liklik tok pait i stap namel tasol dispela kampani i kisim mani bilong wokim biling ya pinis olsem na em i mas go het.

Mista Ebore i tok long save bilong em, kampani ya i no save wokim biling wok bipo. Em i save wokim tasol rot mentenens olsem na ol i nogat bilip tumas long kampani ya bai mekim gutpela wok.

Tasol Misis DaCosta i tok ol i bin wokim sampela haus pinis na ol i ken mekim dispela biling bikos ol i gat o eksperiens kapenta bilong mekim wok.

Skul hetmasta i tok dispela kapenta em skul i save gut long em bikos em i save mekim sampela wok bipo long ol skul biling. Tasol em i no bilip tumas long biling ya bai kamap gut o nogat.

Mista Ebore i tok Misis DaCosta i bin bungim em long las yia na givim em K50. na askim long plen. Olsem na em i go kisim plen long Job Konstraksen na givim pinis long Siaco kampani long go het. Tasol inap nau i nogat wok yet i kamap.

Tasol em i tok skul i laikim dispela dabol biling bilong skul laibri i mas kamap. Nogat man i stapim kampani long mekim wok. Wanem kain tok pait i kamap, ol i mas stre-tim hariap na go het long dispela samting, Mista Ebore i tok.

Kensa yunit long Angau i pas

OL MANMERI husat i gat sik kensa bai i painim hat tru nau bikos kensa yunit long Angau Memoriel Jenerel Haus sik long Lae, Morobe provins i pas.

Dispela em wanpela kensa haus sik tasol insait long kantri we ol manmeri wantaim dispela sik i save go long en. Na taim em i pas, em i rausim sans long ol lain wantaim sik ya long kamap orait.

Siaman bilong Angau Haus Sik Ross Humphries MBE i tok onkoloji yunit we i save lukautim ol manmeri wantaim sik kensa i no moa wok na i no inap long kisim ol kensa sik manmeri bikos i nogat dokta bilong wokim dispela wok. Na tu masin we i save glasim na skelim ol pipel wantaim sik kensa i bagarap.

Mista Humphries i tok stat yet long mun Desemba 1998 taim kensa dokta em Dokta Abeyakoon i bin lusim Angau long go bek long ples bilong em, Helt Dipatmen i no kisim narapela dokta long kisim ples bilong em. Moa long 12-pela mun i lus pinis na dipatmen i no wokim wanpela samting yet na nau ol arapela wok manmeri i aplai long wok long ol narapela haus sik long kantri.

Tupela dokta bilong Sri Lanka i bin lusim Lae long Februari 15 long skul gen long Australia. Ol tu i bin risain long

wok bikos kensa yunit i pas na i no kisim moa ol sikman.

Mista Humphries i tok taim ol lain ya i lusim wok, ol manmeri wantaim sik kensa insait long kantri bai i nogat ol save dokta husat i kisim skul long mekim wok long lukautim ol sik kensa lain.

"Onkoloji yunit i save lukautim ol kensa sik manmeri na dispela em wanpela kain haus sik tasol insait long PNG. Taim em i pas, em i lusim bikpela hul long sevis we em i save givim long ol pipel wantaim sik kensa," Mista Humphries i tok.

Em i tok em i sori tru long lukim olsem yunit i no moa kisim ol sik manmeri. PNG Kensa Rilif Sosaiti i bin kirapim kensa yunit long Angau Haus sik na em i save helpim Helt Dipatmen na haus sik tasol em i wok bilong Helt Dipatmen long kisim ol wokman.

Narapela samting tu em redioterapi masin we i save glasim na karimaut ol arapela wok bilong lukautim ol kensa sikman i bagarap. Dispela em wanpela kain masin olsem insait long kantri. Nau em i bagarap na i nogat mani long kisim ples bilong em.

Insait long wanpela pas long Februari 10, ol save man bilong Australia husat i bin lukim masin ya long traim fik-

sim i tok masin ya i bagarap olgeta na ol teknisen bilong ol i no bin inap long stretim tu. Samting nau em bilong rausim olpela wan ya na kisim nupela masin nau, maski em bai kos-tim bikpela mani.

Mista Humphries i tok haus sik nau i no moa yusim masin bikos em i bagarap. Na em bai hat long kiism nupela masin bikos Kensa Rilif Sosaiti na na haus sik i nogat inap mani long baim nupela masin.

Mista Humphries i lukluk long Helt Dipatmen long kisim nupela kensa dokta na nupela masin long helpim ol pipel bilong dispela kantri wantaim sik kensa.

Mista Humphries i tok em i sori tru long lukim olsem Angau hau sik nau i tokim ol arapela haus sik long kantri long noken salim ol kensa sik-lain long ol bikos ol nogat dokta na masin long glasim ol. Na ol kensa siklain bai i mas go ovasis long kisim marasin tasol dispela bai hat bikos ol bai tromoim bikpela mani long baim balus tiket, operesen na ol arapela samting moa. Na planti pipel long PNG i nogat mani long wokim dispela.

Mista Humphries i tok taim kensa yunit i pas, dispela i kamapim bikpela hevi long ol man wantaim sik kensa na tu sans bilong ol long kamap orait.

TRUKAI
RICE
That's right



Sasim ol lain i asua long K1.1 milien , Swokin i tok

MEMBA bilong Not Flai Kala Swokin i askim gavman atoriti long sekim gut tru ripot bilong mani i paul long edminstresen bilong Westen provins bikos dispela toktok ya i bikpela hevi tumas.

Mista Swokin i tok taim em i luk-save long bikpela hevi bilong dispela ripot, em i raitim pas i go long Minista bilong Provinsal na Lokol Gavman Afeas long Novemba 23 1999 long sekim gut tru olgeta toktok we i kamap olsem mani i paul long edminstresen bilong Westen provins. Em i askim tu plis fraud skwat long hari-apim wok painimaut bilong ol na sasim husat man ol i painim em i asua insait long dispela hevi.

Ol toktok olsem pamen bilong mani i moa long K1.1 milien i go long wanpela konstraksen kampani, opim bilong Woks Join Akaun long Boroko, wanpela olpela helt sevis agriman na ol arapela pamen i go long ol politisen na pablik sevans em ol bikpela hevi tumas olsem na wok

WESTEN PROVINS RIPOT

painimaut i mas kamap long dispela na mekim klia rekot. Husat lain i brukim lo o asua insait long wanpela paul wok i mas kisim sas, Mista Swokin i tok.

Olpela Provinsal Afeas Minista Simon Kaumi i bin makim Nesenel Investigesen tm log Ogas 1998 long sekim ol rekot bilong Westen provinsal edminstresen. Minista i bin mekim dispela bihainim lo bilong Ogenik Lo long Provinsal na Lokol Level Gavman.

Mi no egensim wanpela muv bilong gavman long sekim ol rekot na hevi bilong Westen provins, mi no laik lukim ol manmeri i kisim hevi long dispela bikpela hevi bikos sampela liklik lain tasol i paulim samting. Long dispela as tasol na mi laikim plis fraud skwat long hari-apim wok painimaut bilong ol na lokim ol lain i mekim trabel i go long kalabus, Mista Swokin i tok.

Provinsal Gavman skelim mentenens mani long ol skul

MILEN Be provinsal eksekutiv kaunsii i makim K300,000 bilong stretim ol klasrum na ol samting bilong 67 skul olgeta insait long provins. PEC i mekim dispela disisen long Mande Februari 7, 2000.

Bai ol i makim stret K311,000 long 2001 provinsal baset long neks yia na mekim dispela i kamap olsem baset bilong ol skul mentenens grent long olgeta yia.

Dispela mentenens grent i no karamapim ol elementri na komyuniti skul. Em bai karamapim tasol 52 praimer skul we ol bai kisim K3000 wanwan, 6-pela vokesenel senta we ol bai kisim K5000 wanwan, tupela vokesenel sekenderi skul we ol bai kisim K10,000 wanwan na K15,000 bai i go long wanwan 6-pela hai skul na Cameron Sekondari skul.

Lokol Level Gavman bai was long mani bilong givim i go long ol praimer skul na Provinsal Gavman bai lukautim mani bilong ol vokesenel na hai skul.

Siaman bilong Edukesen long provins Jerry Monia i tok amamas tru na welkam long dispela disisen bilong Eksekutiv Kaunsi.

Ol olpela Provinsal Gavman long bipo i no bin brukim mani olsem long stretim gut ol samting bilong ol skul long yusim long wok bilong ol. Olsem na planti klasrum na domitori na opis bilong ol skul i olpela na bruk daun pinis, Mista Monia i tok.

2000 yia bilong skul i stat pinis

MILEN BE PROVINS RIPOT

long dispela wik tasol mipela i bungim hevi pinis we i nogat inap spes long ol pikinini i go long gret 9 na 10. Mak olsem 117 studen husat i winim spes long go long nesenel hai skul tasol i nogat inap spes long Cameron Sekendori Skul, em i tok.

Mista Monia i tok Provinsal Gavman bai wok hat long traim mekim olgeta samting i go gut. Bikos ol i no inap long haitim save na rait bilong ol pikinini long kisim edukesen.

Eksekutiv i pasim tok pinis olsem bai mani bilong mentenens long wanwan skul bai i go stret long han bilong wanwan skul. Ol bai i no inap kisim ol samting bilong stretim skul. Ol yet bai kisim mani na baim wanem samting ol i laik kisim long stretim ol klasrum, ol biding long skul, opis na ol arapela menentens samting bilong skul. Dispela em Nesenel Gavman Polisi long ol skul i mas kisim mani stret long mekim wok bilong ol wantaim.

Olpela Gavman bilong Dem Josephine Abajiah i bin yusim wanpela praivet kampani long baim ol samting bilong skul long ol dispela subsidi mani na tilim long wanwan skul, Mista Monia i tok.

Tasol nau Provinsal Eksekutiv Kaunsi i rausim dispela disisen na i wanbel long givim mani i go stret long ol skul i ken baim ol samting bilong ol yet.

Salens bilong Sentrel Gavana i sanap yet

YAKAM KELO i raitim

NESENEL Kot long Waigani i surukim kot bilong pusim Sentrel Gavana Opu Taureka long singautim asembli long bung i go gen long Februari 16 dispela mun. Kot i larim dispela samting long go long han bilong Judisel Rivi Komiti long glasim na tokaut long en.

Rijinol memba bilong Sentrel provins Ted Diro i kamapim dispela kot wantaim signesa bilong 13 memba olgeta long pusim Gavana long singautim miting bilong asembli bai ol i ken holim vot i nogat bilip long Gavana Mista Taureka. Na ol i ken traim long senisim em long vot i nogat bilip na makim Ted Diro i go bek kamap gen olsem Gavana bilong Sentrel provins.

Opis bilong Gavana i tokaut aste olsem politiks long Sentrel provins nau i pundaun i go daun tru long level bilong grasrut.

Dispela i soim olsem nesenel lida i kam daun na i laik pait wantaim ol liklik kaunsi memba bilong ol yet insait long provins.

Opis bilong Gavana i tok ol

SENTREL PROVINS RIPOT

dispela 13 lain we i putim nem long pepa bilong Ted Diro i lusim em pinis. Nau ol i gat olsem 8-pela lain tasol na dispela namba i no inap long muvim Gavana long singautim miting long kamap. Na tu ol i nogat namba nau long holim vot i nogat bilip.

Opis bilong Gavana itok i no gutpela tru long lukim ol nesenel lida i pait wantaim kaunsi memba bikos wok bilong ol em long pait antap long nesenel level long kisim sevis na developmen i go long pipel. Na ol i mas wok klostu wantaim ol kaunsi long provinsal gavman na mekim dispela pait bilong ol i ken kamap.

Ol i tok Ted Diro i mas tokaut klia long ol pipel bilong Sentrel provins long wanem as tru na em i lusim sia bilong Gavana na go kamap Minista bilong Nesenel Gavman. Na em i mas tokaut klia tu long wanem as na Gavman i rausim em long Agrikalisa Ministri na nau em i laik pait gen long kisim sia bilong Gavana we em i

bin lusim bipo.


"Ating em pasin bilong painim pawa tasol ya."

Ted Diro i bin tokaut pastaim olsem em i mas go bek long opis bilong Gavana bikos planti samting i no wok gut. Ol progrem na plen olsem helt, eduquesen, Sentrel siti, balus projek na arapela moa.

Em bin tokaut tu olsem i no gutpela long kaunsi memba i kamap Gavana bilong provins bikos em i nogat namba bilong vot we ol pipel bilong Sentrel provins i givim em. Olsem na rijinol memba i mas go bek long wok bilong em stret we ol pipel i makim em long en.

Mista Diro i tokaut tu olsem planti toktok wanbel i bin kamap pinis tasol nau i luk olsem ol sampela lain i bin go toktok wantaim Gavana Mista Taureka na senisim tingting bilong em long givim bek sia long Ted Diro.

Tupela nesenel lida Moi Avei memba bilong Kairiku Hiri, Kilroy Genia memba bilong Abau i sanap sapot wantaim em long kisi bek dispela sia bilong Gavana bilong Sentrel provins.



• Poto ya i soim ol sampela bikman long Mosbi i no laik sindaun nating. Ol i yusim ol save bilong ol long mekim sampela kain wok olsem long kisim mani. Tupela ya em ol fitman long samapim su ya. Ol i save wokim gut mani bilong ol insait long siti laip.

PMV bas ron gen long Sabama na Badili eria

HEVI bilong ol PMV bas insait long Nesenel Kapital Distrik (NDC) i go daun bihain long ol komyuniti lida na ol manmeri long Kaugere, Sabama na Badili eria i pasim tok long stretim dispela hevi.

Ol komyuniti lida long dispela tripela eria i tokaut olsem ol i holim pinis ol dispela manki i bin mekim trabel long ol PMV bas na givim ol i go pinis long han bilong plis long sasim ol.

MOSBI RIPOT

Ol lain long komyuniti i bung tu na kisim mani long wanwan memba bilong tripela komyuniti long baim ol kompensesen i go long ol PMV bas husat i kisim bagarap na tu ol boskru na draiva husat i bin kisim bagarap long birua bilong ol trabel manki ya.

Komyunit lida i tokaut olsem ol i holim ol dispela lain trabel manki na ol i bilong Gailala insait long Sentrel

provins. Ol i tok tu olsem bai i gat wok sapot bilong plis i stap klostu we bai i gat radio long singaut long plis long helpim taim trabel i kamap.

Na tu i gat komyuniti plis i kamap na bai wok strong long was long ol dispela kain trabel i no ken kamap moa long dispela tripela eria.

Ol i tok bas sevis em bikpela samting long ol bikos ol pikinini bilong ol i save go long skul olgeta moning long bas, ol wokmanmeri i save go long

wok olgeta moning na kam bek long haus long bas, na ol planti samting ol i save yusim bas sevis long mekim.

Olsem na sapos ol bas i stapim sevis bilong ol long dispela tripeal eria, bai ol pipel long Sabama, Kaugere na Badili eria i kisim bikpela hevi tru.

Ol papa bilong bas i bin wanbel long dispela eksen ol lida na memba bilong komyunit long dispela eria ya i mekim na i ronim bek bas sevis bilong ol long hap.

Eviaisa askim foapela plisman long lusim plis fos

YAKAM KELO i raitim

OL giaman man i noken yusim nem bilong plis asosiesen long pulim sapot na tingting bilong ol arapela plisman, presiden bilong PNG Plis Asosiesen Aloysius Eviaisa i tok olsem long dispela wik.

Mista Eviaisa i tokaut olsem foapela plisman nem bilong ol John Bonot, Ginson Yawa, Maring Kataka na Vincent Tutu i no fainensel memba bilong asosiesen na ol i nogat rait long toktok long ol memba na holim ol miting egensim asosiesen eksekyutiv.

Mista Eviaisa i tokaut olsem olgeta asosiesen memba i sanap gut wantaim na ol i bruk o gat hait tingting olsem foapela man ya.

Em i askim ol foapela bikman ya long lusim wok bilong plis fos bikos ol i laik bagarapim tasol gutpela wok bilong ol plisman na daunim gutpela wok bilong asosiesen.

Em i tok plis asosiesen i no nap long helpim ol dispela foapela plisman long wanem kain we o samting.

Mista Eviaisa i tok senis long givim promosen na muvum ol plisman igo kam long nupela wok, seksen na provins em i wok insait long plis fos yet. Olsem na wanem tingting nogut o hevi insait long dispela samting i mas bihainim stret rot bilong stretim insait yet long plis fos. Olsem na ol plisman i no ken tok kros long en ausait long pablik long nius.

Em i tok plis asosiesen i raitim pas i go pinis long Plis Komisina long toksave long em olsem plis asosiesen i sapotim dispela disisen bilong givim promosen na transferim ol plisman i go i kam long nupela posisen na ol hap bilong wok.

Mista Eviaisa i soim bikpela kros tru long foapela plisman ya long holim miting long Plis Bareks long Sande we i bungim sampela plisman long autim tingting bilong ol egensim disisen na eksen bilong plis fos long promosen na trensefa.

Mista Eviaisa i tok dispela miting ol foapela bikman ya i holim wanpela ol plisman ya em brukim lo na ol i mas kisim sas long dispela. Bikos plis asosiesen i no luksave tu long dispela miting na em i wanpela ausait miting we i brukim lo.

Em i tok menesmen bilong plis fos wantaim plis asosiesen i mas wok poroman wantaim na i no ken wok birua o sait sait. Bikos bikpela wok bilong ol plisman em long karimaut lo na oda insait long kantri na dispela em wok ol i promis long baibel long mekim.

Minista, olupela bos helpim long bagarapim Telikom

FRANCIS ULIAU i raitim

NEM bilong wanpela gavman minista na olupela bos bilong wanpela gavman opis i bin kamap namel long lista bilong ol lain husat i bagarapim bisnis bilong Telikom PNG Limited namel long Novemba 1998 na Jun 1999.

Lista tu i gat nem bilong sampela sinia woklain bilong Telikom, tupela sekyuriti kampani na wanpela loya kampani.

Dipatmen bilong Atoni Jenerel i tokaut tu long las wik olsem wok painimaut i go insait long ol dispela win toktok i pinis long mun Ogas. Tasol dipatmen i no mekim wanpela samting yet, bikos em i laik givim sans long bod bilong Telikom long lukluk long dispela ripot na givim bekim bilong en.

Long wankain taim tu sapos em i laik, minista i bosim wok bilong Atoni Jenerel inap givim stret dispela ripot i go long han bilong Nesenel Eksekutyutiv Kaunsil. Sapos nogat, dipatmen inap salim stret ripot ya i go long Ombudsmen Komisen.

Wantok Niuspepa i no inap kisim tingting bilong Seketeri bilong Dipatmen bilong Atoni Jenerel, Michael Gene, long wanem samting bai kamap long dispela ripot.

Ripot bilong Telikom Wantok i kisim i karamapim planti strongpela toktok, pasin na paul wok em i bin kamap long Telikom PNG Ltd.

insait long Novemba 1998 na Jun 1999, wok bilong mani insait long Telikom tu i bin stat long pundaun. Na dispela i bin bagarapim tru ol wok em kampani i laik mekim bilong pulim winmani.

Dipatmen bilong Atoni Jenerel i bin baim Ram Business Consultants bilong painimaut long ol dispela toktok bilong krangi wok na paul pasin i kamap insait long Telikom.

Insait long ripot bilong en, Ram i tokaut strong olsem plis na PNG Loya Sosaiti i mas sekap long ol dispela man na lain kampani em nem bilong ol i stap long lista.

Tasol long las wik, ol bikman bilong plis (fraud na serious crime skwat) i tokaut olsem ol i no kisim wanpela askim yet bilong

sekap long ol krangi wok na paul pasin em i bin kamap long Telikom.

Wok painimaut bilong Ram i sutim strongpela tok tu olsem Telikom i bin lusim bikpela mani tru long bekim ol ovasis dinau, na baim ol arapela samting long ovasis bihainim strong bilong mani bilong Amerika. Ol arapela paul wok i kamap i sut long stail bilong kisim ol wokmanmeri, krangi rot long sainim kontrak bilong wok sekyuriti, brukim lo i karamapim wok bilong salim na baim ol ka bilong kampani, brukim lo bilong baim graun na haus slip, yusim mani bilong Telikom long baim na bekim dinau long opis bilong minista, na bagarapim rot bilong pulim winmani bilong Telikom.

Long dispela taim tu akauns dipatmen bilong Telikom i bin kisim ol hap pepa bilong baim tripela dinau bilong opis bilong minista. Wanpela em bilong baim haia ka em opis bilong minista i yusim inap long K26,995.10; K226.40 long kaikai bilong minista inap long tupela de taim em i go raun long Simbu na las em risit bilong sataim balus long Mosbi i go long Lae inap long K2,700.

I bin gat ripot tu olsem wanpela nupela stail 4-wil-draiv ka bilong Telikom em kampani i baim long moa long K120,000 i stap yet wantaim opis bilong minista (bilong bipo). Nupela bos bilong Telikom i bin traim pinis long kisim bek dispela ka tasol i no inap.

Ripot i soim tu olsem namel long 1998 na 1999, tripela man olgeta i bin holim wok olsem menesing dairekta bilong Telikom. Na i gat toktok olsem sampela wok mani na ol kontrak em i bin kamap long dispela taim i no bin stret, ol i bagarapim tasol wok bilong Telikom.

Ripot bilong Ram i tokaut olsem ol pepa wok bilong makim wanpela menesing dairekta i no bin stret. Long wanem, olgeta memba, bilong bod bilong Telikom i no bin sindaun na patim toktok bilong stretim wok kontrak bilong dispela man aninit long mama lo bilong Telikom (pat 1, klos 15.02).

"Kontrak i no bin tok klia sapos kain samting olsem i bin kamap na sapos bod bilong Telikom i bin givim tok orait long seketeri

bilong kampani long prinim mak bilong Telikom antap long wok kontrak," ripot i tok. Minista wantaim dispela menesing dairekta i bin sainim kontrak na putim mak bilong kampani long kontrak pepa. Ol arapela husat i lukluk i stap long dispela taim em siaman bilong Telikom bod na narapela bod memba.

Tasol bikpela askim i sut yet long lo we i toktok long olgeta memba bilong bod i mas bung na oraitim kain kontrak olsem.

Bikpela toktok i bin kamap tu long mak bilong potnait pe em wan wan menesing dairekta inap kisim long olgeta ya. Kontrak bilong wanpela bilong ol dispela tripela menesing dairekta i tokaut long potnait pe bilong ya em inap long K280,000. Mak bilong tupela narapela em namel long K70,000 na K80,000.

Askim i bin sut tu long ol arapela pe em dispela menesing dairekta i bin kisim taim em i pinis long wok bihain tasol long sampela mun. Ol dispela askim i sut long pinis pe na ol alauwens bilong telipon, amamas, haus na ka.

Long wankain taim yet, Ram Consultants i bin painimaut tu olsem insait long dispela taim namel long mun Novemba 1998 na Jun 1999, wanpela loya kampani i bin kisim planti wok kontrak tru. Dispela kain pasin i bin kamap tu long ol kontrak em Telikom i givim i go long tupela sekyuriti kampani. Ol tok orait bilong ol dispela kontrak i no bin bihainim lo bilong Saplai na Tendas Bod bilong Telikom.

"... ol dispela sekyuriti kontrak i brukim planti ol hap hap lo na i no bihainim lo, olsem na ol i krangi olgeta," ripot i tok.

Wankain samting tu i bin kamap long hap graun em Telikom i baim long Coringa Limited. Dispela hap graun i stap long alotmen 52, seksen 06 long Matirogo/Koki. Rot bilong salim na baim dispela hap graun tu i no bihainim lo bilong Saplai na Tendas Bod bilong Telikom.

Telikom i bin baim dispela hap graun long K500,000.

Nem bilong wanpela olupela menesing dairekta bilong Telikom i bin kamap gen long wok bilong hom onasip skim.

TOYOTA HILUX

FEBRUARY SPESEL

Baim wanpela nupela Toyota Hilux 4WD singel o dabel keb disel model nau na yu ken draiv igo pinis wantaim sampela moa samting bilong Hilux bilong yu o wanem samting yu laik long kisim long dispela mun tasol. Hariap tru long taim ofa i stap!



FRI
YAMAHA 25HP
AOT BOT
MOTO



FRI
EF 1000
YAMAHA
GENSET



FRI
BUL BA, MEG
WILS NA TOU
BA



SEL I GO INAP LONG 29th FEBRUARY 2000

Ela Motors
 **TOYOTA**

EM6685

LONG OL RITEL KASTOMAS TASOL.

YU KEN KISIM LONG OL ELA MOTORS KLOSTU LONG HAP BILONG YU!

VISIT OUR WEBSITE - <http://www.elamotors.com.pg>

Ol pleslain wok bung long kirapim sipsip projek

Tripela wanpisin insait long Bena Distrik long Isten Hailans i bung wantaim na kirapim wanpela sipsip projek.

Dispela tripela ples em long Nama Ugere, Nama Viare na Faniufa. Samting olsem 1,000 pipel i bungim mani wantaim long kirapim dispela sipsip projek ya. Ol i wokim dispela bihain long ol i lusim planti yia long groim kopi tasol ol no kisim gutpela samting tumas long en.

Ol dispela ples lain i gat plen long lukautim ol sipsip na tu go insait long wok bilong katim na salim mit bilong em.

Ol ples lain ya i fomim wanpela bisnis grup ol i kolim long Koko Obura na ol bai menesim na oge-naisim dispela sipsip projek.

Ol lain ple sya i luksave olsem ol mas wok bung wantaim olsem komyniti long bringim developem na i go long eria bilong ol na taim ol wok bung wantaim, planti gutpela

samting bai kamap long laip na sindaun bilong ol.

Dipatmen bilong Agrikalsa na Laipstok (DAL) na Isten Hailans provinsel edministresen aninit long divisen bilong DAL long provins i givim teknikel na ol arapela helpim i go long ol dispela ples pipel na tu em bai lukautim bisnis bilong ol pastaim.

Ol pipel i painim pinis gutpela hap graun long kirapim dispela projek long lukautim ol sipsip na ol arapela wok moa. Maski graun we ol i laik kamapim projek i stap long maunten hap na i no long stretpel-ka graun, ol ples pipel ya i no surik, ol bai go hetim projek yet.

Taim DAL Seketeri Miri Setae i bin raun i go long ol ples ya, ol pipel i bin tokim em long hatwok bilong ol long planti kismas long groim kopi tasol i no bin karim gutpela kaikai. Na long dispela taim, ol i bilip olsem sipsip faming bai kamap gut na ol bai kisim gutpela samting long en.

Mit bilong sipsip em kaikai na protin we ol bai kisim, ol bai yusim skin long kamapim ol arapela samting olsem wul na ol meri bai go insait long en.

Ol ples pipel i lukim dispela sipsip faming olsem wanpela salens tasol ol strong long skruim wok long projek ya bikos ol bai kamapim mitna wul long bikpela maket insait long ol ples long distrik.

Projek ya bai givim sans long ol pleslain long oge-naisim ol yet na go insait long ol rurel developem, moa yet bihainim gavman rifom.

Mista Setae taim em i tok amamas long ol pipel bilong kirapim olsem hap sea bilong em.

Em bin tok sipsip bisnis na developem em i hap bilong fud sekyuriti polisi bilong gavman na em i bikpela samting long em (gavman) i givim sapat long dispela kain projek. Ol i ting olsem Koko sipsip projek bai kamap olsem modol sipsip fam insai long provins.

Ramu Join Vensa straksa i kamap

HAILANS Pasifik grup na Orogen Minerels Limitit i bin go insait long wanpela join ventja long wok wantaim long skruim kobal na nikel maining projek long Ramu insait long Madang provins.

Ol bintok orait long go insait long dispela Ramu join ventja projek long mun Oktoba 199 tasol nau ol i wetim tok orait long agri-men i kam long Maining Minista.

Long Oktoba 1999, Hailans Pasifik grup i bin oraitim long baim 10 pesen sea long Ramu Nikel join ventja long Isten Pasifik Main Limitit (Isten) na apim sea bilong em i go antsp long 68.5 pesen. Bihainim agrimen wantaim Isten, ol bai wokim kesmani peimen na ol sea wantaim, ripot i kam long Hailans Pasifik i tok.

Ripot i tok long mun Novemba las yia, Orogen Minerels i bin kamapim agrimen long baim 31.5 pesen intres bilong Nord Australax Nominis (PNG) Limitit (Nord) we em bin holim long Ramu Projek.

Taim olgeta ol dispela samting i pinis, ikwiti bilong join ventja straksa bai kamap olsem Hailans Pasifik bai i gat 68.5 pesen sea na OML baigat 31.5 pesen sea.

Long go hetim seil, Hailans

Pasifik na Nord i kamap wantaim wanpela agrimen long stretim ol hevi we tupela i gat long operesen bilong join ventja. Long stretim hevi ya, Hailans Pasifik bai kisim US\$1,25 milien na peimen bai i kam long tripela hap.

Taim OML i pinisim peimen bilong sea, Hailans Pasifik na OML bai strongim wok namel long ol long dispela join ventja kampani we tupela bai go insait long en na bihain, putim askim i go long wanpela bikpela maining kampani long joinim projek, ripot i tok.

Ripot i tok tu olsem Front Enjiniaring na Disain (FEED) wok i stat pinis na Kvaerner Metals na Boulderstone Hornbrook i kamapim join ventja wantaim ol na nau ol i kisim kontrak long wokim dispela wok.

Ripot i tok ol bin karimaut wanpela stadi long skelim na glasim ol hevi we i karamapim ol konstraksen na operesen wok. Ol bai lukluk long dispela ripot na skelim ol hevi na painim rot long abrusim na daunim ol na putim ol dispela samting wantaim i go long developim na kamapim fainol disain long enjiniaring wok.

Wenge bai askim long daunim VAT takis lo

ROSALYN ALBANIEL i raitim

GAVANA bilong Morobe Luther Wenge bai putim kamap wanpela bil insait long Palamen bung long neks mun bilong taim daunim Vatu Eded Takis (VAT) insait long kantri.

Dispela bai namba tu Bil we Gavana Wenge i kamapim long palamen bihainim wok kempain ege-naisim long VAT takis we em i gat stat yet long taim gavman i bin laik putim dispela takis long kantri las yia. Gavanan Wenge i tok em i wok long strong long kamapim dispela bil bikos ol grasrut pipel i wok long kisim taim tru bihain long gavman i kamapim VAT takis long Julai las yia. Mist Wenge i tok dispela em narapela rot long bihainim sapso Ripil VAT Bil we i stap nau bipo long palamen i no wok.

Bikos i no bin gat inap vot long skruim ol toktok long dispela bil long laspela palamen bung las yia Novemba, ol no bin toktok long en.

Gavman i kirapim pinis Takis Rivyu Komiti na dispela bai i glasim gen VAT takis, olsem tasol i stap aninit long tems na referens.

Mista Wenge i tok em bai no inap long sindaun nating na wet taim ol dispela samting i go het. Olsem na em bai putim kamap gen ripil VAT bil taim palamen i sindaun long bung neks mun.

"Takis rivyu komiti bai givim fainol ripot long ol wok painimaut long VAT i go long gavman long mun Septemba. Dispela bai i kisim longpela taim na planti pipel i wok long bungim hevi pinis na olsem em bai wokim samting nau.

"Olsem na mi wok long strongim bil long dispela samting taim palamen i bung long neks mun," Mista Wenge i tok.

Em i tok pasin we rivyu komiti i skruim taim i go long mun Septemba long givim ripot long dispela samting i go long gavman i longpela tumas na i luk olsem tingting i stap baksait long dispela em long stapim ol wok long bilong anti VAT komiti.

Mista Wenge i askim sapos petisen bilong komiti na ol sapota we ol bin putim i go long gavman long dispela samting i go pinis long han bilong Takis Rivyu Komiti ya.

Em no amamas tu long VAT takis mani we provins bilong em, Morobe, i kisim insait long laspela faipela mun long Intenel Revenyu Komisin (IRC) na Nesenel gavman olsem hap sea bilong em.

Em i tok insait long laspela faipela mun, Morobe provinsel gavman i bin sot long K700,000 long VAT sea na olsem em no bin go hetim ol projek we em bin plenim long en. Dispela em long ol wara saplai projek, karimaut mwntenens long ples balus, ol klasrum na ol bria.

Em i tok aninit long ogenik lo IRC na gavman i mas givim K2.4 milien i go long Morobe provins olsem ribeit bilong VAT takis tasol em no lukim dispela i kamap.

Em i tok Provinsel Seils Takis (PST) i bin gutpela bikos em i save kamapim mani bilong ol provins tasol long las yia Julai taim VAT takis i go insait, gavman i rausim dispela PST.

Mista Wenge i tok em i lukim ol loya bilong em pinis long lukluk long dispela samting.

Eksploresen wok long kantri i go daun

Ol EKSPLORESEN wok o wok long painim ol minerel olsem gol, kopa na wel long maining bisnis insait long kantri i wok long go daun isi isi. Na bai i go daun moa yet long dispela yia taim petroleum bisnis i kamap gut bikos long gutpela prais bilong wel, ol ripot i tok. Eksekutiv dairekta bilong PNG Samba bilong Maining na Petroleum Greg Anderson i tok ol wok eksploresen long ol minerel i kostim US\$12 milien long las yia na i luk olsem long dispela yia, em bai go daun. Tenpela yia i go pinis, mak long mani we ol i tromol long karimaut ol eksploresen wok i save stap long US\$80 milien.

Wanpela long ol as we ol wok eksploresen i go daun em long eksploresen kampani Cyrus Amex i lusim PNG na go bihain long Phelps Dodge i tekova. Mista Anderson i tok Cyrus Amex i bin wanpela eksploresen kampani insait long PNG na taim em i go,

maining sekta i lusim wanpela bikpela maining kampani.

Em i tok Phelps Dodge i nogat bikpela intres tumas long PNG na ol i katim ol eksploresen wok bilong ol long kantri.

Emmi tok bihainim dispela, kantri i lusim ol dispela eksploresen wok we i bin stap long Freida projek tu.

Em i tok dispela i min olsem Hailans we i meja papa long Freida i mas painim narapela join ventja kampani long go hetim Freida.

Em bin tok bihainim ol toktok wantaim ol maining dipatmen, ol i tingting long karimaut sampela promosen wok long strongim gen eksploresen wok insait long kantri.

Mista Anderson i tok petroleum bisnis i luk gutpela bikos long gutpela prais bilong wel. Na gutpela sapat long dispela long 1999 baset.



BOROKO Foodworld

Dispela Wik Spesols

Roots Rice 1kg	K1.17	Tulip PLM 340gr	K2.78
Power Rice 1kg	K1.53	Sunshine Milk 1litre	K2.28
Ox & Palm Taper 340gr	K2.99	Sanitarium Corn Flakes 250gr	K4.90
Arnotts Sao Biscuits 250gr	K2.79	Ilimo Eggs 55gr Per Doz	K3.42
Arnotts Scotch Finger 250gr	K2.44	Ilimo Eggs 60gr Per Doz	K3.59
Sanitarium Weet Bix 375gr	K3.90	Morobeen Cream Ass. 60gr	K .50

Plantu moa kaikai prais i go daun long en!

Ph: 325 7566, 325 0863 Fax: 325 7096

Fainens Pasifik sapotim bikpela bung bilong ol dokta

VERONICA HATUTASI i raitim

MEDIKOL Sosaiti bilong PNG long las Fraide i bin lonsim bikpela bung bilong ol dokta i kolim long Anuel Simposium bilong ol. Ol i save holim dispela kain bung long wanpela taim insait long yia na dispela we ol bai holim em namba 36 bung.

Bung tru bai i kamap long mun Septemba na stat long de namba 3 na pinis long namba 7.

"Het tok bilong bung long dispela yia em "Emerging Diseases into the Millenium". Long Tok Pisin, dispela i min olsem ol sik we i wok long kamap bikpela insait long kantri taim yumi surik i go long nupela milenium.

Dispela em ol sik olsem HIV/AIDS we ol bin luksave long namba wan taim long PNG long 1987 tasol nau planti man i kisim na mak i wok long sut i go antap moa insait long olgeta yia, senis long rot we ol sik i kamap olsem nau, sik long lewa, hai blut presa i wok long daunim planti man na ol sik olsem malariz na TB i wok long

kamap strong gen.

Tasol Sosaiti i wokim lonsing long kamapim mani we bai ol i yusim long redim ol samting bilong bung, kisim ol Sosaiti memba insait long ol provins na ausait long kantri i kam long bung we ol bai holim long Park Royal Hotel long Mosbi, peim ples bilong ol memba long silp long en na ol kaikai samting na ritim kamap medikol jenel bilong Sosaiti.

Siaman bilong ogenaising komiti bilong simposium 200 Dokta Joe Bana-Koiri i tok ol i laikim namel long K50,000 na K100,000 long putim kamap dispela bikpela bung. Sosaiti i save lukluk long ol bikpela koporet kampani, ol man, ol dokta yet na Helt Dipatmen bilong givim helpim mani long kamapim dispela bikpela saientifik bung bilong ol.

Dokta Bana-Koiri i bin tok as tingting long holim dispela kain bung em long ol dokta na ol arapela wok manmeri bilong helt, ol dokta i karimaut ol rises i bung na toktok long ol nupela wok kamap long sait bilong marasin na rot bilong daunim ol sik na ol arapela bikpela samting we i karamapim eria bilong marasin na helt insait

long kantri.

Na long taim bilong lons las wik Fraide, fan resing i bin stat we long en, Pasifik Fainens Limitit grup i binkamap olsem namba wan koporet grup long givim helpim taim ol i donetim K2,000.

Philip Imbuni i makim Fainens grup i bin tok Fainens Pasifik i tok Fainens Koporesen grup i luksave long gutpela wok we dispela bikpela bung bilong ol dokta i kamapim long lukautim helt bilong kantri na ol i givim dispela helpim. Na ol i gat bikpela olsem mani bai helpim Sosaiti long sampela rot long skruim dispela bung. Long las yia, Koporesen i bin givim K5,000.

Dokta Bana-Koiri i tok ol dokta yet i save karimaut ol fan resing long pulim mani bilong bung. Na wanwan long ol memba tu i save givim K50 bilong go long helpim kamap bung ya.

Samting olsem 300-400 dokta i memba bilong Medikol Sosaiti. Dispela i karamapim ol ekspet dokta, ol rises saientis dokta na ol arapela saveman na ol Alait helt woka.

Deputi Nesenel Seketeri bilong Helt Dipatmen Dokta Timothy



□ (l - r) Philip Imbuni i makim Pacific Finance Koporesen grup na givim K2,000 Sekmani long Asosiet Din bilong UPNG Medikol Skul, Dokta Mathias Sapuri. *Poto: Isaac Ikuavi.*

Piyakalya i tok dispela bung em i wanpela bikpela samting bikos long en, ol traipela save dokta i save kamapim ol nupela polisi na putim kamap long medikol nius jenel o megesin bilong ol long Helt Dipatmen bilong lukim na bihainim. Na tu long autim ol nupela samting we i wok long kamap insait long medikol na wol bilong marasin.

Bogenvil kisim moa ausait tisa

HELEN REI i raitim

BOGENVIL long dispela yia bai i kisim 90 tisa bilong ol arapela hap bilong kantri i wok long ol skul insait long Not Solomons, Asisten Seketeri bilong Edukesan long provins Tony Tsora i tok.

Mista Tsora i tok em i amamas long lukim olsem ol ausait lain i gat laik long go wok long Bogenvil bikos taim ol skul i wok long op isi isi, ol komyuniti na hai skul i painim hevi long sot long tisa insait long planti skul bilong ol.

Mista Tsora i tok 60 ausait tisa i stap pinis long Bogenvil na ol i wok tupela wik i go pinis taim 2000 skul yia i bin stat long Janueri 31. Em i tok ol i wetim 30 tisa moa yet long kam.

Em i tok ol skul insait long provins i bin statim 2000 skul yai na ol i wok long go gut. Em i tok dipatmen i no bin bungim wanpela hevi long sait bilong tresnferim ol tisa i go na i kam.

Em i tok dipatmen i bin kisim inap mani long Provinsel Fainens bilong peim ol tiket long ol tisa bilong go wok insait long ol skul long Bogenvil.

Em i tok moa skul long provins we i bin pas 12 krismas i go pinis bikos long pait long ailan i wok long op bek nau yet. Long sampela eria bilong bikailan ol skul i stap pas yet, moa yet long saut, sentrel na ol hap we i stap longwe long ol maunten hap na we ol gavman sevis i no go yet long ol.


Em i tok long dispela mun, Edukesan divisen bai i kisim ful ripot long ol wok kamap long wan wan skul na hamas skul tru i op na wok i stap insait long provins.

Mista Tsora i tok long dispela yia, Nesenel gavman bai peim skul sabsidi mani i go long ol skul na i no long provinsel edukesan divisen bilong tilim i go long ol skul bihain olsem em i save wokim long ol arapela yia pastaim. Dispela em bikos divisen i no hari-

ap long wokim na givim ripot bilong em long Nesenel Gavman na ol Nesenel Edukesan atoriti.

Em i sabsidi mani bilong ol hai na vokeseni skul bai go long ol wan wan akaun bilong ol taim ol komyuniti na praimeri skul bai i kisim ol matiriel olsem ol buk na ol arapela samting.

Bikos ol skul i no yet kisim ol saplai na ol i sot long ol samting bilong rait na yusim, Mista Tsora i putim strongpela singaut i go long Nesenel Gavman long hariapim ol skul saplai bilong ol Bogenvil skul.



• Ol sumatin bilong Monoita Komyuniti Skul i hait long ren arere long wanpela klasrum.

Gavman bilong Australia givim ol kontena marasin

GAVMAN bilong Australia i givim helpim i go long Helt Dipatmen gen wantaim ol strongpela marasin bilong ol haus sik insait long kantri long yusim.

Long las wik, Nick Warner husat i Hai Komisina bilong Australia i bin givim wanpela kontena we i gat ol antibaiotik marasin ol i kolim long amoksilin long han bilong Helt Seketeri, Dokta Puka Temu.

Haikom opis i tok dispela ol marasin i makim liklik hap bilong AUD\$10 milien (K20 milien) marasin saplai we gavman bilong Australia i wok long givim PNG long han bilong AusAID long tilim i kam insait long kantri.

Taim em i givim ol dispela marasin i go long gavman, Mista Warner i tok em bilip olsem ol dispela marasin bai helpim ol helt senta na etpos gut na ol bai no bungim moa hevi long marasin.

Em bin tok ol dispela marasin em i bilong stapim ol sik bilong ol ol pikinini we ol i save kisim klostu taim ol i stap liklik. Na tu bilong helpim daunim sik malaria we i stap olsem namba wan sik long PNG ol man i save dai long en.

Em i tok ol i save laikim tru ol dispela marasin insait long ol helt senta na etpos.

Mista Warner i tok Australia i wok long helpim PNG long

kamapim gut sait bilong helt. Em i tok ol program i sut long strongim ol helt sevis insait long ol ples i stap longwe long taun na tu ol meri na ol pikinini.

Long mun Oktoba 1999 Gavman bilong PNG i bin askim Australia long helpim wantaim mani bilong baim ol imejensi marasin o ol marasin we helt dipatmen i laikim tru bikos 2000 Baset we i karamapim ol medikol saplai i bin sot.

AusAID i bin glasim na skelim ol samting na em i wok nau wantaim Nesenel Helt Dipatmen long traim helpim ol. Sampela ol oda i kamap pinis long ol bris long kantri na ol

Raits bilong Pikinini

Ol Faundesen Prinsipel o lo bilong Konvensen long raits bilong pikinini.

Lo namba tu em: 2-Bes Intres bilong Pikinini

Jails Raits Konvensen (CRC) i tok bes intres bilong pikinini em i bikpela samting we yumi mas tingim long olgeta samting we i sut long long ol taim yumi wokim ol disisen. Dispela i min olsem intres bilong pikinini i mas stap antap long dispela bilong Stet, ol papamama na ol arapela. Em i sapotim pasin we intres bilong pikinini i go pas long ol arapela na strongim olsem sosaiti i putim bikpela tingting long meri na pikinini. Na tu lukautim rait bilong ol na inapim ol samting we ol i laikim na ol i gat rait long en.

3-Rait long Laip, gutpela sindaun na divelopmen

Ol pikinini i gat rait long laip, gutpela sindaun na divelopmen. Bihainim dispela, yumi mas lukim olsem ol pikinini i kisim ol sevis na wankain sans long wan wan long ol bilong kisim ful divelopmen.

Tetin milien pipel i save dai long olgeta yia long ol sik we ol ken stapim olsem bun nating o malnutrisen. Dispela mak i foapela taim moa long mak bilong populesen bilong

PNG. Dispela mak i antap moa long 35,000 mak bilong ol pikinini i save dai long ol kain as long olgeta de. Aut long olgeta 1,000 bebi we ol mama i save karim long olgeta yia insait long PNG, 82 i save dai bipo ol i gat wanpela krismas.

Lukautim rait bilong pikinini i min olsem lukautim na was long ol long ol kain bagarap, pasin nogut we ol arapela bikpela manmeri i ken wokim long ol na pasin bilong givim ol wok long mekim wantaim nogat malolo na pe long en.

Ol i karamapim ol isu olsem spesel kea long ol refuji pikinini, givim bikpela mekim save long ol, kriminel jastis sistem i no mekim gut ol, mekim ol i go insait long pait taim hevi i kamap long wanpela hap, jail leba o mekim pikinini i hatwok tru nating, pasin bilong kisim ol strongpela smok brus na bagarapim ol.

Planti taim yumi save tanim baksait long ol pikinini. Tok piksa em taim bilong adoptim ol pikinini, ol patna i no tingim bes intres bilong ol. Pasin bilong bagarapim ol pikinini na wokim ol nabaut i save kamap long ol pikinini long olgeta hap bilong wol. Em i save kamap tu long PNG. Long PNG 40 pesen long ol meri we i save kisim hevi long ol man i bagarapim ol em ol yangpela meri we krismas bilong

ol i stap aninit long 15 krismas. Pasin bilong wokim nabaut na tu bagarapim pikinini em i wanpela bikpela hevi na ol i luksave olsem em i kamap long olgeta hap. I nogat planti wok rises o ripot long en na olsem, i kam inap nau, i nogat kliapela polisi long en.

4- Tingting bilong pikinini


Dispela namba foa lo i singaut long publik long luksave olsem ol mas harim nek, tingting na toktok bilong ol pikinini. Wantaim dispela na luksave long bes intres bilong pikinini, dispela lo i min olsem tingting, toktok na askim bilong ol pikinini em i bikpela samting. Na yumi mas luksave long ol tingting bilong ol taim ol i autim ol na taim yumi wokim ol disisen we i karamapim ol. I moabeta long ol pikinini i stap insait long ol toktok na disisen yumi wokim long karamapim ol. Na long dispela tu, yumi mas kisim ol i kam insait long autim ol toktok na tingting bilong ol long ol rot we inap long krismas bilong ol.

Konvensen i save lukautim ol dispela rait na em i putim ol stended we gavman i mas bihainim long givim ol sevis olsem helt, edukesan, ligel na sosel sait i go long ol pikinini insait long ol wanwan kantri bilong ol.

Moa long neks wik.

Plening we ol bin odaim aninit long Wol beng/ADB PNG Famili Plening Projek na ol arapela marasin bilong tilim i go long ol helt senta na etpos insait long kantri.

Mista Warner i tok haf bilong AUD\$10 milien (K20 milien) we ol i katim long baim ol marasin em ol bai tromoi long baim ol helt peket i gat i gat ol marasin na dispela i bilong tilim i go long olgeta helt senta insait long kantri. AuaAID i wok long lukluk long painim gutpela rot long salim ol dispela marasin peket i go long ol provins.



Stopim kros pait long plis fos

TOKTOK kros i kamap namel long ol plisman yet long dispela wik i no gutpela tru long wok tru bilong plis fos long lukautim lo na oda hevi insait long kantri. Papua Niugini tude i gat planti bikpela hevi insait long komyuniti na sosaiti na plis fos i gat bikpela wok long was long ol manmeri na ol propeti o ol samting bilong ol long i mas stap gut. Ol manmeri i mas kisim gutpela was bilong plisman long raun gut, sindaun gut na amamas wantaim narapela narapela long olgeta de.

Pait namel long ol plisman long sait bilong wok o posisen i mas pinis na wanpela stretpela rot i mas kamap long stretim dispela bel hevi bilong ol plisman. I tru olgeta plisman i no inap kisim dispela promosen tasol pasin bilong sapat na wanbel i mas kamap long ol yet long amamasim narapela. Plis het kota tu i mas luksave long dispela mekim stretpela pasin tu bai wanpela taim olgeta plisman na plismeri i ken gat dispela promosen. Husat i nogat sans nau, em i mas gat luksave olsem bai em i kisim bhain.

Sapos i gat sampela pasin nogut o hait pasin i bin kamap namel long ol plisman yet, ating i mas gat wanpela rot tasol bilong bhainim long stretim na kiarim bai kain hevi na tingting nogut i no ken hangamap long ol plisman long wok bilong ol. Sapos i gat wanpela bodi bilong glasim ol hevi insait long plis fos yet, orait dispela bodi i mas ol namel lain tru bai ol i



noken mekim disisen we i namel stret na i no ken gutpela long wanpela sait bikos ol i gat brata o poroman long en.

Pablik i no laik tru long lukim o harim olsem ol plisman i gat birua o kros pait namel long ol yet. Bikos husat tru bai karim hevi na wari bilong pablik. Pablik i mas go stret long husat plisman i stap sambai long givim wari na hevi bilong ol na ol i no ken pret o surik bikos long hevi ol plisman yet i gat namel long ol yet.

Long narapela sait tu, pablik i laikim gutpela wok i mas kamap long ol plisman long lukautim ol na was long ol long ol trabel na birua. Long dispela as tasol, pablik i save baim takis we mani bilong ol i go long lukautim ol plisman long potnait pe na haus slip bilong ol.

Olsem na plis fos i mas bekim bek dispela mani bilong ol pablik long givim gutpela sevis i go bek long ol. Olsem na pinisim ol kain kros nabaut na mekim wok stret we pablik i laikim yupela long mekim.

Insait long olgeta wok bilong kampani na gavman, nogat man i save stap olgeta taim long wanpela posisen bilong em. Sampela taim sik i save kamap na dispela olpela selsmen o menesa i mas lusim na givim spes long narapela nupela selsman o menesa i kisim ples bai wok i ken ron gut na em i no ken stap bosim dispela posisen we bai kamapim hevi isi isi long wok bilong mekim mani. Sampela i save kamap lapun long wok na lusim wok. Bikos ol ino ken pasim spes na mekim wok i go isi isi. Olsem na ol yangpela, strongpela

na smat lain long wok i ken tekova long posisen bilong bikman ya. Dispela kain senis i save kamap long olgeta kampani, bisnis, gavman dipatmen na ol wok lida insait long ples tu. Taim bilong senis i save kamap.

Sapos dispela kain luksave o pasin tu istap long plis dipatmen, orait bhainim bikos em i stretpela pasin. Sapos wanpela plisman i winim 30 krismas long plis fos na krismas bilong em tu i go daun, moabeta em i mas givim spes bikos planti yangpela plisman i kam antap long kisim ples.

Plis fos i mas smat, strong na hariap long mekim wok bilong kari-maut lo na oda. Ol i mas kwik na smat tu long tingting long mekim disisen hariap bai ol mobail skwat, task fos, trefik, raid skwat na

wanem kain skwat moa i mas mekim wok hariap bhainim oda na plen. Taim raskol i laik stil, em i save sut stret long taim na tekov. Olsem na plisman tu i mas sambai tu long mekim samting hariap long ronim o holim ol raskol o sapos laki, orait stapim raskol pastaim long ol i mekim trabel o birua.

Plis fos em was bilong pipel na em i mas wok stret na i no ken mekim nabaut. Ol insait kros na bel hevi i mas pinis gut long gutpela rot na sistem.

Sapos wari i boil na hot tru insait long ka, ka bai bungim hevi na ol gutpela pasindia long ka bai kisim taim tu. Olsem na ka i mas stap, kapsaitim kol wara long en na olgeta samting i kol gut gen, orait ka i ken ron gut na ol pasindia bai stap gut.

Ol Bogenvil lida i no amamas long Praim Minista

* Ol mausman bilong Bogenvil i go bek pinis long Bogenvil long dispela wik. Tasol Praim Minista Sir Mekere Morauta i no bin sindaun bung wantaim ol long las wik i kam inap ol i go bek.

Ol i no amamas tru long dispela pasin na bel bilong ol i no gutpela tru bikos ol i gat planti bikpela tok-tok bilong toktok wantaim Praim Minista long ol hevi na ol wok bilong ol long Bogenvil ailan.

Tasol Praim Minista Sir Mekere Morauta i tokaut olsem em i nogat taim tru long lukim ol bikos em i gat planti wok bilong mekim. Na tu em i gat NEC miting long stap insait na ol dispela samting i holim em. Tasol em i bin laik lukim ol long Tunde dispela wik tasol ol i go bek pinis long Mande. Ol Bogenvil lain ya i bin go long Mosbi long las Tunde.

Tasol lida bilong Oposisen Bill Skate i tok dispela i no gutpela pasin tru Praim Minista i mekim long i no traim long bungim na toktok wantaim ol dispela biklain bilong Bogenvil.

Mista Skate i tok em i sori tru long wanem ol wok olpela gavman bilong em i bin wok hat long kamapim long Bogenvil, nau dispela gavman i no luksave na bhainim. Na em i pret bai olgeta samting long stretim hevi bilong Bogenvil bai i no inap kamap gut.

Mista Skate i tok ol dispela lain bikman bilong Bogenvil i wari



wantaim na i go bek na em i pret nogut ol samting bai i rong gen.

* Wanpela liklik bebi i gat sik AIDS i dai long Mosbi haus sik long dispela wik tasol em i nogat famili bilong lukautim em. Em igat 5-pela mun tasol na mama bilong em bin dai bikos em i gat sik AIDS. Pikinini i stap long haus sik long lukautim bilong ol lain i save lukautim ol AIDS manmeri. Ol i wetim famili bilong pikinini ya long kam kisim tasol ol i no kam. Ol haus sik lain i ting famili bilong pikinini ya i pret bikos em i gat sik AIDS na nogut sik ya i kalap long ol. Bebi ya i stap long lukaut bilong ol haus sik lain inap em i dai long dispela wik na ol i plan-em em long 9 Mail matmat.

* ICRAF loya Powes Parkop i klostu bungim birua long dispela wik taim em i wantaim famili bilong em i go long ka na wan-

pela trabelman i sut long ol long sotgan. Katres i abrusim ol na brukim glas bilong ka na Mista Parkop wantaim famili bilong em tekov na abrusim dispela birua.

Long dispela moning we birua ya i kamap Mista Parkop i bai igo long Waigani Kot Haus long mekim kot bilong ol soldia lain husat i bin kisim sas long taim bilong Sandlain hevi. Ol dispela soldia em lain bilong Meja Walter Enuma. Na tu i gat wanpela kot bilong wanpela palamen memba tu we Mista Parkop bai holim long dispela sem taim. Kot i no kamap bikos long dispela hevi na Jas i surukim kot i go long narapela taim gen.

* 4-pela plisman husat em Plis Komisina John Wakon i saspenim long wok bilong ol i kisim kot pinis long stapim dispela oda bilong Mista Wakon long rausim ol long wok bilong ol.

Ol i askim kot long rausim dispela oda bilong Plis Komisina na ol i ken stap yet long wok bilong ol inap kot yet i klaiam dispela oda bilong Komisina na toktok bilong ol. Long Mande dispela wik John Wakon i mekim dispela toktok long saspenim ol dispela foapela plisman husat i wok long toktok egensim wok bilong plis

edministresen. Em i tok tu long salim ol i go aut long arapela provins long mekim wok bilong plisman na i no bilong stap tasol long opis na wok we ol i bin mekim longpela taim i kam.

Ol plisman long Hagen, Rabaul na Momase i tok ol i sapatim foapela plisman ya na askim Plis Komisina John Wakon long lusim opis sotpela taim tasol na larim wok painimaut i kamap long hevi. Wanpela ripot i mas kamap long mekim klia olgeta samting ya orait bai wok bilong plis fos i ken ron gut.

* Kensa wod long Angau haus sik long Lae i pas pinis bikos i nogat masin bilong sekim sik kensa na kukim kensa i bagarap. Angau haus sik i tok dispela hevi bai kamapim bikpela hevi moa long ol manmeri insait long PNG husat i gat sik kensa long arapela provins na haus sik i salim ol i go long Lae.

Angau haus sik siaman Mark Humphries i tok dispela em bikpela hevi bikos Angau haus sik em wanpela haus sik tasol we i gat masin bilong sik kensa. Tasol nau ol manmeri wantaim sik kensa i ken go olgeta long Australia long kisim marasin. Em i sutim tok long Gavman bikos distok baim dispela kensa masin bikos Angau haus sik yet i nogat kain

mani inap long baim dispela masin.

* Japan Gavman i givim namba tu bikpela helpim tru long stretim ples balus long Mosbi. Jacksons ples balus long Mosbi nau i gat ol nupela masin bilong helpim ron bilong balus na tu long taim balus i kam pundaun. Olgeta masin ya i gat bikpela wok bilong ol long mekim olgeta wok na ron bilong balus i gutpela isi. Na dispela ken daunim gutpeli ol birua na o hevi ol balus inap bungim long ron bilong ol o i kam bilong ol long ples balus. Ol masin bilong lukautim na was long ol balus long ples balus i olpela na planti i no gutpela moa long wok wantaim ol nupela senis nau i wok long kamap. Olsem na Japan Gavman i stretim dispela samting gen wantaim ol nupela masin. Japan Gavman i bin mekim kamap Jacksons ples long Mosbi we ol i opim long las yia. Nau em givim gen namba tu helpim long sait bilong ples balus we i helpim ron bilong balus na ol pasindia.

* Madang Gavana Jim Kas i rabisim stori we i kamap las wik na i tok ol sampela lain long Madang i bin killim man na kaikai. Jim Kas i tok dispela stori ino tru bikos ol wokman bilong em i sekim na painimaut long dispela samting.

spot WANTOK wiken

Wantoks i soim strong yet

WANTOKS i soim strong yet olsem em i gat laik yet long pilai insait long grenfainel bihain long gutpela win long Sarere. Wantoks i wilwilim stret Gazelle long surik i go long namba tu ples.

Mazda husat i sindaun long namba tu ples wanpela wik tasol i lus long AB Bears 6-3 long bikpela gem long wiken. Dispela win bilong AB Bears tu i mekim ol i winim maina primiasip long namba seven taim nau.

Las wiken em las gem bilong sisen propa. Na ol fainels bai stat long dispela wiken.

Insait long arapela A gret gem, Norths i winim Malangan long fofit na All Stars autim Chebu 2-1.

Kompetisen lata i sanap olsem nau Bears 26, Wantoks 21, Mazda 20, Norths 18, All Stars 12, Gazelle 11, Chebu 2 and Malangan 2.

Wantoks nau bai salensim AB Bears husat long painim aut husat bai wet long grenfainel, na Mazda bai bungim Norths. Wanem tim i lus long gem bilong Mazda na Norths bai aut olgeta.

Tingting bilong Mazda long holim yet namba tu ples i stat long namba tu ining we Helen Singiat i wokim wanpela bant na ran i go long namba wan bes na bihain em i surik i go long namba tu bes.

Taim yangpela Alice Kalas i paitim wanpela gutpela bal i go namel long lep autfil na senta autfil, Singiat ran i kam long wokim namba wari poin bilong Mazda.

Kalas na narapela yangpela pilaia

POM WIMENS SOFBAL RIPT

Tara ToMangana i no kam hom bikos beta Shirley Tiriman i no paitim gut bal long bringim ol i kam hom.

Pitsa bilong Mazda Selina Karai i kamapim gutpela pits na stapim plan- ti ol gutpela beta long winim paitim bal na skorim poin.

Bears i skroim poin long namba wan ining bihain long ketsa bilong Mazda Tiriman i no tromoi gut bal long namba tri bes we AB Bears i skorim tupela poin.

Pitsa bilong Bears Maggie Joseph i holim stret ol top beta bilong Mazda na ol i no skroim wanpela poin insait long tripela arapela ining.

Insait long namba foa ining, AB Bears i kisim arapela tupela poin i kam long Tessie Komek na Kelen Tatai bihain long lapun Delin Bais i paitim wanpela gutpela bal stret we Bears i go pas long poin 4-1.

Bears husat i kisim taim long han bilong arapela wik, i autim olgeta bel- hevi long Mazda. Joseph i surikim skoa i go long 5-1

Long namba foa ining, infil bilong Bears i paul liklik we larim tupela pilaia bilong Mazda Selina Karai na Tara ToMangana i kam hom long mekim skoa nau i sanap 5-3.

Orait Inguba i kam pasim skoa buk wantaim gutpela ran long helpim AB Bears i winim dispela gem 6-3 taim Delin Bais i paitim wanpela gutpela bal stret.



• Misis Higgins i givim yunifom long presiden bilong Star Mountain skul soka John D'Siguria na ol skul boi na tisa i amamas stap. Foto: Patrick Levo.

Ok Tedi Pukpuk kisim nupela yunifom

PATRICK LEVO i raitim

NESENEL Anda 10 soka sempion, Ok Tedi Copper Pukpuks, bai traim winim gen taitel bilong em long 2000 nesene Orogen skul soka sempionsip long Lae.

Star Mountain Skuls Soka Asosiesen i kisim nupela yunifom long namba wan sapota bilong ol, Mrs Diana Higgins. Misis Higgins em meri bilong patron bilong skuls soka na tu menesing dairekta bilong OK Tedi, Roger Higin. Tupela wantaim i save givim bikpela sapot long skuls soka insait long Tabubil.

SKULBOIS SOKA RIPT

Dispela nupela yunifom em Star Mountain Clothing fektori long Tabubil yet i mekim. Misis Higgins i baim ol samting klos bilong wokim yunifom na em bai SMCFF long samapim ol yunifom.

Meri bilong Menesing Dairekta i tingting long yusim dispela yunifom long gren fainel long dispela yia tasol presiden John D'Siguria i senisim tingting na laik Anda 10 i putim long traim winim bek taitel.

Em i tok ol skul nau bai traim baim soka yunifom bilong ol.

SMSSA Copper Pukpuks i winim Anda 10 sempionsip bihain long ol i winim Sen Joseph bilong Pot Mosbi 2-1 long las Julai.

Mista Siguria i tok soka sisen bilong Stau Mountain Skul Soka Asosiesen bai kirap bihain long namba wan skul holido.

Nau yet i gat bikpela wok redi long long holim presentesen nait bilong ol. Ol bikpela toktok bai kamap long presentesen em awot bilong junia futbala bilong yia we Ela Motors i sponsarim.

Nesene Soka Kosing uairekta Edris Kumbuwah bai kamap olsem wanpela spesel ges long dispela awot nait.

Manalos kisim taim long NGI

HIH Manalos i gat gutpela sans long winim tupela gem long wiken tasol olgeta tingting ya i popaia.

Long Sarere, Manalos i wilwilim stret yangpela Tigers tim 6-1 tasol long Sande ol i kisim taim long han bilong NGI 7-2.

Insait long arapela gem, Hawks i nekim Dolphins 8-1, Gazelle winim Elcom 6-2, Jollibee MSC winim Malangan.

Gem namel long AB Bears na Tiges i no kamap bikos long bikpela ren i kamdaun long Sande apinun.

Manalos i statim gem wantaim wanpela hom ran i kam long Philip Samuel husat i paitim wanpela bal bilong pitsa Michael Pukai go abrusim banis.

Tasol NGI i no larim dispela hom ran i daunim ol. Ol i bekim taim Nason Albert i kam hom bihain long yangpela Blaise Tatai i paitim wanpela bal i go long lep autfil long Albert i luk nais.

Manalos i paitim arapela hom ran taim Jerry Albert i paitim wanpela baundri hit long surikim skoa. Albert em wanpela intanesenel sot stap bilong nesene tim.

POM MENS SOFBAL RIPT

Kosa Sinia Blaise Paivu i mekim sampela toktok we NGI i stat long kamapim gutpela gem na ol i skorim 6-pela poin long dispela ining we i kam long Leonard Palauva, Blaise Paivu Junia, Francis Bejigi, Albert, Tatai na Pukai.

Dispela taim nau NGI i go pas wantaim skoa 7-2 insait long namba tri ining. Kosa rausim Pukai na senisim em wantaim arapela pitsa Patrick Gili.

Gili i kamapim gutpela gem stret wantaim Albert na tupela i no larim ol beta bilong Manalos i skorim poin.

Manalos i taitim infil bilong ol na i no larim wanpela man i skoa. Las skoa bilong Manalos em i kamap long namba faiv ining we Severin Baibai i kam hom long mekim skoa i luk nais.

Poin lata nau i sanap olsem Bears 27, Hawks 22, NGI 22, MSC 21, Brown Eagles 19, Elcom na Manalos 18, Malangan 14, Tigers 10, Raiders 10 na Dolphins 4.

Royals daunim Malangan

ROYALS i winim Lift Malangan 2-1 insait long Mt Hagen wimen sofbal resis long Sarere.

Ol plismeri i kamapim wanpela gutpela gem stret we i stapim ol biknem beta bilong Malangan long skoa.

Long namba wan ining, kepten bilong Malangan Judy Nauvana i kamapim wanpela gutpela pilai we em i kam hom long opim skoa buk.

Tasol dispela skoa i stap liklik taim we infil bilong Royals i putim breks na nogat wanpela pilaia moa bilong Malangan i kamap long hom bes.

Ol infilda bilong Royals olsem

MT HAGEN SOFBAL RIPT

Monica Kundi wantaim ol arapela wan pilai bilong em i strong tru na banisim gut Emma Markis, Pauden Markis na Ellie Hangat long skorim poin ya.

Bihain long skoa bilong Nauvana, i nogat wanpela poin i kamap long tupela tim wantaim i go inap namba tri ining.

Wanpela biknem hita bilong Royals Julie Magadima i paitim wanpela gutpela bal na yangpela Brandy Kundi i kam hom

long levelim skoa 1-1.

Tupela tim i wok long pait hat tasol nogat wanpela skoa i kamap.

Malangan tu i gat sampela strongpela gem we ol pilaia olsem Hilda Markis, Joyce Muli, Theresia Sarum i wok long traim salim Nauvana tasol nogat ya, ol Royals i blokim olgeta rot long skoa.


Tasol long namba faiv ining, Magadima na Monica Kundi i strong tru na helpim Brandy Kundi long mekim seken hom long winim gem bilong Royals 2-1.



• Fainel bilong Praivet Kampani netbal kompetisen i kamap las Sande na ol tim i brukim bun stret.

• Antap: Shirley ToMangana bilong Mazda i wokim wampela bant na ran i go long namba wan bes egensim AB Bears long Pot Mosbi wimens sofbal. AB Bears i win 6-3.

• Lephon: Frederica Siwin bilong Cellnet i sambai na redi long hamarim bal i go long umben bilong NPF. Cellnet i win 2-1.



• Antap : Pilaia bilong Country (holim bal) i laik bruk lusim takol bilong Cougar insait long Poreporena Ragbi Lig kompetisen long Sarere. Country win 18-0.

• Lephon: Justus Baba bilong Police i pulim bal insait long NCD Pablik Sevans soka resis. Police tim tu i stap long fainel.

Oi poto: ISAAC IKUAVI na JOE IVAHARIA

Boksing makim Osenia tim

HENRY MORABANG i raitim

PAPUA Niugini Boksing Yunion i makim pinis wanpela skwat bilong em long stap insait long Osenia Boksing sempionsip bai kamap long Samoa long dispela yia.

Dispela skwat i gat 11-pela boksa na 5-pela opisel olgeta.

Biknem Lynch Ipera i stap tu long dispela skwat. Em bai traim long winim wanpela spes long dispela pait.

Skwat bilong PNG em: Tony Miriks (48kg), John Darren, Sam Muzoki (51kg), Lynch Ipera, Raphael Perex (54kg), Eserom

BOKSING RIPOT

Gerea, Ronnie Charlie (57kg), Simon Efi, Steve Elias (60kg), Chavis Kora, Timothy Pomei (60.5kg).

Ol opisel em: Albert Beau Gerring - kosa, Raphael Kora - asisten kosa, Steven Tsivele - tim menesa/PNGABU deliget, Paulin Loi - team manegress and teknikel opisel Alywin Loi.

Ipera na Perex i stap wantaim long sem divisen. Olsem na bai gat gutpela salens bikos Ipera i bin winim silva medal long Olimpik long 57kg divisen. Na Perex em i sempion long PNG taim em i winim taitel long Tabubil las yia.

Kosa bilong tupela i askim tupela long tren long daunim hevi bilong olsem na ol i ken pait long 54kg.

Ipera i no bin go pait long Tabubil bikos i gat paul toktok long husat tru bai baim tiket bilong em.

Miriks, Darren na Eserom i winim medal long Sydney Gems 2000 we ol i traim boksing ring las yia. Miriks kisim silva na Darren na Eserom i kisim bronz medal long dispela ol pait.

Steve Elias em wanpela sempion paitman husat i pait long Osenia Gems long 1997 long Pot Mosbi na tu i bin go stap long

Arafura Gems long Darwin, Australia.

Arapela gutpela na strongpela boksa em Chavis Kora. Em i wanpela gret 12 studen long Aiyura Nesenel Hai skul na em i bin stap long planti intanesenel tonamen pinis.

Long ripot bilong PNGABU, Miriks, Eserom, Darren na Ipera em ol memba bilong PNG elit skwat na ol bai gat sans long go tren long Melbourne, Australia, na bihain ol i go long Samoa.

Dispela ol pilaia em ol bikman bilong boksing long Osenia i makim ol bihain long gutpela pait

bilong ol long Saut Pasifik Gems long Guam las yia.

Muzoki, Ronnie, Simon na Kora i bin bin kamap long nesenel sempionsip long Tabubil, tasol PNGABU i makim ol bikos ol i gat bikpela bilih olsem ol boksa ya bai kamapim gutpela nius long boksing ya.

PNGABU nau i singaut long ol kampani long helpim ol long mani long salim tim. Sapos wanem kampani i laik helpim i mas ringim Steven Tsivele 3226635 na Alywin Loi long 326725.

Boksing em wanpela spot we planti man i ting i ken winim gol medal long Sidni Olimpik Gems long Septemba.



• Sampela ol yangpela bilong Hohola Texas husat i save soim stail long tas kompetisen olgeta Sarere.

Brown Eagles winim top spot gen

BROWN Eagles i winim bek namba wan posisen long poin lata bilong Goroka sofbal kompetisen bihain long wanpela gutpela win las wiken.

Em i winim Gazelle 8-5 na bihain mekim save long Karanas 7-2 long surik i go antap long namba wan ples. Las wik em i kamdaun long poin lata bikos em i dro wantaim

Malangan na lus long Burmah Hawks 3-7.

Malangan i strongim namba tri ples bilong bihain long gutpela win bilong em. Em i autim Royals 5-3 long Sarere, na long Sande em i wilwilim stret Burmah Hawks 9-4.

Insait long arapela ol gem, Gazelle i autim Barbarian 15-14 na Karanas tu i mekim save long sem tim, 7-6.

Poin lata nau i sanap olsem Brown Eagles 48, Gazelle 38, Malanga 34, Hawks 29, Karanas 25, Royals 21 na Barbarians 19.

Gem bilong Brown Eagles egen-sim Gazelle em ol i mas win.

Kosa na pilaia Sebyy Womola bilong Brown Eagles i kmapim gutpela pait stret na helpim pita Malcom Ravin long autim ol beta

bilong Gazelle.

Brown Eagles i rekotim foapela win bilong em long namba tu ining i kam long Goodfut Akimoro, Willie Tamenao, Michale Titus na Fiu Toshi.

Gazelle i no skorim wanpela poin Gazelle i skorim gen arapela foapela insait long namba foa ining long win.

Dats redi long 2000 sisen

POM DATS RIPOT

POT MOSBI Dats Asosiesen i singaut long ol klab long baim nominesen na rejistresen fi bilong 2000 sisen.

Presiden bilong PDA John Maliku i tok nominesen fi em K150 na rejistresen fi bilong wanwan pilaia em K20. Nau yet i gat tingting long apim pe bilong rejistresen fi i go long K30 tasol ol i mas wetim disisen bilong miting bilong kepten. Dispela miting bai kamap long Februari 26

Long redim ol long dispela sisen, Maliku i askim olgeta klab kepten long kamap long wanpela miting long Luwanga Hall insait long Gerehu Katolik sios.

Insait long dispela miting, bikpela samting we ol bai toktok long em rejistresen fi. Dispela fi bilong K20 i stap longpela taim pinis, na nau ol i laik traim surikim i go long K30.

Maliku i tok pe bilong wokim samting i go antap, na dispela em i astinging we ol eksekutiv i laik apim pe bilong rejistresen.

Sisen propa bilong Pot Mosbi Dats bai stat long namba wan wik bilong mun Mas. Kompetisen ya em tim resis.

Insait long arapela stori, Maliku i tok Pot Mosbi bai salim 30 pilaia (man na meri) long makim Pot Mosbi long nesenel klab sempionsip long Lae. Bikpela astinging em long traim winim bek taitel.

Pot Mosbi em i sempion tim na ol bai traim long kamapim gutpela stail we i ken daunim ol birua bilong ol ya.

Rabaul redi long holim 2000 sofbal sempionsip

PRESIDEN bilong PNG Softbal Federesen Nelson Paulias i tokaut olsem wok redi bilong 2000 nesenel sofbal sempionsip i wok long kamap pinis.

Namba wan bikpela wok em stretim ol ples pilai (pits) we ol wokman i putim graun na laik planim ol gras.

Paulias i tokaut olsem nesenel

sofbal federesen na tu loke asosiesen, Rabaul, i wok bung gut long traim mekim dispela sempionsip i kamap nambawan bikos dispela tu em bai makim namba 25 krismas long sofbal i kamap insait long PNG.

Dispela wok ya i kamap long Kwin Elizabeth Park, na ol arapela oval long Nonga na long Matupit

Ailan.

Presiden i tok i gat 8-pela oval olgeta ol bai yusim long holim dispela sempionsip.

Tupela lokel asosiesen, Kokopo na Rabaul yet i wok long hatim trening long traim winim taitel na holim long ples. Ol i laik soim olsem sofbal em bilong ol, na ol tim long arapela senta i mas lukaut gut.

Paulias i tok ol bikpela senta olsem Pot Mosbi, Lae, Madang, Goroka, Mt Hagen, Mendi, Wewak na Kavieng i soim laik pinis. Sampela ol arapela liklik senta i wok long mekim wok painim aut.

Em i tok nesenel federesen tu i kisim sampela askim i kam long painim haus slip. Na Paulias i laik tokim ol pipel, sapota na opisel

olsem haus slip i noken wari tumas bikos Rabaul i gat planti haus long slip.

Dispela nesenel sempionsip i stap insait long Gazelle eria tasol bikos PNGSF i nogat inap sapot long trenspot. Sapos sofbal i kamap long kainkain eria, em bai hat tru olsem na ol bai holim long wanpela eria tasol.

POM junia bai raun long Not Kwinslen

JUNIA LIG RIPOT

Mosbi Anda 17 tim i bihainim wanpela askim i kam long Not Kwinslen Cowboys long Pot Mosbi i ken stap insait long wanpela tonamen bilong makim developmen skwat bilong Cowboys we bai kamap long Mas 4-11.

Nem bilong ol pilaia em Jacob Magaru, Billy Seri, Ivan Ravu,

Carlos Valavu, Robert Hova Koi, Steven Poni Auka, Joe Mairave, Wesley Jeffrey, Soroke Wirito, Kenneth Jacob, Yat Masse, Bon Yaka, Kins Mai, Ware Metofa, Hogota Douglas, Joshua Lapa, Sam Zacharius, Joel Martin, Chris Ben na Jackson Dom.

Ol riserv pilaia em Henry Ravu,

Fred Steven, Steven Samson, Slado John Torris Jacob, Peter Orani, Steven Vince and Japhet Tade.

Kosa bilong dispela tim em Adrian Genolagani na tim menesa na trena em Veks Baro.

Dispela Pot Mosbi Anda 17 tim bai salensim wanpela anda 17 tim

bilong Marshall Lagoan long Februari 26. Bihain long dispela salens, tim ya bai lusim kantri long mekim wokabout bilong ol.

Pot Mosbi Junia Lig i makim K500 olsem levi fi bilong wanwan pilaia. Na de bilong baim dispela fi bai pas long Februari 27. Sapos wanem yangpela pilaia i no painim mani long bai fi ya bai aut na arapela ol nupela lain bai kisim ples bilong ol.

POT MOSBI Ragbi Futbol Lig i makim pinis wanpela Anda 17 skwat bilong em long go raun long Not Kwinslen neks mun.

Dispela tim ya bai raun inap wanpela wik olgeta long Australia na pilai wantaim ol skul insait long Townsville na tu egensim Cairns Anda 17 tim. Dispela gem ya bai kamap long Barlow Park long Cairns yet.

Dispela wokabout bilong Pot

PNGFA bai glasim ol afiliesen fom

PNGFA RIPOT

HENRY MORABANG i raitim

PAPUA Niugini Futbol Asosiesen (PNGFA) i bai glasim olgeta afiliesen fom na bihain bai givim membasp long ol soka asosiesen kamap olsem memba.

Dispela em wanpela nupela rot we PNGFA i laik skelim gut wok bilong soka insait long kantri.

Jenerel Sekretari bilong PNGFA Ivan Ngahan i autim dispela toktok long wanpela edvetismen we i sin-

gautim ol asosiesen long baim afiliesen fi bilong yia 2000 i go long PNGFA.

Ngahan i tok olgeta aplikesen bai pas long Februari 29. Na wanwan asosiesen i mas baim K2250. Sapos wanem asosiesen i sot, orait em i ken baim hap pe tasol we i sanap long K1125.

Em i tok wanem asosiesen i laik kamap memba i mas bihainim ol dispela astoktok long kamap memba;

- yusim rait aplikesen fom
- Mas tokaut olsem ol bai bihainim status, regulesen na disisen bilong FIFA

• Mas tokaut olsem ol bai bihainim lo bilong soka game wantaim PNGFA

• Mas tokaut olsem ol bai bihainim konstitusen, rul, regulesen na disisen bilong PNGFA

• I mas salim konstitusen bilong ol i go long PNGFA

• Salim intenal ogenaiesen na developmen plen bilong wanwan asosiesen long PNGFA

• I mas kamapim fainensal ripot soim olsem ol i gat mani olsem wanpela soka asosiesen

• I mas tokaut sapos soka asoisiesen em rejista olsem wanpela

kampani we i ken mekim bisnis o nogat

• Wanem asosiesen i gat dinau long PNGFA i mas stretim pastaim bipo ol i ken salim aplikesen fom long kamap memba, na las tru

• I mas baim K2250 o hap pe bilong dispela long kamap memba.

Ngahan i tokaut olsem dispela ol as toktok long kamap memba em bikpela samting tru. Sapos wanem asosiesen i nogat o i no wanbel long dispela astoktok bilong PNGFA, orait noken westim taim long salim aplikesen fom.

PNGFA bai glasim ol aplikesen na sapos em i wanbel; em bai

givim wanwan asosiesen dispela ol samting;

- Setifiket bilong membasp
- Registresen namba
- Konstitusen bilong PNGFA
- Ol dispela asosiesen bai amamas long stap insait long wanem kain he:pim PNGFA i kisim long Ofsiana Futbol Konfederesen o FIFA.

Insait long arapela soka stori, PNGFA nau i gat nupela opis i stap long Haus Tisa long Seken Strit, Lae.

Nupela post opis adress em P.O. Box 2211, Lae 411, Lae, Morobe Province. Na telepon namba em 479 1998, na feks em 479 1999.

Boksing ring i stap long Tabubil

NESENEL boksing bodi, Papua Niugini Boksing Amata Boksing Yunion bai mas painim mani long bringim boksing ring i kambek long Pot Mosbi na salim i go long Lae we ol bai holim nesene sempionsip.

Dispela boksing ring nau i sindaun long Tabubil bihain long ol i yusim long nesene sempionsip long las Septemba.

Presiden bilong Tabubil Amata Boksing Asosiesen (TABA) Moxie Yore i tok ogenaiesing komiti bilong em wantaim helpim bilong Ok Tedi Main, ol i kisim dispela ring i go long Tabubil.

Em i tok siping kampani bilong Ok Tedi i karim long Pot Mosbi na kisim i go long Kiunga na ol i karim i go long Tabubil.

Yore i tok TABA i nap helpim nesene boksing bodi, PNGABU, long salim bek dispela boksing ring i go long Pot Mosbi, tasol em i no amamas long kainkain ripot i bagarapim gutpela wok bilong TABA long holim sempionsip.

PNGABU i no bin tromoi wanpela mani long traim helpim TABA long holim dispela sempionsip.

TABA wantaim ol sponsa olsem Ok Tedi Maining Limited i tromoi klostu K10,000 long bringim dispela boksing ring long sempionsip.

Yore i tok ol i rausim ring pinis na wetim tasol sapos PNGABU i ken painim mani na karim dispela boksing ring i go long Lae.

Sapos PNGABU i laik karim boksing ring i go long Lae, em yet i mas painim mani na kisim i go, TABA bai i no inap helpim.

Nau yet TABA i laik save wanem taim ol bai tokaut long nesene skwat bilong Osenia boksing sempionsip.



• Yangpela boksa Raphael "Axeman" Perex i sindaun wantaim tupela strognpela sapota bilong boksing Betty na Mike Tyson Levo bihain long Perex i autim tiket bilong sempion boksa Eserom Gereoo long nesene sempionsip long Tabubil las yia.

Nau yet TABA i gat tupela yangpela boksa i stap long tim. Nem bilong tupela boksa ya em Raphael Perex na Tim Pomei. Perex em wanpela yangpela skulboi long Tabubil Hai skul na em i gat bikpela sans tru long kamap wanpela gutpela boksa insait long kantri long bihain taim.

Nau yet i gat plen nau olsem Perex bai transe i go long Goroka Demonstresen Haikul long skul na tren long Nesene Spots Institut.

Vais presiden bilong TABA Patrick Levo i tokaut olsem em i wari nogut ol nesene boksing bodi bai tromoi tupela yangpela pilaia bilong em.

Em i tok em i no laik wankain pasin i kamap gen we skulbois soka i mekim long rausim tupela pilaia bilong Tabubil, na tok olsem ol i nogat mani long lukautim dispela tupela pilaia.

Wantok i no inap kisim toktok bilong presiden bilong PNGABU Steven Tsivele long dispela stori.

Edukesen i winim namba wan spot

NCDCPSSA RIPOT

EDUKESEN soka klab i winim main primia long division wan long soka resis bilong man na meri wantaim insait long NCD Pablik Sevans kompetisen.

Long kik resis bilong man, Edukesen i pinisim sisen wantaim gutpela gem stret we ol i wilwilim stret Fisheries 4-1. Dispela win bilong ol i mekim ol i winim namba wan ples olgeta.

Edukesen i sindaun long 29 poin, NPF 26, PNGBC 26, Police 23 na Teachers 21. Orait long resis bilong ol meri, Edukesen 32 poin, Teachers 27, Cellnet 26, NPF 26 na Police 24.

Dispela i soim olsem Edukesen, NPF, Teachers na Police i gat tim bilong man na meri long fainel. Na dispela i soim tru olsem ol dispela klab i givim moa trening na taim bilong ol long soka.

Presiden bilong PSSA Bede Tomokita i tokim Wantok olsem divisen wan i pinisim olgeta gem long las wik. Orait, nau ol bai wetim tasol divisen tu husat i gat tripela moa gem i stap yet.

Tomokita husat i bin presiden bilong Edukesen klab bipo em i kamap presiden bilong asosiesen i amamas tru long klab ya.

Em i tok taim divisen tu i pinisim gem, ol top faiv bai statim fainel bilong ol.

Skoa bilong ol arapela gem i kamap las wik i sanap olsem divisen wan: NCDC winim NSO 2-0, NPF drew wantaim Cellnet 1-1 na long resis bilong ol meri, NCDC fofitit NSO na Cellnet autim NPF 2-1.

Na long resis bilong divisen 2, Elcom winim Atoni Jenerel 1-0, BPNG autim Commerce 2-1, APNG nekim NCDC 2-1 na long soka bilong ol meri, Atoni Jeneral wilwilim Elcom 4-1 olsem bekim dinau long man ya, BPNG fofitit Commerce na kisim tupela isi poin stret ya.

Madang tas sisen stat

MADANG TAS RIPOT

MADANG Taun Tas Asosiesen i pinisim pri-sisen na statim sisen propa bilong em las wik Sande long Laiwaden oval.

Long pri-sisen semi fainel, Kamas na Mac 49 i salens na Mimlon i bungim Mix Mates long wimens divisen.

Insait long semi fainel bilong ol man, Mix Mates i salensim Leftouts na Newtown mekim save wantaim Magpies.

Long grenfainel, Mac 49's i pilai wantaim Mimlon na Mac 49's i winim dispela em long teknikel graun.

Gem bilong ol man i gutpela tru we tupela tim wantaim Mix Mates na Magpies i kamapim strongpela gem.

Mix Mates i skorim namba wan poin taim Eddie Mark i putim trai. Em i kisim gutpela sapot pilai stret i kam long barata bilong em Oddie.

Magpies ibekim bihain long gutpela gem i kamap namel long Arthur Wari na Christy Brown we ol i setim Samson Zorika long levelim skoa 1-1. Dispela skoa i sanap i go inap long hap taim.

Insait long namba tu hap, Mix Mates wantaim ol riserv pilaia olsem Willie Kunai, Manuai Abau, Aloy Molean,

Joshua Sarufa, Bade Soko, Sam Joe Nice An na Linus Kein i wok long brukim difens bilong Magpies.

Tasol ol pilaia bilong Magpies olsem Zorika, Brown, John Berigami, Glen Begani na Ray Parangkei i no givim sans long Mix Mates.

Ol arapela pilaia olsem Rio Ravu, Colline Kelly, Able Towas na Jonathan Laia i givim gutpela sapot strong long Magpies na tupela tim i dro 1-1.

Orait long ekstra taim Ray Parangkei i putim trai bihain long em i kisim wanpela gutpela bal long Abel na John long skoa.

Tasol long dispela sisen i luk moa gutpela bikos nau i gat 14 men na 8-pela wimen tim bai resis.

MT HAGEN NAINS RIPOT

Pait i bagarapim Hagen 9s tonamen

BIKPELA PAIT namel long Frozen Souls na Warakum Bulls long gren fainel bilong Mt Hagen Ragbi Lig Naines tonamen i bagarapim gutpela nem na hatwok bilong ol opisil bilong dispela kompetisen.

Pait i kamap taim Bulls i putim wining trai na ol sapota bilong Souls i belhat na stat paitim pilaia husat i putim trai na ol arapela pilaia.

Dispela i pulim gen sapota bilong Bulls na ol sapota yet i stat long pait. Pait ya i kamapim bikpela bagarap we ol sapota i brukim glas bilong ol ka na tu ol stua i stap klostu long Pope John Paul oval.

Insait long grenfainel Joseph Kul i setim fulbek bilong em Nelson Pepa long putim wanpela trai. Orait stap liklik, Kuli setim gen arapela poro fowat bilong em Peter Kua long putim wanpela trai 10-0.

Insait long namba tu hap, John Passingan i lusim wok referi bihain long planti ol man i sutim toktok nogut long em.

Narapela referi i kisim wok na gem i stat long ran gut tru.

Bulls i putim wanpela trai.

Arapela trai ken i kam long Daniel Ken na Timothy long levelim skoa tasol ol sapota bilong Souls i no amamas na statim pait ya.

Ol sùtim pai long pes bilong bikman bilong IMF

Bangkok:

Bikman bilong Intenesenel Moniteri Fan (IMF) Michael Camdessus long dispela wik i bin kamap wanpela long ol taget bilong wanpela bikhet grup husat i bin tromoim pai (kaikai) long ol man taim ol i no amamas long sampela samting.

Mista Camdessus i stap insait long wan-

pela bikpela bung bilong Yunaitet Nesens loing Bangkok, Tailan we ol i wok long holim ol tred toktok.

Na dispela grup ol i kolim long Patissiers sans Frontieres (Bakers without Borders) i tromoi pai long pes bilong bikman ya taim em i kirap na i laik givim laspela hap long

toktok bilong en.

Ol bin wokim tu wankain pasin long ol arapela bikman olsem Bill Gates em biknem bilienia bilong Amerika husat i papa bilong Maikrosaf kompyuta na olpria lida bilong Wol Tred Ogenaisesen renato Ruggiero na

muvi piksa dairekta Jean Luc Godard.

Tasol long wanpela bung wantaim ol niusman, Mista Camdessus i bin lap na tok olsem dispela pasin i hap bilong wok na em bin amamas long kaikai ol hap swti krim we i bin pas long han bilong em i stap.

Wahid tok Wiranto bai holim wok olsem Difens Minista

Biknem ami man na Difens Minista long Gavman bilong Indonesia Jenerel Wiranto bai holim wok bilong em inap long kabinet i wokim disisen bilong en long em long dispela wik, ol riport i tok.

Presiden Abdurrahman Wahid i no rausim em yet, olsem em bin wok



• Jenerel Wiranto, pastaim bos bilong ami long Indonesia long olpela gavman bilong Suharto na nau em i stap olsem Difens Minista long nupela demokretik gavman bilong Presiden Abdurrahman Wahid. Em bai stap yet long holim wok olsem Difens Minista. Piksa i kam long Courier Mail niuspepa.

long tok planti taim em bin stap long ovasis trip we em bin kisim tupela wik long en. Na em i go bek long Indonesia long wiken tasol.

Presiden Wahid i wok long tokim Jenerel Wiranto long risain long kabinet bikos ol wok painimaut i tok em bin go pas long ol tabel, kilim na dai bilong planti pipel long Is Timor bihainim hevi we i bin kamap long ailan provins long las yia.

Tasol ol riport long dispela wik i tok Presiden Wahid i tok Jenerel Wiranto i ken holim wok long nau inap long kabinet i wokim tingting bilong en long raism em o larim em i stap.

Presiden Wahid i tok em bai i no inap long paiarim em long wok bikos em i gat bikpela luksave long en.

"Mi no inap long paiarim em bikos mi gat bikpela luksave long en. Bai mi givim em gutpela wok tasol i no long kabinet," Mista Wahid i tok.

Jenerel Wiranto bai skruim wok olsem bos bilong difens inap spesel kabinet grup i pinisim ol wok painimaut long ol hevi na bagarap na dai insait long ol tabel we i bin kamap long Is Timor las yia.

Kabinet Seketeri Marsilam Simanjuntak i tok sapos riport i painimaut olsem Jenerel Wiranto i bin rong, em bai kamap long kot.

Tasol Jenerel Wiranto i wok long strongim sait bilong em olsem em no wokim rong long taim bilong hevi insait long Is Timor las yia.

Dili, Is Timor: Portugal laik helpim Is Timor

Presiden bilong Portugal, Jorge Sampaio i bin bungim ol lida bilong Is Timor long wiken long toktok long wok bilong stretim bek gen teritori we pait bilong las yia i bin bagarapim tru ples.

Mista Sampaio em i namba wan bikman bilong Portugal long go lukluk raun long hap ailan we em (Portugal) bin lukautim long 400 krismas bipo em i lusim taim ami bilong Indonesai i bin tekova long en long 1975 na lukautim inap long las yia.

Mista Sampaio i tok tripela de wokabaut bilong em i go long Is Timor i bin kamapim gutpela samting bikos Portugal i laik helpim Is Timor we i olpela poroman bilong em. Mista Sampaio i bin tokim Is Timor lida na Nobel Prais wina Jose Ramos-Horta olsem Portugal i laik wokim pren pasin wantaim Is Timor na strongim na skruim wok namel long tupela na ol ken stretim ples na ol samting we i bin bagarap long taim bilong pait.

Is Timor i wok long bungim hevi long sait bilong mani long traim stretim na bildim bek ples na ol samting we ol soldia bilong Indonesia na ol sapota bilong ol i bin kukim na bagarapim las yia long taim bilong pait na hevi taim provins i kisim indipenden vot na bruk lusim Indonesia.

Mista Sampaio i bin singaut gen long ol kantri we i bin bung long Tokyo na givim promis long helpim Is Timor long mekim kamap dispela promis bilong ol.

Kas bilong pilai netbal famili

Dispela tripela susa na wanpela brata em ol wokim histri olsem ol netbal sta o olgeta ya i makim Kwinslen sait long anda 17 netbal representetiv em.

Piksa i soim Keit Saunders husat i gat 21 krismas (long baksait), ol susa em Malina 18, Helen 22 (namel rait na Kalina 16. Olgeta ya i save laikim tru pilai netbal. Piksa i kam long Courier Mail Niuspepa

Taim Kalina Saunders i wok long stap long trening lista bilong Anda 17 netbal skwat long Kwinslen, em bin gat wari bikos dispela Gret 12 sumatin i wok long gat bikpela tingting sapos em bai go insait long lainol skwat long makim Kwinslen long pilai netbal. Tasol em i amamas tru nau bikos ol i kolim nem bilong em olsem wanpela skwat memba.

Taim ol i putim em long skwat, dispela i apim nem bilong famili we i gat biknem nau olsem foapela famili memba i makim pinis Kwinslen na kantri insait long ol bikpela netbal resis tonamen pinis.


Famili bilong em i kamap top olsem namba wan famili long histri bilong foapela pikinini olgeta i kisim biknem olsem ol netbal star.

Susa Helen Saunders wantaim 22 krismas i bin pilai wantaim Kwinslen Fiaibal long Komonwel Benk Nesen lig tim taim Keith 21 i pila wantaim anda 23 tim bilong ol man na Malina husat i gat 18 krismas i save pilai

wantaim Anda 19 sait. Bikpela susa Cloudina husat i gat 24 krismas i bin stap long sait we i makim Kwinslen long ol pilai ausait.

Dispela famili i gat histri na

nem long pilai spot bikos ankel bilong ol David Grant i bin save pilai ragbi wantaim Kenbra Raiders na mama bilong ol Margaret i bin pilai long Kwinslen sait long yangpela bilong ol.



Leonardo wokim nupela muvi piksa

Bipo long Leonardo i bin kisim pat long kamap long muvi piksa Titanic, em bin wanpela liklik ekta tasol we nogat man i save tumas long en. Naudisepla yangpela man husat i gat 25 krismas i wok long lap bikos em i gat biknem na ol bosman long ol muvi kampani i wok long askim em long wok na ekt long ol piksa bilong ol. Hau na dispela samting, biknem na olgeta lain i laik save long en na kisim em long wok na ol muvi fen i bihainim em long olgeta hap em i go en o ol i lukim em i afektim wok na laip bilong en?

Bihain long 18 mun taim muvi Titanic i bin kamap, Leonardo long dispela taim i wokim nupela piksa ol i kolim long The Beach. Ol i wok long wok long en long kantri Tailan. Bihainim Titanic na long grup bilong ol yangpela pipel husat i stap namel long 20 na 25 krismas, Di Caprio em i gat biknem moa yet. Na mani wantaim. Tasol bihain long Titanic muvi we i pulim moa long bilien dola, em bin stap nating. Na em no wari wari na em save go pati wantaim ol poroman bilong em long Hollywood Hills na Crescent na Sunset Boulevard, draivim blekpela jip bilong em.

Em i tok biknem na luksave em i gat bihainim Titanic i bin givim em planti gutpela samting we pastaim na ol arapela ekta i save driman long en tasol. Em i givim em fridom tu.

Ol riport i tok nau i gat ol toktok olsem Leonardo bai ekt long Star Wars muvi na em i wok long toktok long dispela wantaim George Lucas, man husat i go aps long dispela na

em i ofaim em US\$20 milien long kamap olsem bikpela ekta long muvi bilong em.

Leonardo i tok muvi The Beach i stori long man i laik painim paradais long graun na kibek bilong em taim em i laik painim dispela. Em i stori long wanpela yangpela man Amerika (we Leonardo yet i ektim) husat i go malolo na raun long Tailan long painim nupela ekspeiriens, etventja na laip. Tasol long hap, em i bungim wanpela raun man ol i kolim long hipi na em i tokim em olsem tupela bai go long wanpela sikret ailan we nogat man o turis i save long en. Leonardo i mein ekta na Danny Boyle i ekt olsem hipi. Narapela man long muvi em Andrew MacDonald husat i bin go pas long narapela muvi piksa long 1997, Transpotting.

Di Caprio i tok planti pipel i save gat rong tingting long ol man o meri husat i kisim biknem olsem muvi ekta.

Em i tok planti pipel i save ting olsem ol muvi ekta i save gat gutpela laip olsem ol i stap long paradais na ol nogat hevi, nogat ya.

Em i tok long em yet em i gat tupela sait. Dispela we pablik na ol fens i lukim em olsem na laip tru tru bilong em yet we em i tok i no wankain olsem dispela piksa we pablik i lukim em olsem.

Em i stap singel yet na ol kain meri we em no save laikim em long ol dispela we i save kon na giaman, ol dispela i save wokim ol tok baksait na ol dispela we i save laik yusim sans long apim nem bilong ol.

Briten bai was long ol lain nogut

Briten bai glasim gut tru ol lain bilong kantri Afghanistan husat i wok long aplai long kamap olsem sitisen bilong Ingran.

Dispela em ol lain we ol haijeka i bin holim ol na larim i go fri bihain long ol i haijekim Ariana jet balus long las wik Mande.

Ol atoriti i tok ol haijeka bilong Afghanistan yet i aplai tu long kamap olsem sitisen bilong Ingran.

Ol ripot i tok 74 pasindia long dispela haijeka balus i aplai pinis long stap olgeta long Ingran bikos ol i pret na les long go bek long ples bilong ol we i gat hevi long en. Long ples bilong ol, ol nogat fri dom. Ol meri bai werim longpela klos we i haitim olgeta bodi bilong ol, stat long gras long het i go daun long lek. Ol save fosim ol man long joinim Taliban paitman na olsem tu planti man i no laik go bek long Afghanistan.

Balus we i karim 150 Afghan pipel i bin pondaun long Stansted ples balus long London, Ingran. Pastaim ol haijeka i bin dairektim balus i go olsem long Kazakhstan, Uzbekistan na Moscow bipo ol i larim i pondaun long Stansted, London long las wik Mande. Ol plis i bin amamas long gutpela rot i ol atoriti i bihainim na nogat hevi i kamap taim balus i pondaun long

Stansted ples balus. Dispela ples balus i gat nem long Ingran olsem hap we ol haijeka i save tagetim na em i wanpela feveret ples balus bilong ol.

Ol bin kisim ol pipel i go long Hilton Hotel na taim ol i wet i stap long ol atoriti i wokim disisen long ol, ol i luk amamas na fri long tok tok na stap long Ingran.

Ol ripot i tok ol meri i luk amamas na lap na ol i rausim ol klos we i haitim pes bilong ol. Long ples bilong ol yet, ol bai paitim ol long pablik sapos wanpela hap bodi bilong ol i kamaut. Long foapela de, ol haijeka i bin holim ol olsem ol kalabuslain.

Ol ripot i tok 10,000 pipel bilong Afghanistan i aplai pinis long kamap olsem sitisen bilong Ingran. Sapos ol atoriti i no tok oraitim apliken bilong ol, ol ken kisim loya o ol humen raits grup long makim ol na stretim ol samting wantaim ol.


Home Afeas Seketeri Jack Straw i tok toktok bilong em i klia na dispela em olgeta lain husat i wokim haijek bai i go bek long ples bilong ol.

Em i tok Ingran i gat lo na ol lain husat i wok long aplai long kamap olsem sitisen i mas bihainim.



• Dispela liklik meri i wanpela bilong ol we ol haijeka bilong Afghanistan i bin larim i go fri long Ingran las wik. Piksa i kam long Courier Mail niuspepa.

Bikman bilong pilai i gat bikpela lewa long helpim ol turangu



Ankel Tim olsem ol pikinini ya em i kolim em i petron long Ankel na tripela susa Rochelle 11, Taryn Anta grup long Australia. Ankel ya wantaim 13 krismas na Kaitlyn 10 em Tim Horan husat i wanpela

ragbi senta pilai wantaim Wallabies.

Taim foapela yangpela ya i save toktok long Ankel Tim, ol no bin klia tumas husat em inap long posta piksa long haus i autim sikret bilong ol. Horan nau i go insait long wok bilong helpim ol pikinini we papamaam bilong ol i no sindaun gut o ol lusim ol na ol i stap long lukaut haus.

Tripela yangpela ya nau i save go na pilai wantaim ol pikinini bilong Horan. Taim Horan i bin winim laki tiket long Wol Kap, em bin katim AusD\$4,400 long helpim Anti na Ankel Klub na nau em i save strongim wok long karimaut wok long klub.

Long em yet em bin gat gutpela famili laip na em i save long helpim ol dispela we i stap long hevi.

Piksa i kam long Courier Mail niuspepa.



• Aleesha Rome i gat 19 krismas na em i gat olgeta as long amamas long en! Em i biknem yangpela pop musik singa long Australia we musik bilong em i wok long stap long top lista. Piksa i kam long Coirier Mail niuspepa.

Kamapim namba olsem singa

Ol bin painim em singsing long Krioke ba na i no long skol. Na ol bin kisim dispela piksa ausait long krioke ba we em i tok em hap ples we em bin bungim rot bilong kamapim biknem long musik wol. Nau nem na musik bilong em i kamap top long Australia wantaim ol singsing olsem Search My Heaven we i stap nau long namba 20 poin lista.

Rom em namba wan singa bilong Australia we ol i yusim musik bilong em long promotim muvi siris bilong Amerika ol i kolim long Party of Five in Australia. Dispela em i bikpela samting long gel we tupela krismas i go pinis i bin wok long karioke demo tep taim em i wok olsem risepsenis long peim ol bil. Rom i bilong Adelaide long Saut Australia.

Gulpili laik senis na helpim pipel bilong en

Biknem Aborigini muvi ekta David Gulpili laik helpim ol yangpela Aborigini pipel husat i gat nevi na kisim bagarap long strongpela dring.

Taim kot i bin salim bikman long tupela mun kalabus bikos em i rong long dring na draiv, em bin krai tasol nau ol aiwara i drai pinis. Dispela Aborigini man we planti man i save long en bikos em i wanpela ekta i stap yet long Berriman haus kalabus long Noten Teritori.

Long 1970's taim em i stap olsem wanpela yangpela manki tasol, ol bin kisim em long ples bilong em long Arnhem Land long stap insait long muvi piksa olsem Storm Boy, Walkabout, The


Last Wave na Crocodile Dundee. Em bin ekt wantaim sampela ol biknem dairekta olsem Nicholas Roeg na Peter Weir. David i bin gat dispela stail we i soim trupela pasin bilong ol asples Aborigini bilong Australia na pablik i bin laikim em tumas. Dispela i bin kisim em i go tu long lukim ol biknem ples na pipel long wol olsem long Holliwut, Buckingham Pales na Cannes Film Festival.

Long 20 yias, nem bilong em i bin save stap long nius tasol taim i nogat wok tumas bilong ol blekman long muvi long Melbon na Sidni long 1990, Gulpili i stap nating na stat long gat hevi long kisim strongpela dring.



• Piksa i soim Gulpili wantaim meri bilong em Robyn na ol hauslain long haus bilong ol. Piksa i kam long Courier Mail Niuspepa.

LAI PSTAIL



• **Lephan: Melanesian Bamboo Band i bin pilai long Madang Hotel.**

• **Nomei: Melanesian Mambu Ben bipo i save mekim pairap long Madang Resort Hotel long bipo.**

• **Aninit: Alfred Sibut lida bilong Melanesian Mambu Ben i kamapim nupela stail ben gen we i karim pairap bilong mambu yet.**

Melanesian Cool Figures bringim bek mambu

YAMES KAY i raitim

MAU long dispela taim bai yu harim olsem planti grup na musikman tru bilong Madang provins i wok long mekim nem bilong ol insait long redio na TV wantaim kain stail musik bilong ol. Planti manmeri i save harim na laikim musik bilong ol na planti rikwes tu i save kamap.

Tasol, sapos yu luku i go bek long histori bilong Madang musik klia tru, bai yu painim aut olsem long 1980s wanpela grup we i bin holim stret taitol long mambu ben musik em Melanesian mambu ben. Ol i bin rekotim tripela album bilong ol wantaim NBC Kalang Studios. Tasol long sampela yia bihain ol dispela lain i stap nating na i save pilai tasol long ol turis na ol manmeri long Madang Risot Hotel.

Narapela samting tu em lida bilong dispela grup Alfred Sibut em namba wan Madang musik man long rekotim solo album bilong em wantaim Pacific Gold. Rekoting ya i bin kamap long 1988 na sampela ol song insait long dispela album we i bin strong tru em *O Fatu, Fulei Gawai, Korosi na Ronda*. Yes, dispela man Alfred Sibut wantaim grup bilong em Melanesian Cool Figures i rekotim pinis wanpela nupela album bilong ol wantaim PGS na kaset ya i kamaut pinis.

Dispela nupela kaset bilong ol i gat kik stret na i gat karai bilong mambu ben tu i stap insait we i bringim bek olpela stail bilong Madang stret.

Dispela nupela album i gat planti gutpela kala tru wantaim stail bilong mambu ben tu insait na em i rait olgeta. Grup ya i singim wanpela song long tokples Fiji we i stail moa yet. Alfred i stori olsem dispela song

Isalei Kaungani bilong Fiji ol i singim em taim Melanesian mambu ben i bin raun long go long Fiji. Wanpela lapun man bilong Fiji i laikim tru stail bilong mambu bilong PNG na em i givim song ya long ol. Ol mangi Madang tu i bin givim wanpela tok ples song i go long ol lain Fiji.

Narapela samting we i mekim dispela nupela album bilong Melanesian Cool Figures i narakain tru long ol narapela Madang ben em ol i paitim mambu ben tu long go wantaim ol instramen bilong ol waitman na sapos yu harim em bai stail olgeta. Putim ia gut na harim song bilong ol "GauN Nanun". Yes, song ya em wanpela pawa song stret na i ken kirapim bodi long saksakim tu long danis. Narapela song long tokples Bukawa "North-Fox 6" em tu em strong tru na planti ol wantok long Bukawa na Salamaua bai amamas tru long harim. Tupela song ya i stap long Pasifik stail bilong Sibut yet na olgeta i kik tru.

Narapela gutpela song we ol i singim wantaim mambu na kwaia em *Madang-Madang*. Song ya i bin brukim stret lewa bilong planti manmeri tru taim ol sumatin long ol skul insait long Madang i bin singim long ol opim Saut Pacific Forum we i bin kamap long Madang long 1995. Alfred yet i bin go pas long redim musik na kwaia long dispela taim.

Insait long 1997 SP Forum, olpela presiden bilong Fiji, Col Sitiveni Rabuka tu i bin stap na em i bin go kisim ukelele na pilai na singsing wantaim Melanesian mambu ben taim ol i pilai. Ol memba insait long dispela nupela album em Mileng Nalon (drama), Danny Paulus (bes-gita), Johnson Lanke (ritem) na Alfred yet i kukim long lid-

gita, lid singa, bekap na tu em yet i paitim mambu ben.

Dispela album em i gat narapela kain moa na i gat bikpela bilip olsem em bai winim stret lewa bilong planti ol yangpela manmeri. Tru tumas, dispela kaset i wanpela resa album stret wantaim planti ol gutpela singsing em ol memba yet i kamapim. Wanpela song we bai sutim stret lewa na musik filings bilong planti lain em "GauN Nanun". Mining bilong dispela song em olsem pikinini dok. Ol i singim dispela song long Pasifik stail stret na i narakain moa.

Man i go pas long grup. Alfred Sibut i tok olsem ol i gat bilip olsem dispela kaset bai i gat kik moa yet na winim tru lewa bilong planti ol manmeri husat save laikim mambu ben musik stail bilong ol dispela grup bilong Madang.

Jeneral Menesa bilong Pacific Gold Studios, Greg Seeto i tok olsem dispela nupela grup em i gat stail bilong en yet we i narakain liklik long ol narapela Madang rekoting atis. Stori bilong dispela grup "Melanesian Cool Figures" em i wanpela longpela stori tru. Tasol bai yumi sotim liklik.

Yes, dispela grup i bin stat pastaim tru olsem wanpela mambu ben grup long liklik ples Bilia klostu long

Madang taun. Wanpela bilong ol lain husat i stat pastaim tru em Alfred Sibut. Dispela taim em i bin yangpela bun nating mangi tasol. Long dispela taim ol dispela yangpela man i bin kolim nem bilong grup bilong ol olsem Muddy Gauns. Mining bilong em olsem ol dok bilong tais.

Dispela grup i bin pilai raun liklik i go na bihain ol bikman long ples olsem papa bilong Alfred yet Sibut wantaim narapela papa i kamap wantaim dispela nem Melanesian Bamboo ben. Dispela mambu ben grup i bin go insait namba wan taim tru long Maborasa Festival long 1980 na i bin winim fes prais. Dispela taim nau grup i soim tru olsem ol i gat dispela strong long go het moa long soim stail musik bilong ol. Stat long dispela taim.

Melanesian mambu ben i bin raun i go long planti ples tru insait long Momase rijon. Ol i raun tu i go pilai long Manus, Trobiand Island na bihain PNG Turism opis i kisim ol i go pilai long Sidni na Cairns long Australia.

Melanesian mambu ben i bin winim tu longpela kontrak long stap olsem grup we i save pilai olgeta taim long Madang Risot Hotel long Madang. Long 1995 dispela grup wantaim Alfred Sibut i bin go pas long redim musik insait long Saut Pasifik Forum we i kamap long Madang. Olpela presiden bilong Fiji Col Sitiveni Rambuka i bin pilai yukulele taim Melanesian i pilai. Dispela em i wanpela stail konset stret.

Narapela hap nem bilong grup Cool Figures i bin kamap taim ol memba bilong Melanesian olsem Alfred Sibut i bin raun i go long ples bilong mama bilong em long sait bilong Morobe. Ol sampela brata i tingting long baim wanpela ben set, tasol ol i painim hat liklik long kamap wantaim wanem gutpela nem bilong grup.

Wanpela brata i save simuk "Kool" olsem na ol i putim dispela nem long grup. Tasol dispela nem Figures i bin kamap taim ol painim nem i go na kamap wantaim dispela. Tasol pastaim long en ol i bin kolim nem bilong ben bilong ol "Unwanted". Bihain dispela ben Kool Figures i bin katim wanpela album wantaim Santalina Sounds long Madang.

Planti ol lain i bin halivim ol long kamap wantaim dispela nupela album we ol i rekotim long Mosbi. Bikpela tenkyu i mas go long ol lain olsem William Banjoy na femili long Rainbow na ol narapela wantok long Mosbi siti. Bikpela tenkyu tu i go long brata ya James Kila long stretim rot bilong ol long rekot wantaim PGS na ol lain olsem Jonathan Bahude, Allan Los, Simon Robert na ol wantok long Goroka husat i bin lukautim ol taim ol memba bilong ben i bin stap long hap bipo long ol i kam long Mosbi.

**FRI BAIBEL
KOS
LONG PAS**

**I kam long wanpela pren
long America sapos yu
laikim fri kos salim nem
na adres igo long:**

**WOL BAIBEL SKUL
WBS - PNG 12,
P.O. Box 9346,
Austin, TX 78766 USA.**

Kastom bilong baim meri i abrusim mak

MASTA WAI i raitim

KISIM pe long meri o baim braid prais em i stap pinis long het na tingting bilong planti manmeri tude. Bikos dispela pasin long sampela hap provins na rijon, i bin kamap bipo long taim bilong tumbuna na i kam inap nau. Ol tumbuna i gat mak luksave bilong baim meri na as bilong mekim dispela samting.

Long tude, planti hap yumi lukim na harim olsem prais bilong ol meri i wok long go antap moa. Bipo olsem long 1970 nabaut, ol i baim olsem long K500 o K1,000. Tasol nau prais i go antap pinis bikos strong bilong mani i gat kik long tude sosaiti. Mani i mekim kamap planti samting. Sampela i kamap pinis long K10,000 na K20,000 mak. Sampela i kisim mani wantaim ol kago bilong stua, ka, enimol olsem pik, pukpuk, bulmakau na hos na planti arapela moa.

I nogat samting i rong long dispela bikos ol lain bilong man i no save egensim prais bilong meri ol i laik baim. I nogat wanpela komplek i kamap long dispela bikos ol lain bilong man bai baim tasol.

Long sait bilong hailans, planti i save stori olsem ol i mas baim meri bikos em i tumbuna pasin. Ol i mekim dispela tu long kamapim poroman namel long tupela klen o tupela ples. Marit bilong man na meri i bungim ol lain i kam bung wantaim.

Tasol i gat wanpela bikpela as tu long baim meri. Meri i makim piksa bilong dispela famili o kien. Meri i karim nem bilong dispela klen i kam joinim narapela klen na dispela i no meri nating long rot. Meri i gat ol bikman na lida i stap wantaim em, ples bilong meri ya i gat planti bikpela na gutpela samting i stap, meri ya i gat ol brata na kandre husat i hapman bilong brukim spia na daunim birua.

Yumi ken lukim olsem meri i karim planti bikpela stori olsem hait stori o tumbuna stori bilong lain bilong em i go aut na i laik soim ol lain bilong man husat bai maritim em. Yumi save lukim olsem taim meri i bungim hevi, ol brata na kandre bilong em i save hariap tru long stretim hevi na wari bilong em bikos ol i mas was long em gut inap em i kamap meri na marit.

Olsem na taim ol lain bilong man i baim meri, ol i mas soim tru strong bilong ol tu long ol i ken baim meri wantaim pik, kaikai na mani bikos ol i save olsem dispela meri i kam long ol i no meri nating. Tasol ol lain bilong meri tu i no save kisim mani bilong lain bilong man wansait tasol. Ol i mas bekim sampela i go bek long soim tu olsem ol i no lus lain. Ol i gat graun, ol i gat mani na ol i strongpela lain tu.

Olsem na ating long hailans sait, ol i gat as tru bilong baim meri na i no bilong soim bisnis, strong na biknem tasol. Dispela em tingting na pasin bilong ol tumbuna long bipo tasol dispela kain tingting i wok long bruk daun liklik bikos sampela man i laik baim meri long wokim biknem



ol bilong ol. Ol i laik soim olsem ol i smatpela man wantaim planti mani na ol i ken baim planti meri na maritim ol na tu bai ol i ken sanap ples klia olsem bikman. Na taim bilong ileksen i kam, ol tu i laik go. Na dispela i bagaram tru as tingting bilong baim meri o braitprais.

Long planti hap bilong nambis tu, ol i save baim meri. Olsem long Manus, Madang, Is Nu Briten provins, Sentrel provins na i go olgeta long hap bilong Galp na Westen provins.

Ol i save baim meri long mani na kaikai na ol samting bilong nambis olsem ol sel bilong solwara, pulpul bilong pasim na bilasim skin long taim bilong singsing.

Tasol long hap bilong nambis tude, yumi wok long lukim olsem ol man i laikim mani moa long ol arapela samting. Ol i no laik long wokim kaikai na singautim famili bilong man i kam sindaun na ol i kaikai wantaim na senisim ol presen na mekim pren na arapela samting olsem. Ol i laik kisim mani hariap tasol na lusim tingting long astingting tru bilong pasin kastom long baim meri.

Bikpela as bilong dispela kain pasin em bikos mani i kamap bikpela samting nau bikos mani i ken stretim planti samting bilong ol manmeri. Olgeta samting em mani.

Mani i mekim na ol pipel i laik kisim mani long wanem samting

ol i gat o wanem samting ol i mekim. Olsem na mani i kisim ples o tekova long olgeta veliu bilong pasin kastom na tumbuna. Strong bilong ol pipel, pasin bilong ol long makim ol i wanem kain lain tru na planti arapela stori bilong ol i karamap pinis long kala bilong mani.

Ol yangpela husat i marit long taun o pasin bilong taun i save marit na kamapim pikinini pastaim na bihain, ol famili bilong meri i save kros na toktok planti, orait man i save tokim ol lain bilong em na ol i save bungim mani long baim meri. Sampela taim man na meri i pren na pikinini i save kamap. Orait ol lain bilong meri i save kros na singaut long pe. Taim ol i kisim pe pinis, orait tupela i marit na kamapim famili. Dispela kain pasin bilong kisim pe long ol meri long taun i no save makim wanpela tru ming bilong kastom bilong baim meri. Dispela em ol i save mekim long stretim bagarap o sem we i kamap pinis long lain bilong meri. Na dispela i olsem kompensesen na i no baim meri olsem pasin kastom stret.

Wanpela bikpela samting we i asua em bikos planti yangpela i laik mekim long laik na save bilong ol yet. Na planti taim, dispela i save mekim bel bilong ol papamama na ol kandre i save kaskas bikos ol i laikim meri i mas sindaun isi long haus na ol yet i ken luksave long wanem man tru bai ol i wanbel long en

long maritim pikinini meri. Tasol dispela i save popoia bikos meri i save raun tu na bungim planti poroman na hevi i kamap namel. Em i gat bel nating o em i pasim tok wantaim pren bilong em na tupela i go stap wantaim. Olsem na laik bilong holim pasin kastom long kamapim marit i no save kamap gut. Olsem na ol lain bilong man i save baim dispela kain marit wantaim belhat na lain bilong meri tu i save kisim mani wantaim belhat. I nogat amamas long tupela sait wantaim bikos ol i no kamapim marit bilong tupela yangpela ya.

Marit i no samting bilong kisim tasol na kamapim tasol. Em i samting bilong tingting gut pastaim long kamapim bikos kikkbek bilong em long tupela o tripela krismas bihain i save hat tru.

Sampela taim papamam i save ting pikinini meri i mas go bek marit long aples bilong ol bikos dispela em strong bilong tupela taim tupela i lapun na sindaun long ples bihain. Bai pikinini meri i was long tupela long karim paiawut, wasim ol plet sospen, kukim kaikai na ol samting olsem. Tasol taim pikinini meri i bikhet na marit long laik bilong em, bai papamama i pusim ol kandre long kisim pe tasol bikos nogut pikinini meri bai go olgeta long sait bilong man na i no inap stap klostu moa wantaim ol.


Long sait bilong ol waitman, ol yangpela i save kisim planti skul tru long pasin bilong prenim man

o prenim meri na raun wantaim long pati o go raun wantaim. Papamama yet i save givim skul long ol pikinini meri long ol i mas luksave long wanem hevi bai i kamap taim ol slip wantaim ol man taim ol i yangpela tumas na i no redi long kamap mama yet. Ol i save kisim tok skul tu olsem ol i mas lukautim ol yet gut inap ol i bikpela na redi stret long marit.

Na taim ol i bikpela na redi long marit, ol i save holim bikpela kaikai na famili bilong man na meri na ol poroman bilong ol tu i save kam bung na ol i amamas wantaim.

Ating pasin bilong ol waitman i wankain wantaim pasin bilong ol tumbuna bilong yumi long ol meri i mas stap gut inap ol i bikpela na redi long marit. Taim ol i bihainim ol dispela kain lo, marit bilong ol i save kamapim amamas long ol famili.

Pasin bilong baim meri tu i wok long mekim sampela lain i go kamap rabis lain olgeta bikos ol i lusim olgeta mani na strong bilong ol. Na tu baim meri i kamap olsem wanpela bisnis we ol lain bilong meri i kamap mani lain. Na tu, pasin bilong baim meri i kamapim planti hevi long ol meri husat man i baim ol na karim ol i go. Ol man i mekim ol i kamap olsem kalabus lain gen. Long dispela as, Gavman i mas mekim lo bikos astingting tru bilong baim meri i lus nating na abrusim mak olgeta.



Rot we Raunwara Molimini i kamap

ren i pinis na Wara Angei drai na tupela Tiyobali Tawiwantaim meri bilong em Taitame i wokabout i go long haus pik na painim ol pik bilong ol. Na wanpela tasol i stap. Tupela i go klostu na papainim narapela pik tasol nogat tru ya em no stap.

Tiyobali Tawi i wari taim em no lukim narapela pik na em i laik trikim meri pik. Olsem na em i holim rop na tokim meri bilong em Tataime long holim rop long

narapela sait Taim em i kam holim rop Tiyobali Tawi i belhat nau na em i kisim wanpela diwai waluma na brukim het bilong meri Taitame na meri ya lusim rop bilong pik na em i dai. Olsem na Tiyobali Tawi i tainim na lukluk na nogat, meri bilong em Tataime i dai pinis.

Na Tawi i kra i na tok olsem long tok ples, anan taitame ana yo paletokou ye. Em i kra i olsem na ai wara pundaun long

graun na kamap ranwara Molimini. Em dispela ran wara Molimini we i stap insait long ples Kauwo long Tataime i dai na ai wara bilong Tiyobali i pundaun long graun long en na Tiyobali Kemboyomo i bin bagarapim sidan bilong tupela.

Mr Jacky L Tungu Kaulo Pangia



Bipo bipo tru long taim bilong tumbuna wanpela Tiyobali Tawi i stap long ples Kali insat long Pangia distrik SHP. Tiyobali Tawi wantaim meri Taitame tupela i lukautim tupela pik man i stap. Tupela i lukautim i stap na wanpela taim, pik bilong Tiyobali Tawi em wanpela man nem bilong em Kemboyomo i silim long nait long haus pik.

Fopela de bihain, bikpela ren i pondaun ren i go i go na wara Ange i tait nogut tru. Na em i hat long tupela man meri i go long narapela sait. Olsem na Mista Tiyobali Kemboyomo i kirap tru long moning na lukluk i go daun long wara Ange ya. Man i tait nogut tru olsem na wantu tasol i go insait long haus na kisim Tamiok na ron i go long bus Waira na katim limbum. Olsem na Tiyobali em red gut tru i stap long san na long nait baga man ya sindaun antap long arere bilong Wara Ange. Em i go long haus pik long nait na lukluk gut sapos tupela pik i slip i stap long haus pik. Wantu tasol em i go insait na rausim wanpela pik man bilong Tiyobali Tawi i kam aut na karim i go long naraepia sait bilong Wara Ange.

Em i sidan i go i go long Yotomonu kenu long Wara Ange wantaim traipela pik bilong en olsem na em lukluk i kam long Wara Ange. Em no lukim wanpela manmeri i stap na isi tru em lusim kenu long Wara Ange na rausim pik bilong en long yokenu na wokabout i go bek long bus Waira na kilim pik na kaikai i stap long bus Waira. Olsem nabihain long fopela de,



Nem: Joe Willie

Adres: C/ P O Box 594

Krismas: 20 (man)

Save laikim: Go lotu, harim gospel musik, ridim Baibel, wok bung wantaim ol lida na painim wanpela kristen meri bilong maritim em.

Nem: Harry Awa

Adres: Gabensis Community School, C/ P O Box 315, Lae, MP

Krismas: 17 (man)

Save laikim: Pilai soka, basketbal, raun wantaim ol pren bilong narapela hap, serim ol samting wantaim na raitim pas i go i kam.

Nem: Jerry Sam

Adres: Gabensis Community School, P O Box 315, Lae, MP

Krismas: 14 (man)

Save laikim: Pilai ragbi, soka, basketbal, raun i go long bus, toktok wantaim p r e n, salim samting i go i kam na go lotu.

Nem: Steven Sari

Krismas: 20 (man)

Adres: PMB P O Box 290, Rabaul, ENBP

Save laikim: Tok pilai wantaim yangpela meri long narapela provins, lainim tokples bilong ol na senisim ol sampela tumbuna samting wantaim ol.

Nem: Allan Amos

Krismas: 12 (man)

Adres: P O Box 62, Gobensis Bilon Farm

Save laikim: Lukim TV, pilai soka, ragbi tas na harim regea musik.

Nem: Miss Vida Doris Arhin

Krismas: 27 years old (female)

Adres: P O Box 600, Caribbean site # B5, Oguaa town, Ghana, West Africa

Save Laikim: Volibal, pilai spot, musik, danis, kalsa, histri, raun long narapela hap bilong wol na bungim ol pren.

Nem: Koolmate Fertz

Adres: P O Box 233, Kainantu, EHP

Save Laikim: Stori wantaim ol poroman, go lotu, raun lukim ol nupela ples, raitim pas i go na i kam wantaim ol poroman, senisim ol potu na presen, senisim ol stem na senisim ol mani wantaim ol ovasis penpren.

Nem: Miss Kukua Acquah

Adres: C/- Bro Ampah, Box 1207, Cape Coast C/R Ghana

Krismas: 25 (meri)

Save Laikim: Wokim pren na marit long bihain taim.

Nem: Miss Belinda Anima

Adres: C/- Captain, Box 1207, Cape Coast, Ghana

Krismas: 24 (meri)

Save Laikim: Raun long narapela ples, kuk na harim musik.

Mi wari long boipren na papamama bilong mi

papamama bilong mi.

Tasol mi laikim tumas papamama bilong mi na mi no laik givim hevi na wari long ol.

TROUBLED

Dia Pren,

I no yu tasol i bungim dispela kain hevi, nogat. Planti yangpela pipel bilong tude i bungim wankain hevi olsem yu. I gat planti samting long tingim taim yu stap long dispela kain sindaun tasol ol bikpela samting we yu ken askim yu yet em: husat tru em yu givim bikpela luksave long en? Boipren o papamama o ol hauslain bilong yu?

Mipela i no inap long rausim wari bilong yu tasol mipela i ken tokim yu wanem samting yu ken wokim long helpim yu glasim na skelim tupela sait bilong hevi yu yet na kamap wantaim wanpela disisen.

Sapos yu givim bikpela luksave long ol papamama na hauslain bilong yu, orait, bai yu lus tingting long dispela boipren we yu gat nau na painim nara-

pela we ol bai wanbel na amamas long en. Dispela man mas sta long sem levul wantaim yu long sait bilong sosel na ikonmik klas. Tru disisen we yu wokim bai wanpela hatpela wan na bai i brukim lewa bilong yu tasol i moabeta long wokim dispela nau bikos sapos yu lusim i go long bihain taim, moa hevi bai kamap. Boipren i stap long narapela provins na i gutpela long yu i rait long en na tokim em long salim bek tiket bilong em. Na tokim em olsem i moabeta long noken rait long yu moa. Long dispela rot, bai em i isi long brukim prensip bilong yutupela.

Long wankain taim tu, sapos yu piiim olsem laik bilong yu i strongpela moa na em bai lukautim yu gut long bihain taim na yu laik maritim em tru, ating em i gutpela long yu yusim dispela balus tiket em i salim long yu. Na yutupela i ken toktok gut long rilesensip bilong yutupela inap yu klia gut wanem samting yu laik wokim. Na yutupela i ken wokim plen gut long marit bilong yutupela.

Mipela i gat bilip olsem yu luksave long tingting bilong papamama bilong yu. Ating ol i painim hat long luksave long rot bilong ol yangpela bilong tude we ol i fri long wokim samting long laik bilong ol. Tasol ol i laikim samting we bai gutpela long yu na i no bilong kamapim hevi na sindaun nogut long laip bilong yu. Inap yu painim wanpela pren o hauslain husat i bikpela mao long yu na i gat moa save na i luksave long hevi na wari bilong yu long toktok wantaim papamama bilong yu?

Sapos yu wanpela Kristen, long yu i pre na tokim Bikman olsem tingting bilong yu i no klia long dispela samting. Na askim em long helpim yu na staim yu gut.

Mipela i hop olsem disisen yu wokim bai i no kamapim hevi namel long yu na boipren na famili bilong yu. Em bai gutpela moa sapos yupela i kamap wantaim wanpela disisen we bai yupela i wanbel long en.

LAIPLAIN




Dia Laiplain,

Ol papamama na hauslain i no laikim boipren bilong mi bikos em i kam long ris famili na mi kam long puo famili.

Mipela i kam long sem eria na mi laik maritim em. Tasol papamama bilong mi pret long wanem ol i tok ol bai nogat samting long senisim wantaim ol papamama na hauslain bilong man long taim bilong peim brait prais. Mi traim long tokim olsem em i orait na ol noken wari tumas tasol ol no harim mi.

Mi askim boipren olsem sapos i gat narapela rot we mipela i ken lukluk long en na bihainim long daunim dispela hevi na em i askim mi long go long ples we em i wok long em long narapela provins. Long dispela rot bai mi abrusim dispela hevi mi bungim wantaim ol





• Antap: Mema bilong Finsafen Alfred Pogo i kisim gutbai sikan long ol bikman bilong PNG Difens Fos. Mista Pogo i lusim wok bilong em olsem Difens Minista na i go kamap. Woks Minista.

• Antap lephan: Ol sampela bikman bilong Katolik sios i mekim wanpela lukuk raun long Word Publishing kampani, kampani bilong Wantok Niuspepa long Mosbi tupela wik i go pinis.

• Lephon: Nupela Minista bilong Difens Muki Taranupi i wok-about raun long Mari Bareks na lukim ol opis na ol samting long hap. Komanda bilong PNG Difens Fos Karl Malpo i kisim em raun na soim em ol samting.



• Wankain long olgeta bikpela haus mani long PNG. Westpac beng long Waigani Mosbi i bin pulap tru long las wik na lain i kam ausait olgeta long rot. Ol manmeri i laik kisim mani na putim mani ya. Ol poto: ISAAC IKUAVI



• Ol sampela bikman bilong Bogenvil i mekim raun i go long Mosbi las wik long toktok wantaim Gavman we ol i go kamap long haus bilong Gavana Jenerel Sir Silas Atopare na bungim em.

• Ol studen meri long Pot Mosbi Nesenei Hai skul i bung gen wantaim narapela long statim yia 2000 nupela skul yia.

KANAGE

"Em
nau,
narapela wik
bilang mi ken?"



Em nau, pikinini i putim ai pinis long dispela wel banana. Em i lukluk yet i luk olsem wanpela tewel o masalai i gat het, tupela han na tupela lek. Na i wok long kam isi isi. Pikinini bilong Kanage i lukim olsem tasol em bikmaus. "Papa wanpela tewel yah" Yu save Kanage tu i gat narapela tingting pret tu ya. Em i tingting planti

bikos ol blak bokis i no wok long kam. Olsem na tingting bilong em i tingim ol masalai i wok long pasim ol blak bokis. Taim pikinini i singaut olsem "papa tewel yah" dispela taim yet. Paps Kanage i bikmaus ya, kalap i kam daun na i no wet givim siksti tasol. Abrusim pikinini na ron. I no tingim pikinini. Pikinini i no wet tu em givim sikti bihainim Kanage. Tupela i ron yet rot, Kanage i lukim pikinini wok long bihainim em yet, em i ting masalai nau i ron bihainim em, boi ros ya kukim yet na i kamap long ples. Yu save, dua bilong haus bilong Kanage, ol i save opim i kamaut, tasol taim Kanage i putim lek long dua, dua i go insait na em i go pundaun long bet na dai olgeta.

**Titus Varimes
Tinputz**

Kanage bilong Tinputz. Kanage i pilim olsem san i hat tumas, na i tokim meri bilong em yumi go wokim wanpela haus lip long bus. Orait ol i go kamap long bus pinis orait Kanage i stat long wokim haus. Wokim pinis em nau, nait i kam boi ros ya Kanage i wokim paia klostu long bet bilong em. Ol i no slip yet na wantu wanpela tewel i stat pilai long Kanage. Kanage i laik slip tasol nogat tewel i kam holim lek bilong Kanage na em i kirap nogut tru. Oloman, pret wantaim belhat i no isi. Paps i redi gut tru na i was i tap, sem taim pikinini bilong Kanage i kirap, em i pilim pispis na i laik go aut. Em i krol i go daun i go i go kamap long arere bilong haus lip. Pispis pinis na em kam antap bek long bet. Kanage i lukim olsem wanpela tewel i wok long kam, em i no ting olsem pikinini nogat em ting tewel ya. Boi nogut ya kisim wanpela bikpela hap/paia isi tasol apim hap paia taitim bun tru, pinisim olgeta strong bilong em sut long hap i go long pikinini. Yu save, hap diwai marmar i hevi na i lait tu ya. Taim hap paia i pundaun long pikinini, pikinini i hap indai olgeta. Oloman! mama i kirap nau na i askim, wanem yah! Kanage i bekim na i tok pikinini ya! Bikos taim em i bin sutim pikinini long hap paia, em i luksave olsem em pikinini tasol em hap indai olgeta. Mama i askim gen wanem samting ya, pikinini we? Yu save Kanage i wari pinis i tingim olsem tete mama bai kilim em stret gen. Olsem na em i giaman na i tok mi no save mi tu mi slip indai yah. Pikinini i no bin indai, em i kirap na i wok ong harim tupela i stap. Kanage i wok long tok mi no save em i mekim wanem. Pikinini i kirap tasol i tokim mama, papa i sutim mi long hap paia wut ya. Lapun mama i kirap kisim naip ya nogat, Kanage i das brukim tudak go long ples.

**Titus Varimes
Tinputz**

Kanage em bilong Kerema, Galp provins. Em i bin wokim gret 6 long yia 1991. Em i pas

tasol papamama bilong Kanage i no gat mani na ol i no salim em i go long hai skul. Nau Kanage stap long ples. Nau em i kamgo long Kimbe oil na wok long hap. Na em i go stap long Mallimi plentesen. Nau em i ksim tupela fotnait pinis na em i go raun long Kimbe taun long stua na em i lukim wanpela naispela meri i wok stap. Kanage longpela taim raun na het blong Kanage i paul taim em i lukim dispela meri ya. Olsem na Kanage askim meri ya, wita. Na meri ya tok yu tok long vita kool wara ya na Kanage tok yes mi tok long dispela tasol. Na yu save kain bilong Kanage em tok, you know we learn from mistakes so you have to correct only mistake. Na olgeta man na meri sanap klostu ol indai long lap.

**Obert Tapiyas
Boroko**

Kanage i stap long haus wantaim meri em long ples Gabensis. Long dispela taim tasol bikpela ren i pundaun long nait na long moning wara i tait stret. Man! Kanage tu em pestaim long lukim wara i tait stret long moning na i go antap olsem wanpela liklik maunten stret. Kanage tu em i pret pipia stret na Kanage ron i go holim pas meri bilong en na tokim meri bilong en olsem, ayo Misis, bai mi mekim wanem nau ya. Bikos mi tu mi pes taim long lukim kain samting olsem ya i kamap ya. Kanage stap long haus na i ron i go tokim wanpela bosmisin long ples olsem, inap yu paitim belo bilong yu na singautim olgeta manmeri i kam na yumi kisim sampela miting! Na bosmisin i kirap na em i salim Kanage i go long paitim belo. Kanage i go paitim belo pinis na Kanage stat long singaut olsem, o, o, o, o, yupela olgeta i kam bung wantaim mi na yumi diskots long dispela tait wara ya mekim na bel bilong mi i kalap, kalap na lewa bilong mi i no i stap long rait posisen bilong en stret ya. Nau olgeta manmeri i kam bung pinis na Kanage kirap na tok olsem nau bai mi yet i go pas wanem ya. Bikos tait wara ya makim mi na my heart pumping laik rapa taia. Kanage tok olsem nau bai yumi kolim wan kantri bilong yumi long PNG na wol na olgeta provins na taun na strit na i go olgeta long olgeta liklik ples tu ya. Taim Kanage toktok pinis na wanpela man kirap isi tasol i go antap na tokim Kanage olsem hey Kanage yu paul o nogat o yu gat tingting o yu gat save. Taim Kanage harim dispela tok Kanage kirap gen na tokim olgeta manmeri olsem, hey yupela mi no paulim wanpela bilong yupela. Bkos ren na tait wara ya mekim mi na my heart pump like a rapa taia na bel bilong mi i kalap, kalap na i no i stap long rait posisen bilong en stret ya. Nau olgeta man kirap krosim Kanage, hau bai yumi stopim ren na tait wara olsem wanem? Taim Kanage harim dispela tok Kanage kirap isi tasol na sigirapim het na baga tekov i go pinis long haus.

**Roland Jerry
Lae**

Kanage bilong kolples na i no pispis foapela de olgeta. Na bel bilong Kanage solap na ol pasin laplap long em na kisim em i go long haus sik. Na dokta sekim em pinis na i go aut long belo. Olsem naem askim ol nes long kisim em i go long wod. Nes meri ting meri i gat bel na pusim em long wil bet i go olgeta long leba wod na putim han i go insait long

laplap long pilim bel bilong meri ya. Nes meri ya ting em holim pinis long hap han o lek bilong bebi na em tok em bikmas, pinis pusim pusim yet. Em holim yet na apim laplap na lukim ya sori trangu tupela wiwil tu i hangamap i stap na nes ya belhat na olgeta tok nogut pinis nating long Kanage na pusim em long wil bet i go long wod bilong sik lain.

**Gideon Fomi Marco
Goroka**

Kanage em bilong Pops tasol em kam stap long Kerema taun. Paps Kanage em wanpela stail mangi tu long Kei taun. Na em i save pilai kainkain spots, feveret spots bilong em, em basketbal. Wanpela taim ol i kisim yut so Papuan Yut So long Daru, Kei taun yut tu i go. O i kamap long Daru na ol i pilai pilai i go go na wanpela meri Daru idai nating long em tu! Em Kanage pinisim olgeta stail yah! Oke gem i pinis nau na ol i go bek long wanwan provins bilong ol. Taim Kanage kamap long Kei taun em i sik na lusim lewa long Daru. Tupela de tasol na em i raitim pas long dai-ning lewa bilong em. Em rait olsem! When I walk down the wharf, I was crying, when I turn around, you were gone, your face will stuck too me like are superglue! Stail tru yah!

**Phantom
Kei Taun**

Kanage i daunim wanpela 50 toea koin mani na em i ting nait bai em i dai tasol nogat moning em i go long Angau haus long Lae. Na i go lukim dokta na dokta i tokim Kanage olsem kaikai planti aibika moa yet na taim yu pekpek yu i mas pilim long han nogut 50 toea koin ya bai i kam ausait. Kanage i bihainim toktok bilong dokta tasol nogat 5 toea tasol i kam ausait na Kanage i holim 5 toea na karim i go bek long haus sik na lukim dokta. Kanage i tok dokta 50 toea koin ya i no kam, em 5 toea tasol i kam ausait ya. Na dokta i tok Kanage hamas kris-mas bilong yu?. Na Kanage tok 45 krismas. Olsem na dokta i tok, em 45 toea i bilong krismas bilong yu na toea em sens bilong yu ken putim wantaim 25 toea na baim Spia smok bilong yu.

**Anauya Jembok
Lae**

Kanage bilong Wes Jangafar long Makam. Kanage wok wantaim wanpela kampani ol i kolim Kunangi Holdings. Wanpela taim bos bilong Kanage tokim Kanage long go wok long bus. Dispela de em Fraide pe de bilong Kanage. Kanage les long wok tasol bos wok long fosim Kanage long go wok. Nau Kanage belhat em karim senso na go long bus. Dispela taim em pes taim bilong Kanage long holim masin. Taim Kanage statim masin na putim long wel, nut i bruk i kam daun na brukim senso. Kanage pret na guria wantaim. Nau Kanage karim senso na go long bos, taim bos bilong Kanage lukim Kanage karim masin i kam. Bos belhat long Kanage na i givim pinis pe. Kanage i no amamas long bos na em i tekov i go dring bia long Fraide nait i go tulait i bruk. Em harim ol manki pilai radio kaset na em mekim nating long danis i go tulait na bikmaus na tok, I dont care anybody today.

**Bonny Enosh
Lae**

Kanage bilong Wes Wampar long Gabensis. Wanpela taim lapun Kanage go long gaden na em i nogat masis. Kanage wok-about long rot i go na em i wok long painim masis. Wanpela waitman i ron long ka i kam na Kanage i lukim na tromoi han long ka i stop. Taim waitman stopim ka na Kanage askim waitman olsem masis benjin gando ore gando. Na waitman askim gen, wanem samting na Kanage i tok strong masis benjin ore gando. Waitman belhat em statim ka na tekov.

**Bonny Enos
Lae**

Kanage bilong Madang na em marit long Sepik na em man bilong raun long bus wantaim ol dok painim bik yu save man bilong ples i no save gut long tok pisin wanpela taim nau Kanage wantaim meri bilong em Maria tupela i go long gaden. Na papa Kanage wantaim ol dok bilong em ol kisim bus rot na ol i laik kamap long gaden. Ol dok raunim wanpela muruk papa ya putim was tasol em kilim idai dispela muruk em kilim idai Misis na papa Kanage singautim meri bilong em maria olsem: "Malia o" "Malia o" mi raun raun pas mi lukluk sutim pas idai i stap o i kam karim ples katim haus tilim wanwan kukim kaikai o. Meri bilong em harim olsem tok pisin ya krangi na em i lap nogut tru long gaden.

**Ohissian
Madang**

Kanage marit long Mumeng na em wantaim meri Kumalu bilong em i go long gaden long het bilong Wara Kumalu. Meri Kumalu na Kanage i stap long gaden na ples i blak na klaut i pairap long maunten. Meri Kumalu i tokim Kanage olsem tete bai ren pundaun bai klaut i tait na apsim mi tupela long go long ples. Masalai bilong bus i laik soim biket, o hambek bilong Wara Kumalu long Kanage long tok bilas Kanage i tok Wara Kumalu i olsem pispis bilong em. Kanage na meri bilong em i bungim ol kaikai long gaden i stap yet na ren pundaun na klaut i pairap na wara i tait i go daun na nois bilong wara i pairap olsem klaut. Kanage wantaim meri bilong em i lukim olsem wara i tait pinis na pasim rot bilong tupela i go long pels na tudak nau pinis. Wara i tait na ston pairap na wara i karim diwai na singsing i go daun olsem singsing bilong ol Kumalu yet. Meri Kumalu i tokim Kanage olsem, yumi tupela bai slip long gaden. Sapos yumi go bai wara i bai kilim mitupela. Kanage na meri bilong em i mekim paia long liklik haus long maunten na sindaun tasol kol i kisim tupela. Biknait Masalai i sanap long ston Kanage i sanap long en na tanim het i go long maunten na lukim Kanage i kol i stap na Masalai i lap dai long Kanage. Kanage i tingting i go bek, na em i tokim meri bilong em olsem pairap bilong Wara Kumalu i olsem Bobonala si bruk long Finsafen. Tulat na Masalai i kamap long

• I go moa long pes 26

KANAGE



• I kam long pes 25

driman long Kanage na tokim em olsem, mi bekim tok bilas bilong yu olsem wara Kumali i olsem pispis bilong yu. Kanage i pinis olgeta long tok pilai gen long wara Kumalu.

Maviji Guakapis Wau

Kanage wantaim ol mangi bilong em katim timba long Waess long Gabensis. Kanage wantaim ol mangi katim timba pinis na ol karim i go lusim long rot. Na meri bilong bik brata bilong Kanage wantaim tupela pikinini go long gaden long planim stik banana. Na Kanage i bin pasim as bilong wanpela bikpela buai olsem wanpela man o meri noken kisim dispela buai. Nau na meri bilong bik brata tokim pikinini long kisim dispela buai. Kanage bin pasim as bilong en. Kanage yet kam lukim dispela buai, em stat long mekim kainkain toktok. Kanage toktok i go belhat kisim naip i go katim

dispela buai. Nau meri bilong bikpela brata bilong Kanage belhat wantaim Kanage kros na mekim kainkain toktok long Kanage. Meri bilong bik brata bilong Kanage mekim kainkain toktok. Na Kanage sindaun na harim tasol.

Bonny Enos Lae

Yu save Kanage em kanaka man long kolples Tambul, Westen hailans provins. Wanpela taim rot nogut na Kanage kisim ol mangi go long piksim rot. Taim ol i wet i stap na 4-pela waitman i draiv i kam. Kanage tokim ol mangi long blokim rot na askim long mani. Kanage wet arere na lukluk i stap. Wanpela waitman kirap na tok Inglis olsem, "we don't have any money, Lord please help us." Kanage i no save long tok Inglis na kirap na tok, "what kind of Lord help us, only K2 kina, mas putim antap long han." Ol mangi harim kana-ka Inglis bilong Kanage na ol i kilim skin long lap. Sem taim waitman tekov.

Mark Mom Yano Lae

Pikinini bilong Kanage em i soldia boi. Mangi bilong em i lusim redio bilong em wantaim papa bilong em, Kanage long ples. Taim bilong pikinini long kam bek long ples em i kam

klostu. Kanage i lukim das pulap long redio na em kisim redio i go long wara na wasim. Em tingting long makim pikinini amamas taim em lukim klinpela redio olsem nupela. Pikinini i lukim nupela redio na ting olsem em i narapela. Papa Kanage i tokim pikinini olsem em i olupela redio bilong yu tasol. Pikinini i amamas na putim redio on wantaim nupela bateri tasol redio i no wok. Man, pikinini i belhat na brukim redio na lukim wara pulap tru olsem raun wara. Olo man, Kanage i sem pipia nogut tru.

Mark Mom Lae

Kanage em bilong 3 Mile long Boroko, pul nem bilong Kanage em long Sam Kanage, na ankol bilong em Peter Kanage, kanderere bilong em, long Timothy Kanage. Sam Kanage em i save laikim tru long ritim ol stori bilong em long Wantok Niuspepa. Wanpela taim Sam Kanage i go long Boroko na baim Wantok Niuspepa, i kisim niuspepa i go long haus. Taim i kamap long haus liklik ankol bilong em Peter Kanage i kisim niuspepa i go long haus Peter Kanage i lusim pepa na i go. Timothy Kanage i lukim niuspepa na i stilim pes stori bilong Sam Kanage na i haitim. Taim Sam Kanage i kam kamap i kisim niuspepa na ritim, Timothy Kanage i tok ankol mi laik harim stori bilong yu long pepa. Em nau Sam Kanage i stat

long painim pepa, dispela Peter Kanage i mas kisim dispela pepa i go, bihain Timothy Kanage i tokim em olsem na mi lukim em i karim wanpela pepa i go. Em nau Sam Kanage i kros, tete bai mi go kotim em long mama na papa bilong em, dispela Peter Kanage i save giaman long, hia na smuk, kaikai buai na smok drag. Nogat bai mi paitim em sapos i kam long haus. Bihain Timothy Kanage i go long Boroko, taim i kam bek i giaman- im Sam Kanage olsem em i lukim Peter Kanage long Boroko wantaim ol liklik mangi ol i ridim pepa na lap i stap long Boroko. Timothy Kanage i tok mi tokim em olsem dispela pepa em bilong Sam Kanage, na Peter Kanage i tok nogat ya em pepa bilong mi baim long 70t, Sam Kanage i nogat mani long baim niuspepa. Taim Sem Kanage i harim dispela stori i kros nogut tru, mi mas painim Peter na paitim em. Na bihain bai mi kotim em long papa na mama bilong em. Tru, tru ankol bilong em Timothy Kanage i kisim dispela nius na haitim, em i putim insait long Post-Courier niuspepa na i wok long ritim i stap. Sam Kanage i no save em i ting olsem pepa ankol bilong em i ridim em Post-Courier tasol nogat. Taim Timothy i pinis long ritim stori bilong Kanage em i putim pepa i go insait long envlop, em raitim nem na adres bilong Sam Kanage. Taim Sam Kanage i lukim envlop, em sem

nogut tru, a mi toktok long paitim Peter na em i mas tok save long papa na mama bilong em, na ol i mas salim em i kam long bringim bek niuspepa long mi. Sem Kanage i wari nogut tru, bihain ankol bilong em Timothy Kanage i tok Sam Kanage yu noken wari yu go isi tasol na tok sori long ankol bilong yu, na tokim em olsem mi no inap long kotim yu, na paitim yu. Timothy Kanage i bin wokim giaman long ankol bilong em, i haitim pepa na giaman stori long Sam Kanage. Sam Kanage i kros na bihain i sem nating gen.

R. Taula Kimbe

Kanage em bilong Simbu. Kanage em fitman bilong pilai ragbi long viles gem nabaut. Ol sponsa i lukim Kanage i pilai gut tru. Ol bikman i tokim Kanage olsem. Yu bai pilai long Kundiawa Hangras. Wanpela wik bihain ol Hangras bai pilai wantaim Goroka Lahanis. Ol i pilai strong tru. Bikbro Kanage i kisim bal na ron i go long mak bilong Goroka. Wanpela strongpela man bilong Goroka em John Makam i holim strong Kanage na Kanage i kisim taim stret. Na Kanage i bikmaus na tok olsem. Yu isi yumi pilai long kisim sil o wanem?. Isi long mi. Kanage i wokim tokples kuman na tok, ene konado simbo tasi kralna.

Mark Umba Simbu



Basua na Gavana Agiru i no stretim Kagua Erave

Dia Edita,

KAGUA Open memba David Basua na Gavana Anderson Agiru nogat luksave bilong yutupela long ol manmeri bilong Kagua na Erave distrik.

Mi wanpela manki Kagua mi save stap long Kimbe na mi save go long ples na lukim wanem samting i no save stret. Long lukluk bilong mi, mi laik autim stret long *Wantok Niuspepa*.

Rot namel long 7 kona na Kagua em i bagarap olgeta na hat long ol PMV i ron long dispela rot na hat long ol manmeri i kisim sevis.

David Basua tu bin askim plis dipatmen long kisim plis pos long Kagua distrik. Olsem wanem bai ol dispela plis fos kisim sevis. David opim ai bilong yu na gimv sevis liklik long ol pipel bilong yu long Kagua.

Noken tingting long bel bilong yu tasol. Em tasol na husat man i laik sapatim o egensim bai mi lukluk long niuspepa.

Erick Yali

Kimbe, Wes Niu Briten provins.

Kimbe taun em i olsem ros dram

Dia Edita,

Mi wanpela man na mi save i stap long Kimbe na mi laik autim wari bilong mi. Wari bilong mi i go mi no save amamas tru long lukim Kimbe taun.

Kimbe taun em i gutpela liklik taun tasol mi no save hamas tru long lukim spet bilong buai i save bagarapim arere bilong stua na taun olsem na mi no amamas tru.

Olsem na mi laik tokim yumi olsem yumi em pikinini bilong man olsem na yumi yusim het bilong yumi na noken larim het bilong pik i kamap long yumi.

Na mi no save amamas tru long lukim ol Kimbe taun sekyuriti. Planti taim mi save lukim ol Kimbe taun sekyuriti i save mekim wantok sistem long ol meri Simbu i save salim buai arere long ol stua. Ol sekyuriti i lukim ol tasol ol bai i no mekim wok bilong ol olsem ol i lukautim Kimbe taun. Olsem na mi laik tokim yumi, Kimbe taun em wanpela ros dram em mi save tru olsem Kimbe taun em i wanpela rabis dram we ol taun kaunsil i save sanapim long maket ples. Na ples i save bagarap tru long pipia na doti na yu bai les tru long lukim.

Tenkyu na mi bai amamas long lukim bekim o egensim bilong pas.

Mista Sang Tam

Mosbi, Nesenel Kapitol Distrik.

Philemon Embel i no divelopim Nipa Kutubu

Dia Edita,

Mi bai amamas sapos yu raitim ol wari na hevi bilong Nipa Kutubu pipel. Mi yet mi bilong Nipa na liklik ples bilong mi em Kombela. Nau mi laik tok olsem memba Philemon Embel bin i stap 15 yia long palamen haus long Mosbi.

Na mi laik askim ol 108 memba long palamen haus olsem gavman save gimv yupela mani long wokim wok long wan wan ilektoret o nogat? Mi askim tasol na noken krosim mi long dispela askim.

Memba Philemon Embel i no save kisim wanpela mani i kam long helpim pipel bilong Nipa Kutubu. Sapos wanpela memba o Minista bilong palamen kam na lukim Nipa Kutubu bai yu tingting planti olsem memba i stap o nogat.

Sapos yu laik kam bek long 2002 long kempen bai yu putim wanem naispela toktok long tokim ol pipel long Nipa Kutubu ?

Mi laikim memba Embel mas bekim pas bilong mi plis. Em tasol.

Felix Sosi Olpa

Mendi, Sauten Hailans provins.

Plisman long Laiagam i no stopim hevi

Dia Edita,

Mi no amamas long pasin we ol plisman long Laiagam i mekim na olsem m i rait kam long Wantok long Mosbi na plis dipatmen insait long Mosbi i ken lukim na mekim wanpela samting long en.

Dispela em planti taim ol tabel i kamap insait long Laiagam taun na ol i no save wokim samting long stopim ol tabel.

Tasol ol i save slek na lukluk i stap. Planti bikpela stua long taun ol stilim ol samting bilong ol na nogat plisman i stopim. Planti taim mi go long Laiagam taun na mi laikim olsem long planti taim na plis bai inap long holim ol stil lain tasol ol plisman bilong Laiagam i slek tumas.

Ol i no mekim wanpela samting na ol i go pinis long ples bilong ol. Mi save olsem plis bai inap

long stopim tabel o holim ol stil lain tasol ol bai lukluk i stap na hevi go bikpela tumas.

Planti taim mi laikim ol plisman i mekim olsem yet na sanap nating wantaim ful yunifom na harim kainkain stori na poromanim ol kainkain manmeri i stap long taun. Ol plisman bilong Laiagam ol i no mekim wanpela wok bilong gavman.

Tasol ol i kisim mani bilong gavman nating long pe bilong ol. Nau mi askim ol bos bilong plis na plis dipatmen tu mas lukluk long dispela kain plisman i no save stopim tabel o hevi.

Em tasol wari bilong mi sapos man o meri laik sapatim mi rait i go long Wantok tasol.

Andrew K. Waiakali
Mosbi, NCD.

Aloe Vera em gutpela marasin

Dia Edita,

PLIS gimv mi liklik spes long tokim ol pablik long herbal marasin (Aloe Vera). Yes, mipela bin salim Aloe Juis na planim long Hailans na Momase rijon long helpim ol sik manmeri.

Na ol planti manmeri i kamap orait long ol planti kain sik olsem sotwin, skru solap, sua, paia kukim skin, bel pen, sua long bel

(ulcer) na bikpela samting em, ol manmeri we i no kisim pikinini inap long 7-8 yia, nau i kisim bebi taim ol dringim Aloe Juis, na mipela i go insait long bikpela ekspiriens tru long herbal marasin.

Olsem na sampela taim yupela harim long radio na niuspepa, ol tok egensim long dispela marasin, olsem, em bai kilim

man, dispela i no tru.

Yu husat i dringim dispela marasin na yu kamap orait long dispela marasin, em bai yu save wanem samting mi toktok long en.

Olsem na yu husat i egensim dispela herbal marasin, moabeta yu go bek na stadim ol wel bus, na tu yu go stadim ol dispela buk hia: • Sapos nogat dokta; • Bek long eden;

• Heling wanders ov Herbs; • Liklik buk sos buk bilong developmen Wokas.

Na lukim long diksineri, em wanem kain marasin mipela salim nau. I gat planti buk we ol dokta i raitim long ol bus marasin, tasol mi putim 5-pela buk tasol.

Brata yu noken paulim ol sik manmeri. Yumi i no inap long helpim ol yet. Nau em taim yumi ken save long ol bus marasin olsem plawa, diwai, gras, na wara tu.

Yumi ken yusim olsem marasin long ples bilong yumi yet. Yumi noken pasim ai, na putim ai long marasin bilong waitman tasol, na lus tingting long tumbuna marasin.

Brata mi laik askim yu olsem sapos kantri i bungim hevi long wanpela taim long sait bilong mani na ol haus sik i pas, bai yumi mekim wanem?

Olsem wanem long ol man i stap longwe long haus sik?

Em tasol na yu husat i sapat o egensim rait tasol i kam long *Wantok Niuspepa* na mi ken ritim.

Numo Kesa

Goroka, Isten Hailans provins.



• Nesenel kot Sief Jas Sir Arnold Amet i sikan long wanpela oipela loya long bikpela de bilong Ligel Yia.

Ambunti stesin komanda em raitman

Dia Edita,

Mi wanpela man long ples tasol nau mi stap long Ambunti Stesin. Mi bin lukim wanpela pas brata Rufas Tauk Maimb i bin kamap long wantok niuspepa bilong Desemba 3, 1999. Dispela brata i bin egensim wok bilong Plis Stesen Komanda bilong Ambunti Stesen.

Mi no amamas tru long wanem ol toktok em i bin mekim long Plis Stesen Komanda bilong Ambunti. Brata sapos yu save olsem i gat wanpela mangi i wok long salim spak brus long ples bilong yu o komyuniti bilong yu, yu gat rait long arestim em. Ino gutpela long yu stap tasol long ples na tromoi ston long plis stesen komanda. I nogat wanpela lo i tambuim yu long holim dispela mangi na kisim em i kam long plis stesen.

Mi laik tokim yu stret olsem yu man nating long ples bai ino inap long askim Provincial Plis Komanda (PPC) long rausim Felix Sengi na makim Peter Tupa olsem stesen komanda. PPC em i lukim levul na namba bilong Felix Sengi na em i makim em olsem plis stesen komanda.

Brata ating yu mas jeles tasol long wanem wok em i mekim. Luk olsem yu no save long wok bilong plis stesen komanda. Sapos yu go long wanpela bikpela skul bai yu save long wok bilong menesmen bilong lukautim ol plis man. Luk olsem yu wanpela man i save bihainim narapela man i go long

toilet. Brata mi laik askim yu wanem ol plisman i lukim wok bilong em ino stret na ol i lusim Ambunti. Inap yu kam na gimv nem bilong wanem plisman i lukim wok bilong plis stesen komanda ino gutpela na lusim Ambunti. Nogut yu tok nating na nogat save bilong yu.

Ating yu laik bai nem bilong yu i pairap liklik long Wantok Niuspepa. Brata yu tok klostu ol plisman i go aut long narapela distrik, tasol tru nupela plisman Sajen Peter Tupa i kamap na holim ol.

Brata mi laik askim yu, husat i bosim transfea bilong dispela ol plisman bilong Ambunti. Yu bosim transfea bilong ol plis stesen komanda i bosim transfea bilong ol plisman bilong em. Ating yu mas paul stret yu. Brata nupela taim na yu hamamas long wok bilong Sajen Tupa. Nogut bihain bai das bilong Katres i kisim yu na bai yu luk sori na slip long haus sik. Yu tok Ambunti plis stesen i gat paia, bipo em i stap tudak. Brata inap yu tokaut long mining bilong dispela tok bilong yu. Brata askim bilong yu long bikman bilong Is Sepik olsem i gutpela long makim Sajen Tupa long kamap plis stesen komanda long Ambunti, na senisim Felix Sengi kamdaun namba tu.

Mi laik askim yu, yu gat wankain levul olsem Felix Sengi a ? Wok bilong plis stesen komanda em ino wok bilong man nating long makim. Sapos yu pas long promosen tes bilong yu bai yu kisim wanpela namba antap gen.

Sapos PPC i lukim levul bilong yu i bikpela em i makim yu long kamap plis stesen komanda. Ating i gutpela long yu kam na askim ol plisman na kisim save nogut yu stap nating na pairap olsem win na ren. Brata yu tok longpela taim Felix Sengi i stap long Ambunti plis stesen na senis ino kamap.

Brata sapos yu laikim senis i kamap long distrik vol long yu, bilong wanem na yu save gimv vot bilong yu long man bilong narapela hap. Yu mas gimv vot bilong yu long man bilong distrik bilong yu yet. Nau yet mi luksave olsem Ambunti i nogat gutpela sel blok na i nogat gutpela kot haus hia long Ambunti.

Moa gutpela long yupela mas toktok strong long memba bilong Ambunti Drekkia Judas Akesim long putim sampela mani

kam insait long mekim gutpela sel blok na gutpela kot haus, nogut long yupela putim hevi long plis stesen komanda tasol. Plis i laik mekim wok tasol i nogat gutpela selblok na gutpela kot haus.

Brata nogat planti spes bilong putim ol bikhet mangi na em i save sot win long mekim wok bilong em. Sampela taim bikpela hevi, ol i save lokim o manki long opis bilong ol long wok na dispela em ino gutpela tumas. Opis bilong ol long wok em ino ples bilong lokim ol mangi.

Taim Felix Sengi kam long Ambunti mi laikim olsem planti senis i kamap na i nogat planti tabel i kam. Planti manmeri long Ambunti Distrik i hamamas tru long wanem wok em i mekim. Ating yu wanpela man tasol i wok long tromoi ston long Plis Stesen Komanda.

Brata yu noken stap long ples igat gutpela manmeri i stap nogut yu mekim pipia namel long ol. Yu gutpela man bilong tromoi ston long narapela brata bilong yu, tasol bilong wanem yu save werim longpela han-sot na longpela trausis na go long Sande lotu.

Brata yu gutpela man tru bilong egensim wok bilong plis stesen komanda, yu kisim digri long Yunivesiti, olsem na olgeta wok bilong plis stesen komanda em yu save. Abrus bilong em yu wok long pinisim nating makau bilong Kasau na nogat save long het bilong yu.

Brata mi save yu husat man i raitim dispela toktok i go long Wantok Niuspepa na traim long daunim wok bilong Plis Stesen Komanda. Brata yu noken ting yu stap long ples hait yu stap ples klia pinis na yu kaikai bilong ol plisman.

Sapos operesen i kamap long Ambunti yu mas ting gut, noken traim long ronowe, nem bilong yu em stap pinis long lista bilong plis stesen komanda. Sori brata hevi nau. Brata dispela ol toktok bilong yu, em yu hatim bel bilong man long wok bilong em.

Nau mi askim yupela husat brata susa i save rait long Edita na bagarapim nem na wok bilong ol man, stopim dispela pasin.

Hamko Wally

Ambunti
EastSepik Provins

Ol meri Kimbe i save pes drai

Dia Edita,
Olsem wanem tru na ol meri long Kimbe taun i save daunim het tumas na i no save lukiuk i go antap. Planti gutpela smatpela man i pulap raun long Kimbe taun na i wok long traim painim ol naispela meri olsem yupela. Tasol yupela i daunim het i go tumas long graun na i no lukim pes bilong ol. Pes bilong ol man i save smail olgeta taim na wet long husat laki meri tru bai smail i go bek long ol.

Yu save olsem man i kamap bikos meri i stap. Na meri i kamap bikos man istap. Na tupela wantaim i mas poroman wantaim. Sapos man i laikim yu meri, yu meri tu bai laikim em bikos em wei bilong em i olsem. I nogat abrus o kona bilong em, em i stret tasol.

Mi lukim ol meri Tolai, Wes Nu Briten

yet, ol meri Momase na hailans i pulap tru. Tasol nogat bekim o small bilong ol i go bek long ol man.

I luk olsem em birua kantri bilong ol man na meri yet.

Yumi ol Kimbe lain yet ya laka. Yumi traim pren gut long narapela narapela.

Mekim Kimbe taun em rait ples bilong yumi olgeta olsem gut pren na sapos laki bilong tupela, orait marit tasol. Em fri kantri.

Olsem na ol meri long Kimbe, noken beks ya. Ol man long Kimbe em ol rait man tu ya na i laikim yupela ol meri tu ya. Nogat lo i tambu long dispela.

Em tasol na husat i laik bekim em laik tasol.

**Tonny Albert
Kimbe**

Mekim hatpela lo bilong ol raskol lain

Dia Edita,
Mi save lukim ol plis i save holim ol raskol na putim long kalabus na bihain ol i lusim kalabus i kam ausait na mekim trabel yet. Ol i no save senisim pasin bilong ol. Ating wanpela gutpela rot long mekim ol i senisim tingting na pasin em long mekim sampela hatpela pasin. Olsem katim lek bilong ol bai ol i ken sindaun long wil sia tasol o salim ol i go kalabus long wanpela ailan bilong em yet o putim mak

long pes bilong ol bai olgeta pabik i ken save olsem em i rasol man o trabel man.

Olgeta taim plis i save holim ol trabel man na kalabusim ol na bihain ol i pinis kalabus i kam aut gen na i no senisim pasin.

Ol i go het gen na mekim trabel, stil, kilim man, bagarapim ol meri na planti ol bikpela trabel ol i mekim. Bai lo i senisim ol olsem wanem. Ol lotu lain i save traim senisim ol raskol lain long pasin

bilong lotu. Tasol i no olgeta i save senis. Em wanpela o tupela tasol. Na planti i nogat. Ol i stap hat ko raskol lain yet.

Mekim sampela strongpela lo nau long senisim ol kalabus lain taim ol i pinis na kam ausait long komyniti.

Em tasol na husat i laik bekim em laik tasol.

**Sonny Taken
Kimbe**



• Ol lain bilong Oksapmin long Wes Sepik save soim stall bilong ol long ol so.

Telefomin distrik i nogat senis tru

Dia Edita,
Mi wanpela mani Telefomin distrik long Saundau provins. Mi i gat bel sorl long distrik bilong mi i no bin senis liklik i kam inap nau. Em i stap olsem bilong taim bipo ol papa yet i stap olsem tasol i nogat senis.

Yu husat man i bin stap memba bipo o yu bin lus pinis long las ileksen yupela i no ken traim gen. Yes yu ken tok olsem em namba gem tasol i gat man we em i gat bel sorl olsem mi yet i stap we em i laik senisim ples ya. Yupela kain man yupela i wok long bagarapim vot i stap.

Dispela taim we yupela i bin lus long las ileksen ya, dispela i soim yupela

olsem ol pipel i nogat bilip long yupela olsem na bilong wanem bai yupela i sanap gen.

Mipela ol manki long ples Birmin na Bak mipela i les long lukim olpela memba bilong bipo ol i bin lus pinis long las ileksen long hap bilong mipela i sanap gen.

Mipela ol manki i lukuk long pes bilong man long neks nesene ileksen 2002. Em tasol na husat yu laik egen-sim o sapotim yu rait tasol i go long Wantok nuspepa na mi ken lukim.

**Nukie Sakik
Bimim, Telefomin**

Ol Wewak plis i kisim ekstra lo

Dia Edita,
Mi no amamas tru long ol plisman bilong Wewak we wanpela pasindia sip i save kam olsem long Madang, ol plisman i save go long bris sekm ol kago na ol samting bilong ol manmeri. Taim ol i sekim ol samting, ol i no save isi. Ol i save mekim nabaut long ol kago na ol samting bilong ol manmeri na opim nabaut na tromol i go aut nabaut long graun. Mi lukim dispela i no stret tru bikos dispela em ol praivet kago bilong ol manmeri, famili na ol pikinini. Tasol ol plisman long Wewak i save mekim bikhet pasin tumas long ol turangu pasindia.

Mi save long ol hap olsem Lae, Kimbe na Rabaul, taim sip i save kam

dua, ol sekyuriti i save go isi tasol na sekim ol kago na ol samting bilong ol pasindia. Pinis orait ol i save glivim bek isi tasol na ol manmeri i karim ol kago bilong ol i go. Tasol Long Wewak tasol em ol plisman i save mekim hatpela wok olgeta na glivim bel pen tru long pablik. Mi ting ol plisman i mas senisim dispela pasin bilong ol long Wewak bris bai ol manmeri i ken amamas liklik. Nau ol manmeri i save gat bel nogut tru long ol plisman long sekim ol kago na ol samting long sip.

Em tasol bel hevi bilong mi na husat i laik sapotim o egensim em laik tasol.

**Sonny Ttaken
Kimbe**

MELPA i ken liklik han bilong ELC-PNG

Dia Edita,
Mi laik mekim liklik toktok antap long toktok bilong Het Bisop bilong ELC-PNG, Rev Dokta Wesley Kigasung long tok bilong MELPA Luteran Sios i kamap long sios nius long Februari 3, 2000.

Dispela nius i kisim wanpela pes olgeta na mi amamas long ritim sampela ol gutpela na bikpela poin Het Bisop i kamapim. Tasol, sapos sios i kamapim ol komiti long wok wantaim ol Hagen na MELPA, wanem em i kalkai tru bilong wok bilong ol dispela komiti?. Ol i kisim ripot bilong tupela sait wantaim na glivim ripot long sios kaunsil, bisop kaunsil na Sinot tu?. Na wanem em i aut kam o risal bilong ol dispela bung?. Inap long yupela het opis i kisim ol dispela ripot na wokim wanpela disisen long stat bilong hevi, tasol yupela i no mekim olsem na hevi i stap yet. Mi bilip em i hap asua bilong ol komiti na ol kaunsil na Sinod tu. Sapos

sios i painim wanpela namel rot pas-taim, ol Hagen na MELPA bai i nogat nois long wanem pawa bilong Sinod inap tok na ol inap bihainim.

Narapela samting, ol i no bruk long Tok bilong God, o long Tok Bilip bilong sios o wanem samting olsem Het Bisop i tok. Sapos olsem, yumi ken jarim ol i stap olsem wanpela liklik han bilong bikpela sios ELC-PNG. Na yumi wok poroman wantaim bilong strongim wanpela arapela. Ol i gat wankain bilip olsem ol arapela Luteran insait long ELC-PNG na tu long wol olgeta.

Nogut mipela i glivim hevi gen long opis bilong yu Bisop na ol arapela Luteran insait long ELC-PNG na ol bung. Em i liklik bel pen bilong ol MELPA tasol olsem na noken bisi long ol. Em tasol.

**Rev Richard K. Duni
Hagen**

Ol Simbu memba i no mekim nois

Dia Edita,
Mi wanpela manki Simbu tasol nau mi kam stap long Kimbe, Dami OPRA stesin NBPOLD.

Olgeta de mi ritim nuspepa na mi laik tru long lukuk long nius bilong ol developmen na sevis stori bilong Simbu memba tasol i nogat tru ol dispela stori ya.

Ol Simbu man i go long palamen ol i go long Mosbi stua bilong

baim liklik tin pis na roots rice long Saina stua na opim ai i stap long Mosbi na wetim 2002 narapela ileksen.

Mi lukim wanpela man tru i sanap long hausman long palamen na wokim planti toktok na glivim sevis tru em Mista Peter Waieng Kundiawa Gembogl open memba.

Na ol sampela Simbu maus pas

olsem John Kamb na Yauwe Rhyong. Nogat luskave long tupela stret na wok bilong tupela long ilektoret nogat man i save harim nius o ripot bilong tupela.

Em tasol na husat i laik egensim o sapotim em laik tasol.

**Genia Nicholas Kaupa
Kimbe**

Lek Kopiago presiden i raun nating

Dia Edita,
Mi wanpela manki Banz tasol nau mi i tap long Lek Kopiago long Sauten hailans provins. Liklik wari mi gat em nogat sampela senis i kamap long distrik bilong yumi Lek Kopiago.

Kaunsil presiden bilong Kopiago wantaim ol kaunsil i stap we nau. Wok helpim i no kamap long ples olsem Haredege, Arou, Tirini, Kopiago, Ijuni, Hagini na planti hap bilong Lek Kopiago distrik.

Planti taim mi lukim kaunsil presiden raun wantaim memba bilong Koroba Kopiago long Mendi na Hagen na Minj.

Olsem wanem ol pipel bilong Arou, Uguni, Akopi na Pongolaya makim yu long raun raun nating long Westen hailans provins ah?

Plis mipela nidim yu kaunsil presiden long stap long ples na wok bung wnataim ol kaunsil na ol sios grup na yut grup.

Maski soim olsem yu saveman

na westim taim long Hagen na Minj.

I luk olsem yu pilaim politiks long 2002 ya. Yu no tingim ol pipel bilong yu.

Plis kisim ol mani bilong kaunsil na helpim rot long Haredege i go long Tirini na skul long Haredege, Arou, Agini, Kopiago. Mekim ol liklik wok yu inap long mekim.

Em tasol liklik komplem bilong mi na husat i laik egensim em welkam tasol.

**M Dedeboh Oleya
Lek Kopiago, SHP**

Noken sutim bel long las de

Dia Edita,
Wari bilong mi i go olsem mi save raun long Kimbe taun na mi save harim ol manmeri i autim tok bilong Bikpela long strit na ol i save kolim wanpela hap tok olsem las de long ol manmeri na mi laik save sapos i tru olsem ol i save olsem las de nau o nogat.

Maski giamanim ol manmeri long las de. Yu laik autim tok orait autim long nem bilong Jisas long ol na i no ken yusim las de toktok long ol manmeri. Nem las de i stap long han bilong Papa God tasol. Em tasol i save.

Na long graun nogat wanpela man o meri bai i save olsem Jisas

bai i kam o las de bai i kam. Em God papa tasol i save.

I tru olsem nau em yia 2000 na yumi mas redi na is tap nogut yumi bamim lek long ston na pundaun.

Na sapos yumi redi bai yumi go we?. Na sapos yu i no redi bai yumi i go we?. Em tupela liklik askim bilong mi sapos yu husat brata o susa i gat sampela moa tingting na i laik tromol antap em laik tasol. Sapos yu laik egensim o sapotim em tu mi welkam long lukim.

**Justin Minei
Kimbe**

Muki Taranupi lus tingting long ilektoret

Dia Edita,
Mi laik sapotim pas bilong brata Tua Beta long pas bilong em we i salensim memba bilong Obura Waninara Muki Taranupi.

Dispela memba long taim bilong kempen em i bin go insait long ol eria bilong Obura Waninara na kempen olsem taim em i go long palamen em bai bringim ol sevis i kam long ol pipel bilong ilektoret.

Tasol taim em i go kamap memba na kamap Minista, em i lus tingting olgeta na i no bringim wanpela sevis o developmen i go bek long ol pipel

bilong Obura Waninara. Em i giaman tru na i go amamas long sili laip i stap.

I gat tupela hai skul long ilektoret bilong em we em i no streitim yet na tupela hai skul ya i sot tru long kisim sevis na helpim bilong memba.

Rot i go tu long Obura Waninara i no gutpela tru stat long Kainantu i kam.

Olsem na mi ting ol memba i save giaman mauswara tasol long kisim vot na taim ol i go kamap memba, ol i lusim tingting na amamas tasol long wanem gutpela samting ol bai kisim

long poket na haus bilong ol wantaim famili bilong ol. Mista Taranupi i bin kamap Minista tripela taim. Namba wan em long Hom Afeas, Wimens, Yut na Spot, Edukesen na nau Difens. Olsem wanem, inap yu pait tu long developim ilektoret bilong yu o yu laik pait tasol long kisim wok Minista na nogat han mak long pawa beis bilong yu?.

Em tasol komplem bilong mi na husat i laik bekim em welkam tasol.

**Jacob Joe
Kimbe**



KOMISIN BILONG HAIA EDUKESEN

PABLIK NOTIS

Go hetim TESAS long yia 2000

GAVMAN bilong Sir Mekere Morauta i rausim NATSHOL na putim Teseri Edukesen Stadi Asistens Skim (TESAS).

Edukesen Minista John Walko insait long wanpela bung wantaim ol ripota long Desemba 16 i bin tokaut long dispela nupela polisi. Namel long Desemba 1999 na Januari 2000, ol niuspapa, radio Tok Bek program, televisen na ol arapela sekula i bin karim na tokaut long ol nius long dispela long mekim klia long ol papamama, ol sumatin na ol edukesenol institusen olsem i gat nupela studen sapot skim long 2000 na ol yia i kam bihain.

Olgeta teseri institusen insait long kantri i bin kisim dispela infomesen na mipela i etvaisim ol long skruim dispela nupela polisi long stat bilong 2000 akademik yia.

Dispela notis i traim long mekim klia ol tems na Kondisen bilong TESAS na long mekim klia ol nupela fi we i kam aninit long en. Olgeta sumatin we i kam aninit long TESAS em ol i kisim pinis pas long toksave, tasol ol ken kisim tu wankain infomesen taim ol i kam kamap long ol institusen we ol bai skul long en.

Tebol 1 na 2 i eksplenim ol TESAS fi long yunivesiti na non-yunivesiti teseri institusen bilong yia 2000 na ol yia bihain.

Olsem meja sponsa, gavman i laikim ol sumatin we TESAS i karamapim ol long inapim ol samting we TESAS i laikim ol long en. Ol sumatin husat i kam aninit long TESAS i mas wok hat na kisim gupela mak.

Ol Tem na Kondisen bilong TESAS:

1 - Ditemineesen bilong TESAS

Sumatin husat i kisim Akademik Ekselens Skolasip aninit long TESAS bai peim wan pesen long total kos long edukesen bilong em. Sumatin we i kisim Haia Edukesen Kontribusen Skim (HECAS) bilong TESAS bai peim seven pesen long total yunit kos. Na dispela we i kam aninit long Selp Sponsa bai peim 25 pesen long total yunit kos.

Ol dispela we i kam aninit long Praivet Sponsa em ol lain we ol kampani o employi bilong ol, ol ovasis sumatin na ol PNG sumatin we ol ovasis gavman i sponsarim ol bai no inap long kisim helpim long TESAS. Ol sumatin we i stap long dispela grup bai peim 50 pesen o haf long ol yunit kos bilong yunivesiti edukesen na 100 pesen dairek studen kos long non yunivesiti edukesen.

2 - Husat inap kam aninit long TESAS

Long kam aninit long TESAS skolasip, sumatin i mas pulumapim TESAS Tems na Kondisens fom. Ol dispela we i kam aninit long HECAS na Self Sponsa i mas peim 50 pesen long ol skul fi pastaim.

3 - Benefit bilong TESAS

Helpim we TESAS i glivim em ol sumatin i stap long grup 1 na 2 bai kisim. Ol dispela we i stap long grup 3 bai mas kisim lon na ritan balus tiket tasol. Ol dispela i stap long grup 4 bai no inap kisim wanpela helpim long TESAS.

4 - Ol Kondisen bilong bihainim na bai TESAS i sponsarim sumatin

Ol sumatin bai kisim TESAS Awod long wanpela yia tas ol. Long pinis bilong yia, ol bai glasim ol samting na sapos ol sumatin i kisim gupela mak, TESAS bai sponsarim ol bek gen. Sapos sumatin i no wokim gut na em no inapim ol kondisen we TESAS i putim, ol bai rausim awod long en long pinis bilong yia.

5 - Pinisim TESAS Awod

Bihainim etvais bilong Gavaning Kaunsil o Akademik Bod, ol bai rausim TESAS Awod sapos institusen i pinisim sumatin taim em feilim ol subjek o i no kisim gupela mak o em i wokim bikhet pasin o em i lusim klas long planti taim o em yet long laik bilong em i pinis long skul.

6 - Riniwal bilong TESAS aninit long Kategori 1 na 2.

Sapos ol sumatin i widro long skul na ol rogat gupela medikol risen, ol bai no inap long kisim ol long Akademik Ekselens Skolasip o HECAS studen sapot skim. Sapos ol dispela sumatin i laik go bek, ol bai sponsarim ol yet na dispela em bai long wanpela yia. Bihain long dispela, ol ken aplai long kisim sekon sans sapot long TESAS.

Sapos wanpela sumatin meri i widro long skul bikos ol i gat bel, ol bai no inap long kisim em bek inap long em i kisim gupela mak long

averek sto poin we i abrusim 1.6 o gupela moa Na bihain long wanpela semesta em i sponsarim em yet. Na sapos em i gat hevi yet bihain long em i karim pikinini, i moabeta long em i widro olgeta long skul.

7 - Senisim Program

Sapos sumatin i laik senisim program we ol i stadim, ol mas aplai i go long Haia Edukesen long tok oraltim na tu transferim skolasip. Ol Het bilong Dipatmen bai raitim pas long sapotim aplikesen.

8 - Awod bilong TESAS kwota

Gavman i save putim kwota long wan wan grup bilong ol TESAS Awod. As tingting long dispela em mitim ol manpawa rikwaimen long ol wok we ol i kam aninit long en na long kipim sponsasip mak long level we fanding i ken inapim long en.

9 - Studen Lon skim

Ol sumatin we i stap long hevi na ino inap long painim mani long peim fi bilong kos na i stap aninit long grup 3 long ol arapela teserei institusen tasol i no long yunivesiti em ol bai inap long kisim Studen Lon skim. Em no karamapim ol sumatin we ol koporet bodi o ol arapela kampani i sponsarim ol. Studen lon skim i bilong helpim tasol ol sumatin i skul long ol teseri skul insait long kantri na i no long ausait.

Ol sumatin i mas peim haf o 50 pesen long total fi na putim orijinel risit wantaim lon aplikesen fom na salim i go long opis bilong OHE na ol bai skruim i go.

10 - Sumatin we TESAS i sponsarim long ol skul we gavman i luksave long ol.

Akademik Ekselens Skolasip i karamapim ol sumatin we i stadim ol Program gavman i luksave long en na sapotim. Dispela kain skul em

we ol sios na praivet sekta i papa long ol. Mak bilong ol sumatin we i stadi aninit long TESAS program mas noken stap aninit long 1.6 poin averejo i mas gupela moa long ol i ken skruim HECAS sapot.

11 - Spejel Awod Akademik Ekselens

- Aninit long Akademik Ekselens Skolasip, 100-pela awod i bilong ol meri
- Filty (50) i bilong ol medikol studen
- Ol arapela 150 awod i bilong ol sumatin long ol arapela eria

HECAS

- Aninit long HECAS, 1,000 awod i bilong ol elijibel meri sumatin
- Dispela spejel awod i go long ol meri sumatin we i edreseim jenda ikwaliti isu.

12 - Aplikesen long TESAS Awod

Yu ken kisim ol TESAS Awod aplikesen pepa long studen sevis desk insait long wan wan institusen long taim bilong rijstresen. Yu ken kisim TESAS Awod long Studen sapot na Skolasip Brens bilong Opis ov Haia Edukesen (OHE). Sapos yu laik kisim ol aplikesen pepa bilong TESAS sapot, lukim ol lain long Studen Support and Scholarship Branch, OHE, P.O.Box 5117, Boroko, NCD.

Man i oraitim ol toktok em:


Joseph Sukwianomb (Mr)
Slaman - CHE



Philip Kereme (Ph.D)
Dairekta Jenerel - OHE

Table 1 TESAS FEES FOR UNIVERSITIES

1 Scheme	2 Average Unit Cost (K)	3 Board/Lodging & Tuition Fees		4 Students/Parents Contribution	5 Fee Options		6 State Share		7 Total Fees Per Student Per Ann Paid to University	8 Grade Point Average
		B/L	Tuition		Residential	Non-Residential	Actual Cash	Hidden Cash		
Academic Excellence	15,000.00	3,150.00	600.00	150.00	150.00	150.00	3,600.00	11,250.00	3,750.00	3.6 - 4
HECAS	15,000.00	3,150.00	600.00	1,050.00	1,050.00	600.00	2,700.00	11,250.00	3,750.00	1.6 - 3.5
Self Sponsor	15,000.00	3,150.00	600.00	3,750.00	3,150.00	600.00	Nil	11,250.00	3,750.00	0.8 - 1.5
Private Department, Corporate and Foreign Government Sponsorship	15,000.00	6,900.00	600.00		7,500.00	3,750.00	Nil	7,500.00	7,500.00	

The category in which a student comes under depends on the Grade Point Average (GPA) a student obtains at the final assessment.

Students with GPA from 3.6 to 4 will come under the Academic Excellence Scholarship scheme.

Students with GPA from 1.6 to 3.5 will come under the Higher Education Contribution Assistance scheme.

Students with GPA 0.8 to 1.5 will come under the Self Sponsor scheme.

- Hidden costs are born by the state through the institutions' recurrent budget
- Students under Academic Excellence Scholarship are not eligible for assistance under the loan scheme.
- Students under HECAS and Self-Sponsorship can obtain a loan to pay for their fees.
- Students under Private, Departmental, Corporate Bodies, and Foreign Government sponsorship are not eligible for assistance under the loan scheme.

Table 2: TESAS FEES FOR NON-UNIVERSITY TERTIARY INSTITUTIONS

1 Scheme	2 Average Unit Cost (K)	3 Students/Parent's Contribution	4 Private Contribution	5 Fees		6 State's Share	7 Total Fees Per Student Per Annum	8 Grade Point Average
				Residential	Non-Residential			
Academic Excellence	1,875.00	18.75	Nil	18.75	18.75	1,856.00	1,875.00	3.6 to 4
HECAS	1,875.00	131.25	Nil	131.25	131.25	1,743.00	1,875.00	1.6 to 3.5
Self Sponsor	1,875.00	1,875.00		1,875.00	1,875.00	Nil	1,875.00	0.8 to 1.5
Private, Department, Corporate and Foreign Government Sponsorship	1,875.00		1,875.00	1,875.00	1,875.00	Nil	1,875.00	

The category in which a student comes under depends on the student's Grade Point Average (GPA) at the final assessment.

Students with GPA from 3.6 to 4 will come under the Academic Excellence Scholarship.

Students with GPA from 1.6 to 3.5 will come under the Higher Education Contribution Assistance Scheme [HECAS].

Students with GPA from 0.8 to 1.5 will come under the Self Sponsorship Scheme.


The loan scheme does not apply to students who are enrolled at non - university institutions except the self-sponsored students, if they can prove that they come from disadvantaged families.



• Antap: Tara ToMangana bilong Mazda i wokabaut i go long namba wan bes.





• Antap: Basketbal resis long Boana distrik long Morobe provins i paia lait moa taim memba bilong Nawae Kennedy Wenge i givim sampela mani long strongim spot ya long krismas.



• Lephon: Sori susa Wendy Katusele, yu aut ya. Wendy i go pas long win bilong AB Bears egensim Mazda 6-3 las wik.

WIKEN SPOT EKSEN

• Aninit: Winter Posing bilong DCA i pulim bal abrusim Inauta Inara bilong PNGBC insait long Pablik Sevans kopetisen.





Wiken Spot Dro

NCD Public servants soccer

Saturday February 19, 2000

University Toa One (1)

08:30	M2	A/Niugini vs Works
09:45	W1	Teachers vs NCDC
11:00	M2	Telikom vs IRC
12:05	W1	PNGBC vs Post PNG
13:05	W1	NSO vs DCA
14:20	M2	NBC vs Health

University Toa Two (2)

09:00	M2	UPNG vs POSF
10:15	W2	POSF vs UPNG
11:20	W2	BPNG vs Elcom
12:20	M2	Elcom vs BPNG

Sunday February 20, 2000

University Toa One (1)

08:30	M2	Health vs Commerce
09:45	W2	Commerce vs Health
11:00	M2	POSF vs NCC
12:05	W2	NCC vs POSF
13:05	W2	Defence vs Works
14:20	M2	Works vs Defence

University Toa Two (2)

08:30	M2	IRC vs Harbours
09:45	W2	Harbours vs IRC
11:00	M2	A/Niugini vs Telikom
12:05	W2	Telikom vs A/Niugini
13:05	W2	A/General vs NBC
14:20	M2	NBC vs A/General

League

Results Results/Table Feb 14 NRL

BRISBANE 18 (B Thorn 2 G Tallis tries B Walker 2 M DeVere goals) bt **PARRAMATTA 10** (D Penna B Kusto tries L Burt goal) at Parramatta Stadium. Crowd: 15,366. Referee: S Clark.

NEWCASTLE 38 (A MacDougall 2 B Peden P Shiels T Tahu D Albert M Gidley tries A Johns 5 goals) bt **MELBOURNE 6** (R Bawden try M Geyer goal) at Marathon Stadium. Crowd: 16,156. Referee: B Harrigan.

SHARKS 28 (D Peachey 2 M Rogers B Howland A Dykes tries Rogers 4 goals) bt **SYDNEY ROOSTERS 2** (C Fitzgibbon goal) at Toyota Park. Crowd: 13,112. Referee: S Hampstead.

ST GEORGE ILLAWARRA 12 (L Patten L Hookey tries W Bartrim 2 goals) bt **NORTH QUEENSLAND 6** (P Bowman try J O'Neill goal) at WIN Stadium. Crowd: 6,024. Referee: M Hewitt.

PENRITH 26 (R Wesser S Carter M Rodwell R Beckett S Domic tries R Girdler 3 goals) bt **BULLDOGS 0** at Stadium Australia. Crowd: 11,214. Referee: P Simpkins.

CANBERRA 22 (A Swann B Mullins L Vainikola A Colella tries D Furner 3 goals) bt **NORTHERN EAGLES 8** (A King A Torrens tries) at Bruce Stadium. Crowd: 10,085. Referee: T Mander.

WESTS TIGERS 17 (O Craigie D Senter J Hoapoate tries J Caine 2 goals C Field field goal) bt **AUCKLAND 16** (N Vadana 2 D Myles C Beverley tries) at Leichhardt Oval. Crowd: 10,807. Referee: M Oaten.

PREMIERSHIP TABLE

	P	W	L	D	F	A	Pts
SHARKS	2	2	-	-	56	14	4
PENRITH	2	2	-	-	45	6	4
CANBERRA	2	2	-	-	36	10	4
BRISBANE	2	1	-	1	42	34	3
WESTS TIGERS	2	1	0	1	41	40	3
NEWCASTLE	2	1	1	-	52	30	2
AUCKLAND	2	1	1	-	30	23	2
NORTHERN EAGLES	2	1	1	-	32	36	2
St George Illawarra	2	1	1	-	24	34	2
Sydney Roosters	2	1	1	-	22	44	2
Parramatta	2	-	2	-	26	38	0
North Queensland	2	-	2	-	12	31	0
Bulldogs	2	-	2	-	24	0	0
Melbourne	2	-	2	-	12	52	0

LEADING TRY SCORERS

J Caine (Wests Tigers)	3
B Thorn (Brisbane)	3
C Best (Sharks)	2
S Carter (Penrith)	2
S Hegarty (Syd Roosters)	2
J Hooper (St George Ill)	2
B Howland (Sharks)	2
A MacDougall (Newcastle)	2
D Peachey (Sharks)	2
N Roy (N Eagles)	2
T Tahu (Newcastle)	2
N Vadana (Auckland)	2

LEADING POINTSCORERS

	T	G	FG	Pts
J Caine (Wests Tigers)	3	6	-	24
M Rogers (Sharks)	1	8	-	20
D Furner (Canberra)	1	6	-	16
A Johns (Newcastle)	-	8	-	16
R Girdler (Penrith)	-	7	1	15
B Thorn (Brisbane)	3	-	-	12
C Fitzgibbon (Syd Roosters)	-	5	-	10
W Bartrim (St George Ill)	-	4	-	8
C Best (Sharks)	2	-	-	8
L Burt (Parramatta)	1	2	-	8
S Carter (Penrith)	2	-	-	8
S Hegarty (Syd Roosters)	2	-	-	8
J Hooper (St George Ill)	2	-	-	8
B Howland (Sharks)	2	-	-	8
A MacDougall (Newcastle)	2	-	-	8
D Peachey (Sharks)	2	-	-	8
N Roy (N Eagles)	2	-	-	8
T Tahu (Newcastle)	2	-	-	8
J Taylor (N Eagles)	-	4	-	8
B Walker (Brisbane)	-	4	-	8
N Vadana (Auckland)	2	-	-	8

-AAP




• Pot Mosbi softbal eksen long las wiken. Aninit Delin Bais i go pas long tim bilong em. Yu ken lukim em taitim bun long paitim bal.



ZENAG - Gutpela kiau

WANTOK SPOT



22 tim bai resis long Wikila Nains

PRL NAINS RIPOT

HENRY MORABANG
i raitim

SAMTING olsem 22 tim i givim nem pinis long stap insait long Wikila Nains ragbi lig tonamen. Dispela Nains tonamen bai kamap long Februari 26 aninit long lukaut bilong Pot Mosbi Ragbi Lig.

Long dispela wik Tunde, papa bilong Wikila Wholesale Willie Tan i givim K8,000 i go long siaman bilong Pot Mosbi Ragbi Lig Stanley Haru long holim na ranim dispela Nains kompetisen.

Mak bilong K3,000 em PRL na ogenaisa bilong Nains bai givim aut long olgeta wiken long semi fainel lusa, ranap na wina. Dispela tonamen bai ran inap long tupela wiken olgeta.

Siaman Stanley Haru wanem tim i gat laik bai mas baim K100 na K5 long rejistresen bilong wanwan pilaia. De bilong baim dispela fi bai pas long dispela wik Fraide (Februari 18).

Em i tok bai i gat 8-pela pul olgeta na insait long wanwan pul bai i gat tripela tim. Ol tim ya bai pilai tupela gem egensim ol birua bilong ol.

Haru i mekim tok strong olsem wanem ol pilaia i laik pilai i mas rejista pastaim wantaim

Pool A: Dolphins, Royals, Post Puma

Pool B: Manus, Tarangau, Souths

Pool C: Gerehu, Rinarau, Dobo Warriors

Pool D: Rebels, Lesse Kavora, Wests

Pool E: Brothers, Defence, Vewala

Pool F: Kone Tigers, Magani, Frigano

Pool G: Poreporena, Waliya

Pool H: Hawks, Paga Panthers

Siaman Haru i tok olsem ol sapota tu bai i gat sans long winim K50 sapos ol i baim get long go insait long lukim Nains tonamen.

Em i tok sponsa Willie Tan bai tro-moi K400 long tupela wiken.

Namel long ol gem, ol bai pulim laki tiket na husat i win i ken kisim dispela K50. Dispela kain dro em long pulim moa sapota long go insait na lukim dispela ol gutpela gem i kamap.

Mista Tan i tok dispela mani em long helpim Pot Mosbi Ragbi Lig. Wikila i bin promis long sapotim PRL long tripela yia olgeta na em i

namba tu ya, kampani bilong em i givim mani long sapotim Nains tonamen.

Em i tok Wikila i gat wanpela moa yia i stap yet long givim mani na sponsa long PRL long 2001.

Mista Tan na Wikila i gat sapotim Pot Mosbi Ragbi Lig long longpela taim nau. Em i mesa sponsa bilong Tarangau Ragbi Lig Klub na em bai sapotim em yet dispela klub long dispela yia.



• Siaman bilong PRL Stanley Haru (lephan) i kisim mani long papa bilong Wikila Wholesale Willie Tan long PRL klub haus.

OSENIA BASKETBAL RIPOT

Anda 22 tim i gat sans long winim gol long Vanuatu

ANDA 22 wimens basketbal tim bilong Papua Niugini i gat bikpela sans tru long winim medal long Oceania Anda 22 basketbal tonamen.

Dispela tonamen ya bai kamap long Port Vila, biktaun bilong Vanuatu long mun Me.

PNG wimen tim i bin stap long dispela kain resis long 1998 long Nu Kaledonia we ol i winim silva. Ol i lus long Nu Silan long grenfainel.

Dispela em wanpela bikpela samting tru long PNG Basketbal Federesen, na ol i laik tim ya i mas mekim wankain yet long May 15-27 taim ol i go pilai long Vanuatu.

PNG i no bin stap long 1997 tonamen long Fiji, we Fiji yet i winim taitel bilong man-na-meri.

Ol PNG opisal i billip olsem Anda 22 tu tim i ken mekim wankain olsem long 1998 o winim taitel bikos planti bilong ol dispela pilaia i kamap gut tru na bihain ol i go stap long sinia tim long Saut Pasifik Gems long Guam.

Wok redi long dispela tonamen bai stat long neks mun taim Jon Hoyle, wanpela Osenia developmen opisa i kam holim junia kosing na referi kos.

Basketbal tim bilong ol man i no pilai gut. Ol meri i ken pilai gut bihain long gutpela gem ol i putim kamap long Arafura Gems na tu long Saut Pasifik Gems.

Aisa Nao husat i komiti bilong Oceania Basketbal Federesen i tok olsem 18 tim long 10-pela basketbal federesen i givim nem.

Long resis bilong man, Tonga, Nu Kaledonia, Fiji, PNG, Northern Marianas, Vanuatu, Nu Silan, Australia, Nauru, Tahiti Kosrae na Palau.

Na long wimen resis, Nu Kaledonia, Nauru, Tahiti, PNG, Vanuatu, Nu Silan na Australia.

Nao i tok Fiji, Cook Ailan na Solomon Ailan bai givim nem long liklik taim bihain. Wanwan kantri bai salim 10-pela man na 10-pela meri long dispela kompetisen.

Vanuatu na OBC bai lukautim kaikai na haus slip long Vanuatu. Tasol olgeta tim i mas baim balus tiket bilong ol yet long kamap long dispela tonamen.

Bihain long dispela tonamen, ol bai makim Oceania All Star Youth tim long stap insait long Yut Gems long Sydney long 2001.

Em i Gutpela
Em i Tuna
Em i bilong
PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.